

ACT -

प्रेरितजिमि साप्चिरा

साप्चिरामि चिनारि

“एप्पा चोडसाजिमि योम्बोक” लुःमे इगो साप्चिरासो लुकाडे?नो?
साप्पा?आ हाइको साप्चिरा लेये ॥ इगो साप्चिरिबे? थाडसिर?टुरा पबित्ता
होडनिडा पेन्तिकोसमि येसुमि एप्पा चोडसाजिबे? लेन्नुड एक्साड

खोजिडे? “यरुसलेमबे?, यहुदियाबे?, सामरियाबे? मोबा मावखाम्बे?हा
चोपराजि’ येसुमि सुसमाचार परचार ले:पा?आ खानुड पावल एप्पा
चोडसाडे? ले:पा?आ सुसमाचारमि टुम्बे?सो टुहा ॥ खोमि या?लोए
साप्चिराबे?डोनो? इगो साप्चिराबे?सो येसु खिरिस्टमि टुम्बे?हा
सुसमाचारमि खा साप्डुहा ॥

इगो लुका या?मि सिरिया देसमि एन्टिओखिया सहरबि?ए लेटे ॥ पावल
इगो सहरबे? पेम्माबे?नो? लुकानुड चुप्पा?आ ले:टाजे होला मिडनुजे ॥
इन्डो?होड पावल रोम खे?माबे? लुकासो खोनुड सोरि खे?पा?आ लेटे ॥

इगो साप्चिरा इस्वि सम्बत ६० नुड ६५ मि रुम्बे? सिइये बेलाबे?
साप्पा?आ लेटे लुःनुड बे?लो निवादाडबाजिडे? लुःनुजे ॥ इडोवपे? एप्पा
चोडसा पावल रोम सहरबे? खे?नुड खोमिटुम्बे? सि?पा?आ मुद्धामि

फासेला हुडसाड पेन्सिडे ॥ “रोम सहर हागोए इटालि देसमि राजधानि लेये
॥” रोम सहर मोबेलाबे? बे?ए सहर लेटे ॥ मोडोवपे? बे?हा बे?हा

रोमिजिडे? ‘इगो खिरिस्ट्यान धरम इन्डो?मा धरमडे, इगो हाम्बाड लेन्डे’
लुःनुड सिम्मि?निडसिडुजे ॥ मोडोणे? इगो साप्चिराबे? लुकाडे?

खिरिस्ट्यानजिमि टुम्बे?, येसु असा लेटे, खोमि सुसमाचार यरुसलेमबाड

रोमठो? इन्डो? लेन्डे लु:मे खामि टुम्बे? साप्नुड थियोफिलस हाडड्टुए ॥

इगो साप्चिरा 'पबित्रा होडनिडामि योम्बोकसो' लु:न्डुजे ॥ इन्डो?होड एप्पा चोडसाजिडे? ले:पा?आ योम्बोक पबित्रा होडनिडामि अनुग्रहनुड सवितबाड ले:पा?आ लेटे ॥

1

निडा हाडडे? हेन्ज्रुड हेम्बा?आ पबित्रा होडनिडा

¹⁻² होड आदरनिया थियोफिलस, केए या?लोए साप्चिराबे? येसुडे? सेन्बा?आ खोमि एप्पा चोडसाजि पबित्रा होडनिडामि सवितबाड माहाजि आग्या पि:नुड थाडसिरि?टु माडखे?लोरो खोसे? ले:पा?आ योम्बोकनुड इ:पा?आ चोप खा या?लोनो? हेड साप्पेटुडे ॥ ³ येसु खे: आडनुड

सिघडा, मोबा रिबोड याकलो खो सिघे?पा?आबाड चैबानो? हिडबुक्पा?आ खा पक्का ले:मामि फेरि फेरि खाडमुसा ॥ मोबा निवाहाडमि राज्यमि

टुम्बे खोसे? या?मिजि खेम्मे?टुजि ॥ ⁴ इक्खे? माहाजिनुड चामा

चामे?निडसिमाबे? माहाजि खोसे? इडो? लु:सुजि, "यरुसलेम या:यानुड

हेनिड हम्बे?सो एखे?मे, तर थाडसिरिबे?ए केए पाबे? पबित्रा होडनिडा पि:न्ने लु:नुड हेम्बा?आ हेन्ज्रुड हेनिडे? हुडमे ॥ इगोगो या?लोनो? के?

हेनिड लु:बेनिम्ने ॥ ⁵ युहन्नाडे?को योडे? हेनिड बप्तिस्मा पि:टे ॥ तर इ?याक नियाक एक्साड हेनिडे? पबित्रा होडनिडामि बप्तिस्मा चुप्मिन्डानुम ॥"

येसु थाडसिरि?टु खे?पा?आ

मति १६:१९-२०, लुका २४:५०-५३

⁶ इ?याक एप्पा चोडसाजिडे? येसुनुड सोरि टुमाबे? खो सिप्सुजि, “परभु, इडोवपे?नो? इर्राएलिजि छुटकारा पि:नुड कानिडमि राज्य तारिइन्डुए ?”

⁷ येसुडे? माहाजि लु:सुजि, “इन्डोवपे? इगो खा लि:ये लु:नुड खाडमे, लेमे हेनिडमि योम्बोक ने?निबा ॥ मोगो बे?ए पाबे? खोमि निडाबे?

पक्का ले:न्डुए ॥ ⁸ तर पबित्रा होडनिडा हेनिडबे? लेम्माबे? सवित

टोइन्डानुमे मोबा हेनिड यरुसलेमबे?, यहुदियानुड सामरिया ठाउबे?, मोबा चोप माक्खाम्डेम्बे? केए साविछ लिन्डानिडे ॥”

⁹ येसुडे? मोडो? इ:से?नुड खो माहाजिडे? खाडमे?निडसिमाबे? थाडसिरि?टु ठेपु:क्खे?नुड खिमिम?वाहोडसि?यु यि:प्खडा ॥

¹⁰ माहाजिडे? नान्द्रुडमाबे? खो ठे?पुक्खे?पा?आ खाडसाड ये:पिटमाबे? अथिर?मा चे? चाडघुबा निप्पाड थाडसिरिदुतजि हाजोवटो

माहाजिमि केवपे? ये:प्नुड लु:सुजि, ¹¹ “होउ गालिलबे?हा या?मिजि,

इन्डोड नान्द्रुडमाबे? खाडमे?निडसिडानुमे ? येसु थाडसिरि?टु ठे?पोक्खे?पा?आडो?नो? खो इ?याक फेरि लेडइये ॥”

यहुदामि सट्टबे? इक्को एप्पा चोडसा सेन्बा?आ

(मति २७:३-१०)

¹² मोबा एप्पा चोडसाजि जैतुन लु:मे टोकटोक्माबाड यरुसलेम टेसामि ॥

मो ठाउ यरुसलेम बाड इक घन्टाडो? ओ: सि?टे ॥ ¹³ सहरबे? रुक्नुड खोजि सानिडनो? पेम्बा?आ खिमिमि मे?टोडए तलाबे? माहाजि पेएनामि

||b00235c.tif|col||चोडसाजि पेम्बा?आ सोडतला|1:13|| मोबे?

पत्रुस, युहन्ना, याकुब, अन्दरियास, फिलिप, थोमा, बारथोलोसमाड,
 मत्ति, अल्फायसमि पसा याकुब, देशभवत लुःमे सिमोन मोबा याकुबमि
 पसा यहुदा टुसामे ॥ ¹⁴ माहाजि चोप सोरि पेन्नुड सानिडनो?
 निवाहाडनुड पारथना लेःटामे ॥ माहाजिबे? येसुमि मामा मरियनुड हाइखा
 समसमजि, मोबा येसुमि निसाजिसो टुसामे ॥

¹⁵ मोडोवपे? पत्रुसडे? इक सय निबोड जनाडो? बिस्वासिजिमि रुम्बे?

येःपोवनुड ¹⁶⁻¹⁷ माहाजि लुःसुजि, “होउ वावानिसाजि, यहुदा
 इस्करियोतडे? कानिडनुडनो? सोरि निवाहाडमि योम्बोक लेः?टोवपा?आ
 लेःटे ॥ तर पबित्या होडनिवे? या?लोनो? हाडबा दाउदबाड यहुदाडे?
 इन्डो? येसु राःप्सि? लेडघुबाजि चिक्चेन्डुजे लुःनुड निवाहाडमि बचनबे?
 साप्पा?आ खा पुरा लिमा खडे ॥”

¹⁸ [इगो या?मिडे? माडे?मा योम्बोकबाड टोडबा?आ याडडे? रोपा
 इम्बा?आ^a लेःटे ॥ मोबे? खो चेप्नुड खोमि रुडमा पोवखडा मोबा सिघडा
 ॥ ¹⁹ मोबा यरुसलेममि या?मिजिडे? इगो खा लेडोवनुड मो रोपामि निड
 ‘अकेल्दामा’ युक्सुजि ॥ मो लुःबा?आ हरिडे? इम्बा?आ रोपा लिःये ॥]

²⁰ पत्रुसडे? लुःसुजि, “इडो? इगो खा भजनसडरहबे? दाउद हाडबे?
 साप्पा?आ लेःये, “मोमि खिम होप्रे?वा लिये ॥’ मोबा ‘मोबे? पेडघुबा
 असासो ए?लिमिरो ॥’ मोबा ‘खोमि भागाबे? हाइकेसे? अधिन
 लेः?टुमिरो^b’ ²¹ मोडोने? परभु येसु कानिडनुड सोरि टुमाबे?
 कानिडनुडनो? रम्बा?आ इक्को या?मि कानिडे? सेन्मानो? खेःये ॥

22 खो युहन्नामि हुकबाड येसुडे? ला:बा?आ बप्तिस्मा मोबा कानिडमि
रुम्बाड परभु येसु थाडसिरि?टु खे?मारो खाडघुबा, लेघुबा या?मि पा?मिये
॥ परभु येसु हिडबोकपा?आ खा कानिडे? लेबा?आडोकनो? खोसे? लेमा
खे:ये ॥”

23 मोडोणे? माहाजिडे? निप्पाड या?मिजि पोम्बे? लाण्टुजि-बारसाबास
लु:मे योसेफ मोमि निड युस्तससो लेटे मोबा मतियास ॥ 24 मोबा
माहाजिडे? इडो? कासाड निवाहाडनुड पारथना ले:टामि, “हे परभु,
हेणे?को या?मिमि निडा मि खा लेण्डुए ॥ 25 निवाहाडमि योम्बोक
ले:?मामि यहुदामि सट्टाबे? इघा निप्पाडबे? हेणे? सेन्बा?आ चोडसा
कानिड लेमे?मा, इण्डो?होड यहुदाडे?को नुबा राम ले?नुड खो खेन्जाये
मडे?मा रामबे? खे?पेसा ॥” 26 मोडोणे? माहाजिडे? चिट्ठा एण्डुजि, मोबा
मो मतियासमि निडबे? सि?टा ॥ मोबा खो इक पोड इवको एप्पा
चोडसाजिबे? ये?युसा ॥

2

पेन्तिकोसमि यिडे? पबित्य होडनिवा लेम्बा?आ

1 पेन्तिकोस^c लु:मे चाडमि यिडे? यरुसलेमबे? परभु येसुबे? बिस्वास
ले:खुबाजि इक ठाउबे? सुम्बा?आ ले:टामे ॥ 2 मोडोकपे? थाडसिरि?टुबाड
हाजोवटो मोबे? बे?ए हि?वाबाडो? मुक्साड लेण्डा मोबा मो माहाजि
पेम्बा?आ खिम इ?तुप लिसा ॥ 3 मो मिराप्लावाडो? खाडमुसा ॥ मो खोरो
खोरा लिनुड खोजिमि निन्डावाबे? पेना ॥ 4 मोबा पबित्य होडनिडा

माहाजिबे? लेन्नुड मोमि सवितडे? लुःमे?पा?आडो? खोजि हाइखा
हाइखा खाप्लाबे? यामुबुगामि ॥

⁵ मोडोवपे? यरुसलेमबे? मावखामडेम्बे?हा चोप देसबाड लेम्बा?आ
यहुदि धरममि धारमिक या?मिजि टुसामे ॥ ⁶ इगो खा खेमनुड बे?लो
या?मिजि मोबे? सुप्सामि ॥ चोप ठाडबाड लेम्बा?आ यहुदिजिडे? चाहि
खोजि टाडबामि खाप्लाबे? माहाजि काबा?आ खेप्सुजि ॥ ⁷ मोबा माहाजि
बे?लो खरि मिन्साड काबोगामि “इघा चोप या?मिजिगो गालिलि
या?मिजि ने?नेन्डे ? ⁸ तर इघाजिडे? कानिडमिनो? खाप्लाबे?
यामुबा?आ कानिडे? खेम्मे?निडसिन्डुडमे! ⁹ कानिडगो पारथिजि,
मादिजि, एलामिजि, मेसोपोटामिया, यहुदिया, कापाडोकिया, पोन्टस,
एसिया, ¹⁰ फिरिगिया, पामफिलिया, मिर्य देस, कुरेनि केवपे? सि?इहा
लिबियाराजिबाड मोबा रोमबाड लेम्बा?आजि टुन्डिडमा ॥ ¹¹ मोबा केरेट
पोडबोडनुड अरब देसबाड लेम्बा?आजिसो टुन्डिडमा ॥ कानिड
यहुदिजिनुड यहुदि धरम लाघुबा हाइखा जातिहा या?मिजि लेन्डिडमा ॥
इघाजिडे?को कानिड चोपमि खाप्लाबे? निवाहाडडे? ले:पा?आ खरिहा
योम्बोकमि टुम्बे?हा खा कानिडे? खेम्मे?निडसिन्डुडमा ॥ ¹² माहाजि
खरि मिन्नुड इमाड ले:मे ले:मे लि:सामि मोबा “इगो इमाडडे ?” लु:नुड
माहाजि सिम्घुसे? चुसामि ॥ ¹³ तर इन्डोणे? चाहि माहाजि इ:जोसुजि
“इघाजि गो इ:डे? से?खेटामे ले:!”

पत्रुसमि लाम्बावा

14 तर पत्रुसडे? इक्पोड इक्को एप्पा चोडसाजिनुड येःप्नुड बे?ए
 सेम्लाडे? चोबे? खेमरो लुःबे?टुजि, “होउ यहुदि लाडगामजिनुड
 यरुसलेमबे? पेडघुबा वावानिसाजि, इगोबे? इमाडडे लिःबा?आ लेःये
 लुःनुड लुःनिम्ने, केए खा खेप्सानुमे! 15 इघा या?मिजि हेनिडे?
 मि?पा?आडो?मा अडगुरमि खेडाडे? से?खे?पा?आ ने?निहाजि ॥
 इन्डो?होड हागो गो माक्मि?मि नोक्चि बोडरे?नो? काःटे ॥ 16 तर इगो
 गो योएल निड लेःये अगमबक्ताडे? धारमिक साप्चिराबे? साप्पा?आ लेःये-
 लाडगामजि नुरो? खेप्सानुमो,

17 ‘निवाहाडडे? लुःबा?आ लेःये,
 एक्साडए याकपे? केए होडनिडा चोप जातिहा या?मिसोक्पे?
 ओप्मिनुडे,
 मोबा हेनिडमि पसाजिडे? निवाहाडमि खा इन्डुजिहा, मोबा हेनिडमि
 वेन्जा पसाजिडे? सेन्जिसेन्जि?माड मा?इन्डुजे, हेनिडमि
 टुबाटुमाजिडे? सेम्माड मा?इन्डुजे ॥

18 मो यिडे? केए योम्बोक लेः?खुबा मे?ना?मिनुड वाडाडपसाजि सोक्पे?, केए
 होडनिडा ओप्मिनुडे
 मोबा माहाजिडे? निवाहाडमि खा इःन्डुजे ॥

19 मोबा के? नान्द्रुडमाबे? खरिहा खामि चिडगा खाडमुनुडे ॥
 मोडो?नो? मक्खाम्डेम्बे?सोड खरिहा चिडगा खाडमुनुडहा ॥ अथवा
 हरि, मिनुड मेक्खुमि मुस्तो हेनिड खाडमेनिम्ने ॥

20 परभुमि माहा माहाननुड खरिहा याक लेम्मा या?लो

नाम निनिबा मोबा सेञ्जुगुप लियेनुड, ला चाहि हरिडो?मा हरयमा लिये
॥

21 मोबा असे? परभुमि निडबे? बिस्वास ले:नुडए खो हिडइये ॥”

22 “होउ इर्राएलिजि, इगो खा हेनिडे? खेप्सानुमे ॥ येसुबाड
निवाहाडडे? खरिहानुड सवितनुडहा योम्बोक हेनिडमि रुम्बे?

ले:पा?आ गो, हेनिडे? लेन्डानुमे ॥ माहा चिडगाबाड निवाहाडडे?नो?

येसु पाडइटुडे लु:नुड पक्का ले:पेटुए ॥ 23 निवाहाडडे? खोमि योजनानुड
निडाबे? मि?पा?आडो?नो? येसु हेनिडमि हुक्पे? पि:सा मोबा हेनिडे?
खो माडेहा या?मिजिमि हुक्पे? पि:नुड काप्सिडसोक्पे? किडनेमे?टानुम

॥ 24 तर निवाहाडडे? येसु सिघे?पा?आबाड हिडबोइटुए ॥ इन्डो?होड खो

सिघे?पा?आ सिघे?पा?आ मालिहेसे ॥ 25 हाडबा दाउदडे? येसुमि टुम्बे?

इडो? लु:बा?आ लेटे,

‘केए परभु सानिडनो? केए पोम्बे? खाक्सुड ॥

खो केए चुप्थिडलाम टुये, मोडोणे? के? कि?रिसमा पा?नि ॥

26 मोडोणे? केए निडा बे?लो साप्थाडइये मोबा का साप्थाडमानुड निवाहाडमि ओहाड
ले:नुडे ॥ का सिमा सि?होडसो फेरि हिडइडे आसबे? हिडइडे ॥

27 इन्डो?होड निवाहाडडे?, केए होडनिडा पतालबे? या:यासुनिबा ॥

हेने? हेनेए पबित्य या?मिमि हिडा किम्मे?टुनिबा ॥

28 हेने?को का चैबानो?मा राम खाडमुटिडे ॥

हेन्नुड टुमाबे? का साप्थाडइडे^d॥

29 के? लु:हेनुडे “होउ वावानिसाजि, हागो के? कानिडमि टुबा दाउदमि टुम्बे? पक्का ले:नुड लु:हेनुडे ॥ खो सिघे?नुड खोमि ये:मा आयुरोसो टुसिये ॥ 30 मोडोणे? खोमि बडसबाडनो? खो पेम्बा?आ हाडबा पेन्ढाम्बे? इवको या?मि निवाहाडडे? हाडबा टोडनुड युडइन्डुए दाउदडे?

या?लोनो? लेसुहा ॥ 31 एक्सड निवाहाडडे? इमाड ले:न्डुहा लु:मे खा दाउदडे? या?लोनो? लेसुहा ॥ मोडोणे? पापबाड छुटकारा पि:घुबा हाडबा खिरिस्ट सिबा?आबाड हिडबुइये टुम्बे? इडो? लु:टुए, ‘खो चाहि पातालबे? या:याविनबा, मोबा खोमि हिडासो किमघे?निबा ॥’

32 मोनो? येसु निवाहाडडे? फेरि हिडगिरिक टोडइटुए मो खाबे? कानिड चोप खाडखुबा साविछजि टुन्डिडमा ॥ 33 निवाहाडडे? येसु बे?एम्मा टोडनुड खोमि चुप्थिडलाम युडइटुए ॥ मोबा खोसे? हेन्नुम हेम्बा?आडो?नो? पबित्त्य होडनिडा पि:सु ॥ मोबा माहा होडनिडा नो? परभु येसुडे? कानिड हाडबिटेनुड “इडो? लिमे?निडसिहा” माहा खानो? हेनिडे? खाडमे?नुड खेम्मे?निडसिन्डानुमे ॥ 34-35 हाडबा दाउद चाहि येसुडो?नो? ले:नुड थाडसिरि?टु मेडखडा तर खोसे? इडो? लु:बा?आ ले:ये, निवाहाड केए परभुडे? इडो? लु:सु, ‘के? हेनेहा सतुरजि हेनेहा राडभेक होडबे?मु मेयुडरो हेड केए चुप्थिडलाम पेने!e’

36 “मोडोणे? चोप इर्राएलि या?मिजि हेनिडे? इगो खा नुरो? लेसानुमे, हेनिडे? काप्सिबे? किडनेबा?आ येसुनो? निवाहाडडे? परभुनुड मुवित

पिःघुबा खिरिस्ट टोडइटुए ॥”

³⁷ पत्रुसमि खा खेम्नुड खोजिमि निडा टुगामि मोबा माहाजिडे?

पत्रुसनुड हाइखा एप्पा चोडसाजि सिप्सुजि, “होउ वावानिसाजि, हागो कानिडे? इमाडडे लेः?मे ?”

³⁸ मोबा पत्रुसडे? लुःसुजि, “हेनिडमि पापबाड आम्लाड टोवमामि लागि पाप लेः?मा लेडानुमे, मोबा येसु खिरिस्टमि निडबे? बप्तिस्मा लासानुमे! मोबा हेनिडे? निवाहाडबाड पबित्रा होडनिडामि वरदान चु?मिन्डानुमे ॥

³⁹ इन्डो?होड इगो पबित्रा होडनिडामि हेन्जरुड हेम्बा?आ गो हेनिडनुड हेनिडमि पसाजि, मोबा खोसे? केः?पा?आ ओः ओः टुघुबाजिसो लेए ॥

⁴⁰ मोबा पत्रुसडे? हाइखाजिसो बे?लो खामि साविछ पिःसुजि मोबा खोजि नुरो? अरति पिःसाड लुःसुजि, “इगो माडेहा या?मिजिडे? चुप्मिहा

दन्डाबाड हेनिड हिडजासानिडे ॥” ⁴¹ बे?लो या?मिजिडे? पत्रुसमि खा खेम्नुड बिस्वास लेः?टुजि मोबा मो याकनो? बप्तिस्मा लाघुबा या?मिजि

सुम्बोड हजारडो? लिःसामि ॥ ⁴² मोबा माहाजिडे? एप्पा चोडसाजिनुड

चिनामे, सोरि सेवा लेःटामे ॥ मोबा सानिडनो? सोरि सोरि पारथनानुड परभु भोज लेःटामे ॥

बिस्वासिजिमि सडगति

⁴³ मोबा एप्पा चोडसाजिडे? खरिहा योम्बोक लेः?साड बे?लो चिडगा

खाडमुसुजि ॥ मोडोणे? या?मिजि निवाहाडनुड किरिसबुगामि ॥ ⁴⁴ मोबा

बिस्वास लेः? खुबाजि सोरि पेनामे ॥ खोजिमि चोप कोवनाम साजे लेःटहा

॥ ⁴⁵ मोबा माहाजिडे? खोजिमि याडसरावानुड कोवनाम इन्जानुड

मडकाप्खुबा या?मिजि हाबे?टुजे ॥ ⁴⁶ खोजि इवको निडा मि लिनुड
सानिडनो? मन्दिरबे? सुम्नुड सडगति लेःटामे ॥ खोजि खिम खिमबे?

सोरि पेन्नुड सप्थाडमानुड परभु भोज चासामे ॥ ⁴⁷ खोजि सानिडनो?
निवाहाडमि ओहाड लेःटामे ॥ माहाजि हाइखा या?मिजिडे?सो नेन्जोसुजे
॥ निवाहाडमि बिस्वासबे? हिडघुबाजि बे?लो बे?लो लिसामि ॥

3

इवको सोगुबा या?मि नुबोवपा?आ

¹ इ?याक पत्रुसनुड युहन्ना लेन्डा सुम बोडराजि मन्दिरबे? पारथना
लेः?सि? खे?मे?निडसिडाजे ॥ मोडोवपे? निवाहाडनुड पारथना ले?मे

बेला लेःटे ॥ ² मोबे?, सुन्दर लुःमे रम्डेम्बे?, इवको सोगुबा या?मि पेने ॥
खो टोवमाबे?नो? सोगुबा लेःटे हाइखा या?मिजिडे? सानिड मोबे?
खिजे?ओसुजे ॥ खोसे? मोबे? लेडखुबा या?मिजिनुड इमा इमा डाःक्वासे

॥ ³ मोसे? पत्रुसनुड युहन्ना निवाहाडमि मन्दिरबे?
खे?मे?निडसिबा?आ खाडडोवनुड खोजिनुड इमा इमा डागु ॥

⁴ युहन्नानुड पत्रुसडे? मो नाक्वाघु नुरो? वाणुड लुःसाजु, इगि?यु
खाक्से! ⁵ मोबा मोसे?सो मोजिबाड इमाड चुमिनुडे मि?नुड नुरो?
खाक्सु ॥

⁶ पत्रुसडे? लुःसु, “कानुड सुनानुड सिसेडगो इमाडसो मा?आये तर
कानुड इमाड टुहा मोनो? हेड पिन्ने ॥ नासरतबि?ए येसु खिरिस्टमि

निडबे? येपोवनुड राप्से ॥ ⁷ मोबा पत्रुसडे? इडो? लुःनुड नासरतबे?ए
 येसुमि निडबे? पुके?नुड राप्से लुसाड मो सागुबामि चुप्थिड हुक राःपूनुड
 येपोवमाराप्टु ॥ मोडोवपे?नो? मो या?मिमि सराडमि राडतु?माबे? बोल्
 लेरसा ॥ ⁸ मोबा खो येप्पोवनुड राम्बोगा ॥ मोबा खो चोम्योक चोम्योक
 आमसाड, सिमआसाड निवाहाडमि ओहाड ले?साड पत्रुस, युहन्नानुड
 निवाहाडमि खिमहोडसि?यु प्रेःएना ॥ ⁹ इडो? रामसाड निवाहाडमि ओहाड
 ले?पा?आ चोप या?मिजिडे? खाडडोगुजि ॥ ¹⁰ इगो गो निवाहाडमि
 खिमिम सुन्दर लुःमे राम्डेम्बे? सानिड डाःकचासाड पेडखुबा या?मि
 लुःनुड लेबेसुजि ॥ 'इगो या?मि इन्डोवटे राम्बोगे ?' कासाड माहाजि चोप
 खारि मिनामि ॥

पत्रुसडे? निवाहाडमि खिमबे? सुसमाचार परचार ले?पा?आ

¹¹ मो या?मि पत्रुसनुड युहन्नानुड मन्दिरमि सोलोमान लुःमे दलानबे?
 सोरि राम्बा?आ खाडडोवनुड खरि मिन्साड खाडसि? पिन्जासामि ॥

¹² मोबा पत्रुसडे? माहाजि खाडसाड लुःसुजि, "होउ इर्राएलि वावा
 निसाजि, इगो खा इन्ढोड हेनिड खरि मिन्साड खाडइन्डानिडे ? इगो
 या?मि कानिडमिनो? सवितनुड भवितडे? राम्बोवपा?आ मिइन्डानुमे ?

¹³ कानिडमि टुबा अब्राहाम, इसहाकनुड याकुबमि निवाहाडडे? खोमि
 योम्बोक लेःखुबा येसु महिमित टोक्सु ॥ हेनिडे? चाहि खो से?नेमा खेये
 लुःनुड राःबानुम ॥ बे?ए हाकिम पितातसडे? खो ले?मा योवमाबे?सो

हेनिडे? ले?मा फेन्न लुःसानुम ॥ ¹⁴ हेनिडे? पबित्रानुड धारमिक

या?मिमि सट्टो या?मि से?खुबा माडे?मा या?मि चाहि लेप्पेबे?मा लु:नुड
डागानुम ॥ ¹⁵ इडो? हेनिडे? जिबन पि:घुबा से?नेसानुम, तर निवाहाडडे?
खो सिबा?आबाड हिडरिक् टोक्सु मो खामि कानिड साविछ लेन्डिडमा

॥ ¹⁶ मोनो? येसुमि निडमि सवितडे? बोल चुट्टु ॥ येसुमि निडबे? मो
या?मिडे? बिस्वास ले:पा?आसे? इगो या?मि नुरे? नुबोवनुड हेनिडमि
पोम्बे?नो? टु:ये ॥

¹⁷ “होउ वावानिसाजि, के? लेनुडे हेनिडमि सासकजिडे?नुड हेनिडे?

येसु असाडे लु:नुड मलेरे?नो? से?नेसानुम ॥ ¹⁸ तर खिरिस्टडे? खे
आडमा खेये लु:मे खा निवाहाडडे? बे?लो या?लो अगमबक्ताजिबाड

इ:बा?आ खा खोसे? मोडो? पुरा ले:टु ॥ ¹⁹ मोडोणे? हागोनो? हेनिड
टाडबा टाडबामि पाप ले?पेनुड निवाहाडबे? टेसानिडे? ॥ खोसे? हेनिडमि
चोप पापमि आम्लाड पि:ये मोबा हेनिडे? निवाहाडबाड होडनिवामि सान्ति

टोइन्डानुम ॥ ²⁰ इडो? निवाहाडडे? या?लोनो? हेनिडमि लागि सेम्बा?आ

खिरिस्ट फेरि हेनिडमि लागि पाडबे?ये ॥ खोनो? येसु ले:ये ॥ ²¹ तर
निवाहाडमि खा इ:खुबाजिडे? या?लोनो? लु:डिडो? निवाहाडडे? चोप खा

चोड मन्टोडलो येसु थाडसिखिबे?नो? टुमा खेये ॥ ²² मोसाडे?सो इडो?

इ:बा?आ लेटे परमपरभु हेनिडमि निवाहाडडे? काडो?मानो?, हेनिडमि
लागि हेनिडमि जातिबाडनो? इक्को निवाहाडमि खा इ:खुबा पाडइन्डुए ॥

खोसे? लु:बा?आ चोप खा हेनिडे? खेम्मा खेये ॥ ²³ तर खोमि खा

मेडखेम्खुबाजि चाहि निवाहाडमि या?मिजिबाड फाक्पेनुड नासि लिम्मे^h ॥

²⁴ मोबा समुएलनुड खोबाड एक्साडहा चोप अगमबक्ताजिडे? इघा आयु

वागिया लिमे?निङ्गसिहा याकमि टुम्बे?नो? इ:बा?आ ले:हा ॥

²⁵ अगमबक्ताजिबाड निवाहाडडे? हेम्बा?आ हेञ्जुरुड हेनिडमि लागिनो? ले:ये ॥ मोबा निवाहाडडे? हेनिडमि टुबालाबाजिनुड हेम्बा?आ हेञ्जुरुड हेनिडमि लागिओ ले:ये ॥ निवाहाडडे? कानिडमि पुर्खा अब्राहाम इडो?

लु:बा?आ ले:टे, 'हेनेहा पसाजिबाडनो? माक्खाम्डेम्बे?हा चोप जातिहा

या?मिजि के? आसिस पि:नुडहाजि॥'²⁶ इडो? निवाहाडडे? हेनिडमि माडेहा योम्बोकबाड टेआप्नुड आसिस पि:मामि लागि निवाहाडमि योम्बोक ले:खुबा येसु या?लो हेनिडबे?नो? पाडबा?आ ले:टे ॥”

4

पत्रुसनुड युहन्ना यहुदि न्याधिसजिमि सभामि पोम्बे?

¹ पत्रुसनुड युहन्नाडे? या?मिजिनुड यामुमारो:नो? याडाडबाजि, निवाहाडमि खिम हुडखुबा येरिडजिमि एप्पानुड सटुकिजि मोबे? लेन्डामि

॥ ² माहाजिडे? येसु सिधे?पा?आबाड हिडबोवडे मोडोवनो? येसुबे? हाइखा या?मिजिसो सिधे?पा?आबाड हिडबोइम्मे लु:मे खा परचार

ले:पा?आसे? माहाजि खोजिनुड बे?लो सुरिकडामि ॥ ³ मोबा माहाजिडे? पत्रुसनुड युहन्ना स:बुजि ॥ मोडोवपे? नाम्कवखे?पा?आसे? सेन्से

मोजि या?मि से?वठाम खिमबे? सेगुजि ॥ ⁴ तर मोजिबाड सुसमाचार खेमखुबाजिबे? बे?लो या?मिजिडे? बिस्वास ले:टुजि ॥ बिस्वास ले:खुबा

वाडाडबसाजि डाउम हजारडोक लिसामि ॥ ⁵ मोबा वगियाराम एप्पा

याडाडबाजि, यहुदि धारमिक नियम इ:वखुबाजि मोबा हाइखा एप्पाजि

यरुसलेम्बे? सुप्सामि ॥ ⁶ मोबे? चोप्पाड एप्पा याडाडबा हन्नास, खोमि

टाडबाड कैयाफा, युहन्ना, अलेक्जेन्डरनुड चोप्पा एप्पा याडाडबामि
 खिमबे?हा हाइखा या?मिजिसोड मोबे? टुसामे ॥ ⁷ मोबा माहाजिडे?
 युहन्नानुड पत्रुस खोजिमि पोम्बे? लाजे?नुड इडो? लु:साड सिप्सुजि,
 “हाम्बे सवितबाड, अथबा असामि निडबे? हेन्जिडे? इघा योम्बोक ले:न्जुए
 ?”

⁸ मोबा पत्रुसडे? पबित्रा होडनिवामि सवित चुप्नुड माहाजि लु:सुजि,
 “होड या?मिजिमि एप्पा सासकनुड अगुवाजि, ⁹ आयु कानिडे? इगो
 एक्सोव्या या?मि नामनाम ले:नुड नुबोवपा?आसे? मोबा इन्डो? इगो
 या?मि नुबुवपा?आ खा सिम्मामि लागि हेनिडे? कानिड

लाजे?पा?आहोड, ¹⁰ हागो हेनिडनुड इर्राएलबे?हा चोप या?मिजिडे?
 इगो खा लेसानुमे ॥ हेनिडमि पोम्बे? ये:प्मिये इगो या?मि नासरतमि
 येसुमि निडबे? नुबोवइटे ॥ हेनिडे? चाहि येसु गो काप्सिड सोवपे?
 किडनेसानुम, तर निवाहाडडे? खो सिघे?पा?आबाड हिडबोइटुए ॥

¹¹ खोमि टुम्बे? धारमिक साप्चिराडे? इडो? लु:बा?आ ले:ये,

‘गारो सोवखुबाजिडे? फेन्निबा लु:नुड राप्पेबा?आ रुडगो?वानो? जग
 युडढाम रुडगो?वा लि:सा ॥’ ¹² येसुबे?रे?नो? पापमि छुटकारा टुये ॥
 मोडोणे? या?मिजिडे? पापबाड छुटकारा लिमामि लागि मावखाम्डेम्बे?
 हाइको निड मा?आये ॥”

¹³ मोबा माहाजिडे? पत्रुसनुड युहन्नामि आट खाडनुड खरि मिन्साड
 इगोजिगो मामुलिहा या?मिजि लु:नुड लेसुजि ॥ माहाजिडे? इगो या?मिजि

या?लो येसुनुडनो? टुसामे लु:नुडसो लेडोवटुजि ॥ ¹⁴ तर मो नुबोवपा?आ
या?मिसो पत्रुसनुड युहन्नानुडनो? सोरि ये:पिटडबा?से? माहाजिडे?

इमाडसो मेलु:हेसुजि ॥ ¹⁵ मोडोणे? माहाजिडे? पत्रुसनुड युहन्ना बे?ए

सभाबाड पाखे?यु पाक्सुजि मोबा माहाजि चाहि इडो? मोत्ता इबोगामि,

¹⁶ “हागो इघा या?मिजि इमाडडे ले?मे ? इघाजिडे? ले:पा?आ खरिहा
योम्बोक यरुसलेमबे? पेडखुबा चोप या?मिजिडे? खाडबेटुजे ॥

कानिडे?सो इगो ने?निहा लु:नुड लु:हेसुडमानि ॥ ¹⁷ तर इगो खा हाइखा

या?मिजिबे? मेमुक्खे?लो लु:नुड माहाजि हागोएम्बाड ‘येसुमि टुम्बे?हा
खा असासो ए?लु:मे’ लु:नुड खोजि वोप्नुड किरिसमा उक्पे?मा खेम्मे ॥”

¹⁸ मोडोणे? माहाजिडे? पत्रुसनुड युहन्ना होडसि?यु के:नुड लु:सुजि,
“येसुमि निडबे? हागोएम्बाड असासो इमाडसो एड?मेनुड, एलु:मे लु:नुड
आग्या पि:सुजि ॥ ¹⁹ तर पत्रुसनुड युहन्नाडे? लु:सुजि, “हागो कानिडे?

या?मिजिडे? लु:बा?आ खा खेम्मेन्डे, निवाहाडडे? लु:बा?आ खा खेम्मे ?

हेनिडे?नो? मि?खाक्सानुमे ॥ ²⁰ तर कानिडे?को खाडबा?आनुड,

खेम्बा?आ खा मलु:रे? पेन्नो? पेडहेसिडमानि ॥” ²¹ इगो खा खेम्नुड
चोप यहुदि सुम्हाम खिमबे?हा या?मिजिडे? माहाजि किरिसमा उक्पे?टुजि
॥ मोजि दन्डा पि:मे निहु मेन्चुप्टुजि इन्डोडहोड खोजिडे? ले:पा?आ
खरिहा खा खाडनुड या?मिजिडे? निवाहाड ओहाड पि:मे?निडसिडुजे ॥

²² इडो? खरिमा योम्बोकबाड नुबोवपा?आ या?मि रिक्पोड निडबाडसो
चुरे? याक्पा?आ लेटे ॥

बिस्वासिजि निवाहाडनुड यामुबा?आ

²³ माहाजि ले?खे?मासोरो? पत्रुसनुड युहन्ना खोजिमि लाडगामजिबे? टेखडाजि ॥ मोबा एप्पा याडाडबाजिनुड यहुदि एप्पाजिडे? लु:बा?आ चोप

खा लाडगामजि इ:बे?टुजि ॥ ²⁴ इडो?हा खा खेम्नुड माहाजिडे? इवको

निडा ले:?नुड इडो? कासाड निवाहाडनुड यामुसामि, “हे कानिडमि चोप्पा सवितदाडबा परभु निवाहाड हेने?नो? इगो थाडसिरि

मक्खाम्डेमनुड माहोडमा मोबे? टुहा चोप थोक टोडइटुहा ॥ ²⁵ हेनेए

पबित्रा होडनिडाबाड कानिडमि टुबा दाउदमि याबुवबाड इडो? लु:टे,

इन्होड हाइखा जातिजि सुरिकेम्मे ?

या?मिजि इन्होड मे:?नोक्सो निडाबे? माडेहा खा टोडइन्डुजे ?

²⁶ निवाहाडनुड खोसे? सेम्बा?आ खिरिस्टमि बिरोध ले:?सि?

मक्खाम्डेम्बि?हा हाडबाजिनुड सासकजि सुप्सामि ॥

²⁷ इन्डो?होड वैबानो? हेने? सेम्बा?आ छुटकारा पि:घुबा हाडबा येसु टोक्सु ॥ खोमि बिरोधबे? ये:प्खुबा हेरोदनुड पन्तियस पिलातस मोबा इम्प्राएलबे?हा हाइखा हाइखा जातिहा या?मिजिसो इगो सहरबे?नो?

सुप्सामि ॥ ²⁸ तर माहाजिडे? हेनेए सवितनुड हेनेए निडाडे? या?लोनो?

मि?पा?आडो? ले:टुजि ॥ ²⁹ हागो हे परभु, कानिड किरिसमा

उक्खुबाजिडे? पि:बा?आ खाबे? निडा टिसे ॥ मोबा हेनेए योम्बोक

ले:?खुबाजि हेनेहा खा मेडकि?सिरे? खेम्मे?हेमे सवित पि:मायो ॥

³⁰ कानिड हेनेए योम्बोक ले:?खुबा येसुमि निडबे? या?मिजि नुबोकमेनुड, खरिहा योम्बोक ले:?मेनुड विडगा खाडमुमे सवित पि:मायो ॥”

³¹ माहाजिडे? निवाहाडनुड पारथना ले:१से?नुड एवसाड माहाजि सुम्बा?आ ठाउबे? रु?मि लेम्बा?आडो? सोवसा ॥ मोबा माहाजि चोपबे? पबित्रा होडनिडामि सवित लेरसा मोबा निवाहाडमि बचन मडकिसिरे? या?मिजि खेम्मे?पोगुजि ॥

बिस्वासिजिमि चोप थोक साझा

³² परभुबे? बिश्वास ले:१खुबाजि इवको निडा लिनुड खोजिनुड टुहा चोप थोक “असे?सो इगो केए” लु:नुड मलु:सुजे, तर माहाजिमि चोप थोक

साझा ले:टहा ॥ ³³ मोबा एप्पा चोडसाजिडे? बे?ए सवितनुड येसु हिडन्डिक लिबा?आ खामि साविछ पि:सुजेनुड निवाहाडमि बे?लो आसिस

खोजिबे? टुसहा ॥ ³⁴⁻³⁵ खोजिमि रुम्बे? असासो इमाड पाप्होड

याडसरावा, खिम सोडरा, रोपा, इन्जानुड याड लाजे?टुजे ॥ ³⁶⁻³⁷ इवको योसेफ निड ले:१खुबा साइप्स देसबि?ए लेबि कुलमि इवको या?मि टुसे ॥ खोसे?सो रोपा इन्जाबा?आ याड एप्पा चोडसाजिनो? पि:सुजि ॥ खो एप्पा चोडसाजिडे? बारनाबास लु:नुड के:डुजे ॥ बारनाबास लु:बा?आ उत्साह पि:घुबा या?मि ॥

5

हननियानुड सफिरा

¹ तर मोबे? हननिया निड ले:१खुबा या?मि टुसे ॥ खोमि सफिरा निड

ले:१खुबा खिमदाडमा टुसे ॥ खोजिडे?सो एडे?वा रोपा इन्जनुड ² एडे?वा याड खोजिदाडबामि लागि खुस्त्रिडमु चुप्साजु मोबा हाइखा याड हननियाडे? एप्पा चोडसाजिबे? लाजे?डु ॥

3 मोबा पत्रुसडे? सिप्सु, “होउ हननिया, हेनेए निडाबे? सैतान युडनुड
 इन्ढोड पबित्या होडनिवामि पोम्बे? रेम्दे?मे?निडसिन्डुए ? रोपा
 इन्जाबा?आ याडबाड एडे?वा याड आमिम लागि इन्ढोड चुप्सुए ? 4 मो
 रोपा गो मेइन्जामाबे? याडसो हेनिडमिनो? ले:टे ॥ मोबा इन्जानुडसो
 हेनिडमिनो? लेटे ॥ तर इन्ढोड हेन्जिडे? रेम्देडाजुए ? हेन्जिडे?
 या?मिजि ने?नि तर निवाहाडनुड रेम्दे?चुए ॥”

5 पत्रुसबाड इडो?मा खा हननियाडे? खेम्मासोरो? यिप्रिकटो?
 काडनुड मोबे?नो? खो सिघडा ॥ मोबा मो खेम्खुबा चोप या?मिजि बे?लो
 कि?सिडामि ॥ 6 मोबा मोबे? टुबा?आ वेन्जाजिडे? सिचे?डे? यिण्डुड
 पाखे?यु लाघे?नुड हुप्सुजि ॥

7 मोबा सुम्बोड एवसाड हननियामि खिमदाडमा सफिरासो मोहोडसि?यु
 लेरसा ॥ मोडोवलो खोमि ठा?पामि टुम्बे? इमाडसो मालेबा?आ लेटे ॥

8 पत्रुसडे? सफिरा सिप्सु, “का लु:मा चैबानो? हेन्जिडे? रोपा
 आवटोपे?नो? इन्जासाजुए ?” खोसे? लु:सु, “एडो आवटोकपे?नो?
 इन्जाबा?आ ॥”

9 मोडोने? पत्रुसडे? खो लु:सु, “इन्ढोड परभुमि होडनिडानुड रेम्दे?मा
 योगाजुए ? खावसे, हेनेए ठा?पा ये:?माबे? युडघुबाजि रम्डेमबे?रे?
 लेम्मे?निडसिम्मे ॥ माहाजिडे? हेडसो खि:घे?नुड हुम्डम्मे ॥”

10 मोबा खो पत्रुसमि खा खेम्मासोरो?नो? पत्रुसमि पोम्बे?
 यिप्रिकटोक काडनुड खोमि सोवमा खडा ॥ मोबा माहा वेन्जाजि
 होडसि?यु पेखे?माबे? सफिरा सिघे?पेबा?आ खाडडोवटुजि मोबा माहा

वेन्जाजिडे? खि:घे?नुड खोमि ठा?पामि ये:मा के?वपे?नो? हुप्सुजि ॥

¹¹ मोबा मोहा खा खाडडोवनुड सेवा खिमबे?हा चोप या?मिनुड हाइखा या?मिजिसो चोप सारोनो? किरिसखडामि ॥

एप्पा चोडसाजिबाड खरिहा योम्बोकनुड खरिहा चिडगा

¹² मोबा एप्पा चोडसाजिडे? बे?लो खरिहा योम्बोकनुड खरिहा चिडगा या?मिजिमि रुम्बे? ले:टुजे ॥ येसुबे? बिस्वास ले:खुबाजि चोप सोलोमान

लु:मे दलानबे? सोरि सुप्सामि ॥ ¹³ हाइखा या?मिजिडे? खोजि आदर ले:टुजेहोडसो खोजिनुड सोरि टोडनुड पेम्मे आट चाहि मले:हेसुजि ॥

¹⁴ मोडो?होडसो हाइखा बे?लो बे?लो बिस्वास ले:खुबा मे?ना?मिजिनुड

वाडाडपसाजि लिबोगामि ॥ ¹⁵ या?मिजिडे? टुक्खुबा या?मिजि रामराजि लाप्नुड रुडघावनुडनो? युडबे?टुजे ॥ पतरुस मो रामबाड खे?माबे? खोमि लावारे?होडसो टुक्खुबाजिसोवपे? सि?नुड नुबोविमरो लु:नुड

इडो? ले:टुजे ॥ ¹⁶ यरुसलेम इगि?मि?हा सि?इहा सहरबाडसो बे?लो या?मिजि सुप्सामि ॥ माहाजिडे? टुक्खुबाजिनुड मडेहा चाबे? चुप्पा?आजि मोबे? लाजे?टुजि, मोबा माहा चोप नुबोगामि ॥

एप्पा चोडसाजि चुडजाबा?आ

¹⁷ मोबा चोप्पा एप्पा याडाडबानुड सदुकजिमि हुलजिडे? एप्पा चोडसाजि

बे?लो आरिस ले:पोगुजि ॥ ¹⁸ मोबा माहाजिडे? एप्पा चोडसाजि रा:प्नुड

तिरोडगा खिमबे? सेगुजि ॥ ¹⁹ तर सेन्डा परभुमि इक्को थाडसिरिदुत लेन्नुड मो तिरोडगा खिममि रामडेम हेम्बोगु मोबा एप्पा चोडसाजि

पाखे?यु विआप्नुड माहाजि लु:सुजि, ²⁰ “हागो हेनिड निवाहाडमि खिमबे?

खे?नुड या?मिजि चोड जुनिमि खा इ:बे?टानुमे ॥”²¹ मोबा माहा खा
खेम्नुड वगियाराम माविम? नाम के?मा या?लो माहाजि निवाहाडमि
खिमबे? खे?नुड या?मिजि इ:मा तरिगुजि ॥ चोप्पा एप्पा याडाडबानुड
हाइखा यहुदि न्याधिसजिमि सभा सुम्हाम सभा खिमबे? चोप या?मिजि
खा इ:सि? केडुजि ॥ मोबा एप्पा चोडसाजि तिरोडगा खिमबाड
चिआप्टानुमे’ लु:नुड या?मिजि पावसुजि ॥

²² तर येरिडजि तिरोडगा खिमबे? रुवमाबे? एप्पा चोडसाजि

मेन्चुप्पा?आसे? माहाजि टेघे?नुड इडो? लु:सुजि, ²³ “कानिड
तिरोडगाखिमबे? रुवमाबे? नुरो? रम्डेम सेवपा?आ लेटा ॥ मोबा

येरिडजिसो रम्डेम हुडसाड येप्किगामि, तर कानिडे? होडसि?यु
खाडमाबे? सेवपा?आ या?मिजि असासो माडामि ॥”

²⁴ निवाहाडमि खिम हुडघुबाजिमि एप्पानुड एप्पा याडाडबाजिडे? इगो
खा खेप्सुजि ॥ तर इमाड लिबा?आ लु:नुड खोजि खरि मिनामि ॥

²⁵ मोडोवपे?नो? मोबे? इवको या?मि लेन्नुड खोजि इडो? लु:सुजि,

“खेप्सानुमे, हेनिडे? तिरोडगा खिमबे? सेवपा?आ या?मिजि गो

निवाहाडमि खिमबे? येसुमि टुम्बे? इ?मे?निडसिम्मे ॥”²⁶ इघा खा
खेम्नुड निवाहाडमि खिम हुडघुबा येरिडजि एप्पा येरिडनुड हाइखा
येरिडजि एप्पा चोडसाजि रा:प्सि? खडामि ॥ या?मिजिडे? कानिड
रुडगो?वाडे? ए?नेम्मे मि?नुड कि?सिबा?आसे? माहाजिडे? खोजि
इमाडसोड मले:रे? यहुदि न्याधिसजि सुम्हाम सभा खिमबे? चिवचेडुजि

॥²⁷ माहाजिडे? एप्पा चोडसाजि बे?ए यहुदि न्याधिसजिमि सभा सुम्हाम
सभामि पोम्बे? ये:प्मे?टुजि मोबाड चोप्पा एप्पा याडाडबाडे? खोजि

सिप्सुजि, ²⁸ “कानिडे? को इगो येसुमि निडबे? या?मिजि इमाडसोड
 हेनिडे? एड?मे लु:नुड लुबा?आ ने?नेन्डे ? हेनिडे?को यरुसलेमबे?हा
 चोप या?मिजि इ:डाजु ॥ मोबा येसु से?नेबा?आ खामि दोससो कानिडबे?
 टिमा यो?इन्जुए!”

²⁹ तर पतरुसनुड हाइखा एप्पा चोडसाजिडे? खोजि लु:सुजि,
 “कानिडे?को या?मिजिडे? लु:बा?आ खा ने?नि, निवाहाडडे? लु:बा?आ
 खा खेम्मा खे:ये ॥ ³⁰ हेनिडे? काप्सिडबे? किडडिनुड से?नेबा?आ येसु
 कानिडमि टुबालाबाजिमि निवाहाडडे? फेरि हिडबोड्टुए ॥ ³¹ इर्राएलि
 या?मिजि पापबाड निवाहाडबे? टे:आप्नुड आम्लाड चुप्पुजिरो लु:नुड
 निवाहाडडे? येसु हाडबानुड छुटकारा पि:घुबा टोडनुड खोमि चुप्पिडलाम
 युडड्टुए ॥ ³² इगो खामि साविछ कानिडनो? टुन्डिडमा मोबा निवाहाडमि
 खा खेमघुबाजि खोसे? पि:बा?आ पबित्त्य होडनिवाडे?सो साविछ
 पि:मे?निडसिन्डुए ॥

³³ इगो खा खेमनुड यहुदि न्याधिसजि सुम्हाम सभा खिमबे? टुघुबा
 या?मिजि बे?लो सुरकाडमि मोबा एप्पा चोडसाजि से?नेमा मि?टुजि ॥

³⁴ मोडोक्पे? गमलिएल निड ले:?खुबा फरिसि यहुदि न्याधिसजिमि
 सभामि पोम्बे? ये:प्पोगा ॥ खो चोप या?मिजिडे? आदर ले:?पा?आनुड
 यहुदि धारमिक नियम इ:खुबा लेटे ॥ खोसे? सभा खिमबाड एप्पा
 चोडसाजि चाहि इच्छे? पाखे?यु पाक्सुजि ॥ ³⁵ मोबा खोसे? मोबे?हा
 या?मिजि इडो? लु:सुजि, “होड इर्राएलि वावा निसाजि हेनिडे? इघा

या?मिजि इमाड ले:?मा मिइटानुमे ? आडि?यो! ³⁶ या?लोए इक्को खा
थुदास निड ले:?खुबा या?मि बे?ए काडायोडबा रेक्से ॥ तर खो
येरिडजिडे? से?नेसुजि मोबा खोमि चोप चोडसाजिसो माडमि?लिड

मेखडामि ॥ ³⁷ मोबा एक्साड या?मिमि निड ने?मे बेलाबे?, गालिल
ठाउबे?ए यहुदा सो लेस्सा ॥ खोसो बे?लो या?मिजिडे? टिक्सुजि ॥ तर
एडे? एक्साड खोसो येरिडजिडे? से?नेसुजि मोबा खोनुड रम्खुबाजिसो

मेखडामि ॥ ³⁸ मोडोणे? के? हेनिड लु:निम्ने, इघा या?मिजिसो
योडमे?टानुमे ॥ इन्डो?होड इघाजिडे? ले:?पा?आ खा या?मिजिमि

निडाबाड ले:?होड आक्खा चोप खोम्दाडबा मेखेहा ॥ ³⁹ तर इघा
निवाहाडबाडनो? ले:?पा?आहोड हेनिडे? इघा या?मिजि इमाडसो
ले:?हेसानुमिन ॥ हेनिडे? इडो? ले:टानुम्होडसो हेनिडदाड निवाहाडमि
बिरोध ले:?खुबा या?मि लिन्डानिडे ॥

⁴⁰ गमलिएलडे? लु:बा?आडो? यहुदि न्याधिसजि सुम्हाम सभा
खिमबे?हा या?मिजिडे? खेप्सुजि ॥ मोबा माहाजिडे? एप्पा चोडसाजि
होडसि?यु के?नुड कोरराडे? पेगुजि ॥ मोबा 'येसुमि टुम्बे? असासो
ए?इ?मे' लु:नुड आग्या पि:नुड ले:?हाक्सुजि ॥

⁴¹ मोबा एप्पा चोडसाजि न्याधिसजिमि सभाबाड ओम्फि?यु खडामि ॥
मोबा खोजि इडो? कासामि, येसुमि निडबे? दु:ख आडमा योग्यमा
लिटिडमे कासाड' बे?लो साप्थाक्सामि ॥ ⁴² मोबाड एक्साड सानिडनो?
माहाजि निवाहाडमि खिमबे?नुड या?मिजिमि खिम-खिमबे? खे?नुड
येसुनो? छुटकारा पि:घुबा हाडबा लेये लु:नुड सुसमाचार खेम्मे?साड
राप्सामि ॥

6

एच्छ योम्बोक लेः? खुबाजि सेन्बा? आ

¹ मोडोवपे? परभु येसुबे? बिस्वास लेः? खुबाजि बे? लो लिमे? निडसिडामे
 ॥ मोडोवपे? नो? हिब्रु खाप्ला यामुखुबाजिनुड गिरिक खाप्ला
 यामुखुबाजि कुनु? कुन? काबोगामि ॥ इन्डो? होड सानिडनो? चामे खा
 हामाबे? “कानिडमि राडमि? माजिडे? खे? लो मान्चुप्टुजि” ॥ ² मोडोणे?
 एप्पा चोडसाजिडे? चोप हाइखा चोडसाजि के? नुड इडो? लुःसुजि, “होड
 वावानिसाजि, कानिडे? को निवाहाडमि खा इ? मे योम्बोक लेः? पेनुड चामे
 योम्बोकलाम फोसिद्ये? मा फेन्निबा ॥ ³ मोडोणे? हेनिडमि रुम्बे?

आदरनुडमा या? मिजि, पबित्रा होडनिवामि सवित टोकखुबाजिनुड निडा
 दाडबाजि एच्छ या? मिजि सेनानुमे ॥ माहाजिनो? इघा चामे खामि

योम्बोक लेः? मे जिम्मा पिःमा खेम्मे ॥ ⁴ तर कानिड चाहि सानिडनो?
 निवाहाडनुड पारथना लेः? साड खोमि खा या? मिजि खेम्मे? मे योम्बोक
 लेः? मा खेये ॥ ⁵ एप्पा चोडसाजिमि इगो खा चोबे? नेन्जोसुजि ॥ मोबा

माहाजिडे? येसुबे? बिस्वास लेः? खुबा, पबित्रा होडनिडाडे? टिप्खेपा? आ

स्तिफनस, फिलिप, परखरस, निकनोर, तिमोन, परमिनसनुड
 एन्टिओकमि यहुदि धरम लाबा? आ हाइको जातिमि निकोलाउस सो

सेनुजि ॥ ⁶ खोजिडे? सेन्बा? आ माहा या? मिजि एप्पा चोडसाजिबे?
 चिक्चेडुजि ॥ मोबा एप्पा चोडसाजिडे? खोजि सोवपे? हुक युडनुड
 निवाहाडबाड आसिस चुप्टुमिरो लुःनुड पारथना लेः? पे? टुजि ॥

7 निवाहाडमि बचन चोप ठाउराजि मुखडा ॥ मोबा परभु येसुबे?
बिस्वास ले:१खुबाजि यरुसलेमबे? झना बे?लो बे?लो लिसामि ॥ मोबा
बे?लो याडाडबाजिडे?सो परभु येसुमि निडबे? बिस्वास ले:टुजि ॥

स्तिफनस रा:१पा१आ

8 मोबा स्तिफनसडे? निवाहाडबाड बे?लो आसिसनुड सक्ति चुप्नुड
या?मिजिमि रुम्बे? खरिहा चिडगानुड योम्बोक ले:टु ॥ 9 तर आढा
या?मिजिडे? खोमि बिरोध ले:१पोगुजि ॥ माहाजि यहुदि न्याधिसजि
सुम्हाम खिमबे?हा 'स्वतन्तर हुलबे?हा या?मिजि ले?टामे' माहाजि
अलेवजेन्ड्रिया सहरनुड किलिकिया, कुरेनि एसिया छेत्राबाड लेम्बा?आ
यहुदिजि ले:टामे ॥ माहाजि चोप इक्को लिनुड स्तिफनसमि टुम्बे?
माडे?मा निडा खिबोगामि ॥ 10 तर पबित्य होडनिडामि सक्तिबाड
स्तिफनस यामुबा?आसे? माहाजिडे? खो इमाडसो मलु:हेसुजि ॥

11 मोबा माहाजिडे? खुस्त्रिडमु या?मिजि इडो? लु:नुड रेम्दे?मे?टुजि,
“कानिडेको इगोसे? मोसानुड निवाहाडमि बिरोधबे? खा इ:बा?आ
खेप्सुडमा ॥”

12 इडो? माहाजिडे? हाइखा चोप या?मिजिनुड यहुदि न्याधिसजिमि सभा
सुम्हाम बे?ए सभा खिमबे?हा एप्पाजि, मोबा यहुदि धारमिक नियम
इ:१खुबाजि खा ओविटसुजि ॥ मोबा माहाजिडे? यहुदि न्याधिसजिमि सभा
सुम्हाम खिमबे? स्तिफनस रा:प्वेडुजि ॥ 13 मोबा माहाजिडे? स्तिफनसमि
टुम्बे?हा खा रेम्दे?खुबा या?मिजि पोम्बे? चिक्वेडुजि ॥ मोबा माहा

या?मिजिडे? इडो? लु:सुजि, “इगो या?मिडे?को निवाहाडमि खिमनुड
 मोसाडे? पि:बा?आ नियममि बिरोध ले:पा?आ खेमड्टुडमे ॥ ¹⁴ मोबा
 इगोसे? इडो?सो लु:बा?आ खेमड्टुडमे, ‘नासरतमि येसुडे? इगो
 निवाहाडमि खिम योबेन्डुरो, मोसाडे? कानिड पि:बा?आ नियमसो
 फेडइन्डुरो ॥ इडो?हा खा इ:बा?आ कानिडे? खेमड्टुडमे ॥”

¹⁵ मोडोवपे? यहुदि न्याधिसजिमि सभा सुम्हाम बे?ए खिमबे? सुम्बा?आ
 चोबे? स्तिफनस नुरो? खाडमाबे? खोमि नजिक गो थाडसिरिदुतमिन्डो?
 उज्यालो खाडडोवटुजि ॥

7

स्तिफनसमि लाम्बवा

¹ मोबा चोप्पा एप्पा याडाडबाडे? स्तिफसन सिप्सु, “इमा इघाजिडे?
 हेडबे? टिबा?आ दोस चैबानो?माडे ?” ² मोबा स्तिफनसडे? माहाजि
 लु:सुजि, “होउ, वावानिसानुड पाबाजि केहा खा खेप्सानुमे ॥ कानिडमि
 टुबा अब्राहाम हारान लु:मे ठाउबे? खे?मा या?लो खो मेसोपोटामियाबे?
 पेम्माबे? चोपबाड बे?ए निवाहाडडे? सेन्जिसेम्माड पि:सु ॥ ³ निवाहाडडे?
 अब्राहाम इडो? लु:सु, ‘इगो देसनुड हेनेहा टाडबाडजि या:यानुड के?
 लु:बा?आ देसबे? हेड खडे ॥’

⁴ मोबा अब्राहाम कल्दिजिमि देसबाड हारानबे? खे?नुड मोबे? पेना ॥
 मोबे? खोमि पाबा सिघडेबाड निवाहाडडे? खो आयु हेनिड पेम्बा?आ इगो

देसबे? चिव्तेडु ॥ ⁵ मोडोक्पे? निवाहाडडे? अब्राहाम इगो देसबे?
सराडफेवमा डोवमा ठाउसोड मेम्पिःसु ॥ तर निवाहाडडे? इगो देस हेनेहा
पसायाडमेनजि पिःनुडहाजि लुःनुड हेञ्जुरुड हेनु ॥ इगो हेञ्जुरुड हेम्माबे?

अब्राहाममि पसाजिनो? माडामि ॥ ⁶ निवाहाडडे? अब्राहाम इडो? लुःसु,
'हेनेहा पसाजि हाइखाजिमि देसबे? खे?नुड पेडइम्मे ॥ मोबे?हा

या?मिजिडे? खोजि रिबोड सय निडठोक बे?लो चुडजोन्डुजे ॥ ⁷ तर
असे? माहाजि कमार टोडइन्डुजे माहा या?मिजि के? दन्डा पिःनुडहाजि
॥ मोबा एक्साड मो देसबाड माहाजि इगो देसबे? लेन्नुड केए योम्बोक

लेन्डुजेनुड का ओहाड लेम्मे^k ॥ ⁸ मोबा निवाहाडडे? अब्राहामनुड
हेञ्जुरुड हेन्बा?आ खा निडाबे? युक्सुमियो लुःनुड खतना ले?मे आग्या
पिःसुजि ॥ अब्राहामडे? खोम पसा इसहाक टोक्पा?आ आविच याक
लिःमाबे? खतना लेः?पे?टु ॥ मोडो?नो? इसहाकडे? याकुबमि मोबा
याकुबडे? खोमि बारो वाडाडपसाजिमिसो खतना लेः?पे?टुजि ॥

मोहाजिनो? कानिडमि बारो कुलमि टुबालाबाजि लिसामि ॥ ⁹ याकुबमि
पसा योसेफ खोम वावाजिडे? बे?लो चेजेवा सि?चोसुजे ॥ खोम वावाजिडे?
योसेफ मिर्रा देसबे?हा बेपारि या?मिजिनुड इन्जोसुजि ॥ तर निवाहाड

खोनुड टुसे ॥ ¹⁰ निवाहाडडे? खोमि चोप खेबाड छुटबा लेःटु ॥ इन्डोक्पे?

योसेफ मिर्रा देसबि?ए हाडबाबे? लेन्डा, मोडोक्पे? निवाहाडडे? खो
वेन्दुबा निडा पिःसु ॥ मोडोणे? फारोडे? खो मिर्रा देसबि?ए बे?ए हाकिम
टोक्सु ॥ मो याकबाड योसेफ हाडखिमबे?ए एप्पा हाकिम लिसा ॥

¹¹ मोबा एक्साड मिर्रा देसनुड कनान देसबे? बे?ए सा?आडसा लेन्डा
॥ मोडोणे? चोप या?मिजि सावमेन्जा सि?पा?आसे? कानिडमि टुबा

लाबाजिडे? अन्न हाम्बे?सो मेन्चुट्टुजि ॥ ¹² मोबा याकुबडे? मिर्राबे?
अन्न टुहा लु:मे खा खेम्नुड बेसा खिसि? खोमि पसाजि या?लोएखे?

पाडहाक्सुजि ॥ ¹³ फेरि एक्साडएखे?सो अन्न इन्सि? खे?माबे? योसेफमि
वावानिसाजिनुड का योसेफ लेडे लु:नुड लु:सुजि ॥ मोडोक्पे?नो?

हाडबाडे?सो योसेफमि वावाजिनुड निसा लेसुजि ॥ ¹⁴ मोबा योसेफडे?
खोमि पाबा याकुबनुड चोप जहानजि मिर्राबे? आबानिडे लु:नुड केडुजि

॥ माहाजि चोप पचहत्तर जना टुसामे ॥ ¹⁵ मोबा याकुब मिर्राबे? खडा ॥
एक्साड याकुबनुड कानिडहा बारो टुबालाबाजि मोबे?नो? सिघडामि ॥

¹⁶ मोबा खोजिमि सिगिरिक सेकेम लु:मे ठाउबे? लाघे?नुड अब्राहामडे?
हमोरमि पसाजिबाड ये:माघामि लागि इम्बा?आ रोपाबे? माहाजि हुप्सुजि
॥

¹⁷ मोबा “निवाहाडडे? अब्राहामनुड हेन्जुरुड हेन्बा?आ खा पुरा लिसि?
पोरोक्पा?आ ले:टे ॥ मोडोक्पे? मिर्राबे? इर्राएलिजि बे?लो लिबेबा?आ

ले:टामि ॥ ¹⁸ मोबा बे?लो निड एक्साड मिर्रा देसबे? हाडको या?मि

हाडबा लिनुड मिर्राबे? राज्य ले:पोनु ॥ मोसे? योसेफ मेलेसुए ॥ ¹⁹ मो
हाडबे? कानिडमि टुबालाबा इर्राएलिजि बे?लो चुडजोसुजि ॥ मोसे?
माहाजिमि ओडेकजि सिमिरो लु:नुड ये?ये? खिमबाड पाखे?यु
राप्पेमे?टुजे ॥

²⁰ “मोडोक्पे?नो? मोसा टोणा ॥ खो निवाहाडडे? नेन्जाबा?आ ओडेक
लेटा ॥ खोम्बानुड खोम्माडे? सुम महिनाडो? खिमबे?नो? चुम्नुड

कुसाजु ॥ ²¹ तर एक्साड खोजिडे? मेन्चुम्हेबा?आसे? मोसा खिमबाड
पाखे?यु युडमाबे? फारोमि हाडमापसाडे? चुप्नुड खोमि पसा टोडनुड

कुःसु ॥ ²² इडो? मोसाडे? मिरि या?मिजिमि टुम्बे?हा खा नुरो?
ने?टोक्टु ॥ मोबा खो चोप खाबे?नुड योम्बोक ले?लेखुबा लिसा ॥

²³ मोसा रिबोड निड रुवमाबे? खोमि इर्राएलि टाडबाडजि चुप्पा मि?टु

॥ ²⁴ मोबा इक्को मिर्रामि या?मिडे? इर्राएलि या?मि
मोःक्मे?निडसिबा?आ मोसाडे? खाडडोक्टु ॥ मोबा मो इर्राएलि चाहि

जोगबा लेःटु तर मो मिर्री चाहि मोसाडे? से?नेसु ॥ ²⁵ निवाहाडडे?
मोसाबाड इर्राएलि या?मिजि छुटकारा पिःनुजे लुःनुड खोजिडे?
लेसुमियो लुःनुड मि?पा?आ लेःटे ॥ तर माहाजिडे? मो खा मेलेसुजि ॥

²⁶ मोबा वगियाराम निप्पाड इर्राएलिजिनो? टाडबा टाडबा

काक्मे?निडसिबा?आ मोसाडे? खाडडोक्टु लुःसुजि, 'होउ लाडगामजि,
हेन्जिड गो सानुडउजिगोरे! इन्ढोड काइन्जे ?'

²⁷ "तर मो हेला लेः?खुबा इर्राएलिडे? मोसा चोक्साड लुःसु, 'हेड

असे?टे कानिडमि खा टोडखुबा टोक्से ? ²⁸ हेने? असे?डा मो मिरि

या?मि से?नेबा?आडो? कासोड से?नेमा योइये ? ॥' ²⁹ इगो खा खेम्नुड
मोसा किरिसमे? मिर्रा देसबाड विः?खे?नुड मिद्यान लुःमे देसबे?
पेम्बोगा ॥ मोबे? खोसे? फुडसया लेःटु मोबा निप्पाड पसाजिसो लिसामि ॥

³⁰ "रिक्पोड निड एक्साड सिनै लुःमे सुम्लाखामि रेक्वेवमा ठाउबे? मि
हाडमे?निडसिबा?आ पोथराबे? थाडसिरिदुत मोसानुड खाडमुसा ॥

³¹ इडो?मा खाडनुड मोसा खरि मिन्नुड इगो इमाडडे लुःनुड मोमि

केक्पे? खे?माबे? खोसे? परभुमि सेम्ला खेप्सु ॥ ³² 'का हेनेहा टुबालाबा

अब्राहाम, इसहाकनुड, याकुबमि निवाहाड लेडे' ॥ मो खेमनुड मोसा कि?सिमे? योडबुगा मोबा खोसे? खाडसो मडखाडहेसु ॥

³³ “मोबा परभुडे? मोसा लु:सु, 'हेनेए राडसुप हेने, इन्डो?होड हेड

ये:प्पा?आ ठाउ पबित्या ले:ये ॥ ³⁴ केए या?मिजिडे? मिर्या देसबे? आड?बा?आ खे के? खाडइटुडे ॥ मोबा खोजि हा:प्साड का के?पा?आसो के? खेमइटुडे ॥ मोडोणे? मिर्यजिमि देसबाड खोजि छुटकारा पि:मामि का उडइटिडे ॥ हागो आबे के? हेड मिर्यादेसबे? मो योम्बोक ले:सि? पाडइन्ने' ॥

³⁵ “इगो मोसानो? खोम जाति इर्याएलिजि 'हेड कानिडमि हाडबानुड खा टोडबे?खुबा असे?टे टोक्सुए लु:बा?आ लेटे ॥' खोनुडनो? निवाहाड हाडमे?निडसिबा?आ पोथराबे? थाडसिरिदुतबाड यामुसा मोबा मिर्याबाड इर्याएलिजि छुटकारा पि:घुबा टोडनुड पाक्सु ॥ ³⁶ मोसाडे?नो?

इर्याएलिजि मिर्या देसबाड चिआप्टुजि ॥ मोबा मिर्या देसबे?, हररामा लु:मे माहोडमाबे?नुड रिक्बोड निडलो, रेक्रेवमा ठाउबे? निवाहाडमि खरिहा योम्बोक ले:टु ॥

³⁷ “इगो मोसाडे?नो? इर्याएलिजि इडो? लु:बा?आ ले:टे, 'निवाहाडडे? हेनिडमि रुम्बाड काडो?मा अगमबक्ता इक्को या?मि पाडबेये ॥' ³⁸ मोसा इर्याएलिजि रेक्रेवमा ठाउबे? सुम्माबे? माहाजिनुड टुसे ॥ खोनुड सिनै लु:मे सुम्लाखाबे? यामुखुबा थाडसिरिदुत टुसेनुड मो थाडसिरिदुत कानिडमि टुबालाबाजिनुड यामुबा?आ ले:टे ॥ मो मोसाबाडनो? कानिड हिडरिक बचन पि:बा?आ ले:टे ॥

³⁹ “तर कानिडमि टुबालाबाजिडे? मोसामि खा मेडखेप्सुजि ॥ खोसे?

लुःबा?आडो? मेलैःटुजि ॥ खोजिडे? मोसानो? याः?यानुड मिर्या देसनो?

टेःघे?मा योगामि ॥ ⁴⁰ मोबा माहाजिडे? मोसामि वावा हारुन इडो?

लुःसुजि, 'कानिड पोम्बे? चिक्खे?खुबा चापिजि कानिड टोडबे?नुड इगोबा

पोम्बे? लाघे?मा ॥ मिर्याबाड कानिड चिआप्खुबा मोसा इमाड पि?खडे,

हाम्बे? खडे कानिडे? लेसुडमानि ॥' ⁴¹ मोडोणे? माहाजिडे? इक्को पिक

पसामि मुरति टोडनुड मोमि पोम्बे? भोग पिःसुजि ॥ खोजि टाडबे?

टोडबा?आ मुरति पुजा लेः?नुड सप्थाक्सामि ॥

⁴² मोडोणे? निवाहाडडे? इर्याएलि या?मिजि ले?पेसुजि ॥ खोजि

नान्द्रुडमाबे?हा नाम, साडगेजिनुड ला पुजा लेः?मिरो लुःनुड माहाजि

याः?योसुजि ॥ इगो खामि टुम्बे? अगमबवताजिमि साप्चिराबे? इडो?

साप्पा?आ लेःये ॥

होउ इर्याएलिजि, हेनिडे? रेक्खेवमा ठाउबे? रिबोड निडलो भोग पिःसानुम तर माहा

चोप काडमि लागि मेलैःटा ॥

⁴³ तर हेनिडे? गो मोलेक लुःमे चापमि तम्बुनुड रेफान लुःमे चापमि मुरति साडगे

चापमि मुरति मोबा हेनिड टाडबे?नो? टोडनुड पुजा लेःटानुम ॥

मोडोणे? के? हेनिड दण्डा पिःमामि बेबिलोनबाडसो मेएरेड पाडइनिम्ने ॥'

⁴⁴ "माहाजि रेक्खेवमा ठाउबे? टुमाबे? कानिडमि टुबाजिनुड निवाहाड

खाडमुहाम तम्बु टुसे ||b00259c.tif|col|||तम्बु|7:44|| निवाहाडडे?

मोसा लुःडिडो?मानो? खोसे? मो पाल टोडबा?आ लेटे ॥ ⁴⁵ निवाहाडमि

सवितडे? यहोसुडे? इगो देसबे?हा या?मिजि हेजानुड इगो पबित्रा

तम्बुसोड खोजिनुडनो? लाजे?टुजि ॥ मोबा हाडबा दाउदमि मो तम्बु

खोजिनुडनो? टुसे ॥ ⁴⁶ हाडबा दाउदडे? निवाहाडबाड नामनावा
 टोवपा?आसे? कानिडमि पुर्खा याकुबमि निवाहाडमि लागि 'इक्को खिम
 टोडडोवमा' लु:नुड बिन्ति ले:टु ॥ ⁴⁷ एक्साड खोमि पसा हाडबा
 सुलेमानडे? निवाहाडमि खिम टोवसु ॥ ⁴⁸ "तर महान निवाहाडगो
 या?मिजिडे? टोडबा?आ खिमबे? पेन्निबा ॥ लु:नुड अगमबवताडे? इडो?
 साप्पा?आ ले:ये-

⁴⁹ 'निवाहाडडे? लु:सु, "थाडसिरि केए हाड पेन्ढाम मोबा मावखामडेम केए सयड
 युडढाम ले:ये ॥

मोबा हेनिडे? इन्डो?मा खिमडे केए लागि टोडइन्डानुमे ?

केए पेन्ढाम हाम्बे?टे टोडइन्डानुम ?

⁵⁰ थाडसिरिबे?हानुड इगो मवखामडेमबे?हा चोप थोक गो के?नो?

टोडबा?आ ने?नेन्डे ^m ?'

⁵¹ "होउ अटेरि या?मिजि हेनिडहा निडा रुडगो?वाडो?नो? छा?ए मोबा
 निवाहाडमि खा खेम्मा मि?टानुमि ॥ हेनिड सानिडनो? आमिनिमि

टुबालाबाजिडो? पबित्रा होडनिवामि बिरोध लेन्डानुम ॥ ⁵² हेनिडमि
 टुबालाबाजिडे? अगमबवताजि चोपनो? चुडजोसुजि ॥ निवाहाडडे?
 पाडबा?आ धारमिक या?मिमि टुम्बे? इ:घुबाजिसोड माहाजिडे? से?नेसुजि

॥ हागो हेनिडे? चाहि मो धारमिक या?मि, छुटकारा पि:घुबा हाडबा

खिरिस्टनो? से?नेसानुम ॥ ⁵³ हेनिडे? निवाहाडमि नियममि खागो
 थाडसिरिदुतजिबाड चुप्टानुम तर हेनिडे? मो खा पालना मेले:टानुम ॥"

स्तिफनस रुडगो?वाडे? ए?नेबा?आ

⁵⁴ स्तिफनसमि इडो?मा खा खेमनुड सभाबे? टुघुबा या?मिजि बे?लोनो?

सुरके?पा?आसे? केड यि:वपोगामि ॥ ⁵⁵ तर स्तिफनस चाहि पबित्या
होडनिवामि सवित चुप्नुड थाडसिरि?टु खाडमाबे? निवाहाडमि महिमा

खाडडोक्टु मोबा चुप्थिडलाम येसु ये:प्पा?आ खाडडोक्टु ॥ ⁵⁶ मोबा खोसे?

इडो? लु:सु, “खावसानुमे, के? थाडसिरि हेम्बुवपा?आनुड या?मिमि पसा
येसु निवाहाडमि चुप्थिडलाम ये:प्पा?आ खाडमे?निडसिनुडे ॥”

⁵⁷ मोडोक्पे?नो? माहाजि बे?लो वोसाड खोजिमि नेएक हुणे? टेगुजि मोबा

चोप स्तिफनसबे? पेडिखडामि ॥ ⁵⁸ मोबा माहाजिडे? स्तिफनस
रुडगो?वाडे? ए?नेमामि सहरबाड पाखे?यु पेरसे?वा से?खे?टुजि ॥ मोबा
साविछ पि:घुबाजिडे? खोजिमि चे? सावल लु:मे वेन्जा या?मिमि सराड
केवपे? युडआनुड स्तिफनस रुडगो?वाडे? ए?पोगुजि ॥

⁵⁹ माहाजिडे? रुडगो?वाडे? फेडमे?निडसिमाबे? स्तिफनसडे? परभुनुड

इडो? लु:सु, “हे परभु येसु, केए सो:वमा हेने? लाघे?टे ॥” ⁶⁰ मोबा खो

टुम्रुणे? ठो:वनुड बे?ए सेम्लाडे? इडो? वोसा, “हे परभु, इघाजिडे?

ले:पा?आ पापमि दण्ड इघाजिबे? मेसि?लो!” खो इडो? कासाड खोमि
सो:वमा खडा ॥

8

सावलडे? सेवा खिमबे?हाजि चुडजाबा?आ

¹⁻² मोबा खोमि सिगुयाक खोमि बिस्वासि लाडगामजिडे? लाघे?नुड

येः?माबे? युडआनुड खोजि सारोनो? हाःबामि ॥ इडो? स्तिफनस
से?माबे? साउलसो मोबे? टुसे ॥ मो याकबाड यरुसलेमबे?हा सेवा
खिमबे? सारोनो? चुडजोबोगुजि ॥ मोबा एप्पा चोडसाजिबाड हाइखाजि
येसुबे? बिस्वास लेः?खुबाजि चोप यहुदिया लुःमे ठाउनुड सामारिया

ठाउराजि टुप्खडामि ॥ ³ तर सावलडे? सेवा खिमबे?हा या?मिजि नासि
लेः?मे?निडसिडुए ॥ खोसे? खिम खिमबे? खे?नुड येसुबे? बिस्वास

लेः?खुबाजि वडाडपसा, मे?ना?मिजि राःप्नुड बैरे से?खे?नुड तिरोडगा
खिमबे? सेगुजि ॥

सामरिया ठाउबे? फिलिपडे? सुसमाचार खेम्मे?पा?आ

⁴ यरुसलेमबाड फावखे?पा?आ येसुबे? बिस्वास लेः?खुबाजि हाम्बे?

हाम्बे? रुवटुजि माहा चोप ठाउराजि सुसमाचार खेम्मे?टुजि ॥ ⁵ फिलिप
चाहि सामरिया सहरबे? खे?नुड मोबे?हा या?मिजि छुटकारा पिःघुबा

हाडबा खिरिस्टमि टुम्बे? खेम्मे?टुजि ॥ ⁶ फिलिपडे? लुःबा?आ खा

खेम्नुड, मोबा खोसे? लेः?पा?आ खरिहा योम्बोक खाडनुड माहा

या?मिजिडे? निडा टिनुड खोमि खा नुरो? खेप्सुजि ॥ ⁷ मोबे? बे?लो
या?मिजिबाड मडेहा चापजि वोसाड खडामि मोबा बे?लो सोगुबाजिनुड

एवलोडग्यजिसो नुबोगुजि ॥ ⁸ मोडोणे? सामारिया सहरबे?हा या?मिजि
बे?लो साप्थाक्सामि ॥

⁹ मो सहरबे? सिमोन लुःमे इक्को चाटक लेः?खुबा टुसे ॥ खोसे?
सामरियाबे?हा या?मिजिमि पोम्बे? खरिहा योम्बोक लेः?नुड माहाजि खरि

टोडबा?आ लेटा ॥ मोसे? खोम टाडबा बे?एम्मा या?मि कासे ॥ ¹⁰ मो

सामरिया सहरबे? पेडघुबा एद्रिहानुड बे?हाजि चोबे? खेप्सुजे, “मोनुड
निवाहाडमि बे?ए सवित टुये’ लु:नुड माहाजिडे? मि?टुजे ॥ ¹¹ मो
या?मिडे? बे?लो निड या?लोएबाड खोमि खरिहा योम्बोकडे?

ले:पा?आसे? खोजिडे? मोमि खा खेप्सुजे ॥ ¹² तर माहा या?मिजि
फिलिपडे? निवाहाडमि राज्यबे? येसुनो? खिरिस्ट लेये लु:नुड सुसमाचार
इ:बे?टुजि ॥ मोबा बे?लो या?मिजिडे? येसुबे? बिस्वास ले:टुजि ॥ मोबा
बे?लो वडाडपसानुड मे?ना?मिजिडे? बप्तिस्मा लासुजि ॥

¹³ सिमोनडे?सो येसुबे? बिस्वास ले:नुड बप्तिस्मा लासु ॥ मोबा खो
फिलिपनुडनो? सोरि रम्बुगा ॥ फिलिपडे? ले:पा?आ खरिहा
योम्बोकनुड चिडगा खाडनुड खो खरि मिना ॥

¹⁴ सामरियामि या?मिजिडे? निवाहाडमि टुम्बे?हा खाबे? बिस्वास
ले:टुजि लु:मे खा खेम्नुड यरुसलेमबे? टुघुबा एप्पा चोडसाजिडे?

पत्रुसनुड युहन्ना मोबे? पाक्सुजि ॥ ¹⁵ मोबा सामारियाबे? खोजि रुक्नुड
येसुबे? बिस्वास ले:खुबाजिडे? पबित्रा होडनिडा चुप्टुमिरो लु:नुड

पारथना ले:पे?टुजि ॥ ¹⁶ इन्डो?होड मोडोक्लो माहाजिबे? पबित्रा
होडनिडा मेलेम्बा?आ लेटे ॥ माहाजिडे? परभु येसुमि निडबे? बप्तिस्मारे?

लाबा?आ ले:टामे ॥ ¹⁷ मोबा पत्रुसनुड युहन्नाडे? येसुबे? बिस्वास
ले:खुबाजिसोक्पे? खोजिमि हुक युडमाबे? माहाजिडे? पबित्रा होडनिडा
चुप्टुजि ॥

¹⁸ मो एप्पा चोडसाजिडे? खोजिमि हुक या?मिजिबे? युडमाबे? पबित्रा
होडनिडा चुप्मियेले मि?नुड सिमोनडे? माहा एप्पा चोडसाजि याड

पि:साड लु:सु, ¹⁹ “कासोड इडोवमा सवित पि:मान, मोबा के?

असाबे?होडसो हुक युडमाबे? मो या?मिडे? पबित्रा होडनिडा चुप्टुरो ॥”

²⁰ तर पत्रुसडे? मो लु:सु, “हेनेहा याड हेडनुडनो? नासिलिरो ॥

इन्डो?होड हेने?को निवाहाडमि वरदानसो, याडे?नो? इडहेन्डुए मि?टु ॥

²¹ हेने? इगो योम्बोक ले:?टोक्टुनिबा ॥ इगो योम्बोकपे? हेनेहा भागसो मा:ये इन्डो?होड हेनेए निडानो? निवाहाडमि पोम्बे? नुबा ले:?निबा ॥

²² मोडोणे? हेने मि?पा?आ मडेहा खामि लागि निवाहाडबे? टेनुड परभुमि पोम्बे? खडे ॥ न निवाहाडडे? हेड आम्लाड पि:येन्डे ? ²³ इन्डो?होड हेनेए निडा इ?ठुप चेजेवा खिन्डुहा मोबा हागोरोसो हेड इ?ठुप पापरे?नो? टु:ये लेए ॥

²⁴ इघा खा खेम्नुड सिमोनडे? पत्रुसनुड युहन्ना लु:सु, “हेने? लु:बा?आ चोप खा काबे? ए?सि?लो लु:नुड हेनिडे? केए लागि परभुनुड बिन्ति ले:?पे?माजे ॥”

²⁵ मोबा साविछनुड परभुमि खा खेम्मे?से?नुड युहन्नानुड पत्रुस यरुसलेम टेसाजि ॥ खोजि टेमाबे? सामरियामि खिमडेम्राजि सुसमाचार खेम्मे?टुजि ॥

फिलिपनुड इथियोपियामि मेस्रेवा

²⁶ मोबा एक्साड थाडसिरिदुतडे? फिलिप लु:सु, “येपोक्नुड लाडगेतलाम खे?नुड यरुसलेमबाड गाजा लु:मे ठाडलाम खे?ठाम माराम रेक्रेवमा

ठाडबे? सि?इये मो मारामबे? खडे ॥” ²⁷ मोबा फिलिप मोबे? खे?माबे? खोसे? इथोपियाबि?ए इक्को मेस्रेवा या?मि चुप्टु ॥ खो मो देसबे?ए कन्दाकि लु:मे हाडमामि याडमि हिसाब युडखुबा एप्पा लेटे ॥ खो

यरुसलेमबे? निवाहाडमि ओहाड ले:?सि? खे?पा?आ ले:टा ॥ ²⁸ खो

टेमाबे? रथबे? पेन्नुड अगमबक्ता यसैयाडे? साप्पा?आ ने?चिरा

ने?मे?निडसिडा ॥ ²⁹ पबित्ता ह्योडनिडाडे? फिलिप लु:सु, “मो रथमि केवपे? खडे ॥”

³⁰ मोबा फिलिप पिडसाड रथमि केवपे? खे?नुड मो या?मिडे? यसैया अगमबक्तामि ने?चिरा ने?टिडबा?आ खेप्सु ॥ मोबा फिलिपडे? मो सिप्सु, “ह्योड वावा, इगो हेने? ने?पा?आ खा लेहेन्दुहाडे ?”

³¹ मोबा मो या?मिडे? लु:सु, “का हाइखाजिडे? नुरो? मेड:बे?माहोड गो इन्डोवटे के? लेमे ?” मोबा मोसे? फिलिप रथबे? के?नुड सोरि पेम्मे?टु ॥

³² मो मेस्रेवाडे? ने?पा?आ धारमिक साप्चिरामि भाग इगो लेटे-

“खो गो से?सि? लाये?पा?आ सामुडो? लेटा ॥ खो उनि खो:माबे? योड उ:वनुड ये:प्खुबा सामुडो? इमाड मेकारे? पेना ॥

³³ मोबा खो चुरोवनो? हेलानुड अन्याय ले:टुजि ॥

असे? खोमि पुस्तामि टुम्बे? इ:हेन्दुजे ? असे?सो इ:हेसुसिनिबा ॥

इन्डो?होड खो इगो मक्खामडेमबाड सन्तान लिमा या?लोनो? से?नेसुजिⁿ ॥”

³⁴ मोबा मो मेस्रेवाडे? फिलिप सिप्सु, “का इ:बे?माना, इगो

अगमबक्ताडे? असामि टुम्बे? लु:बा?आडे ? खोम टाडबामि टुम्बे?टे ?

हाइखा या?मिमि टुम्बे? लु:बा?आ ?” ³⁵ मोबा फिलिपडे? धारमिक साप्चिरामि इगो भागाबाडनो? येसुबाड छुटकारा टो?इये लु:नुड सुसमाचार नुरो? खेम्मे?टु ॥

³⁶ मोबा खोजि मो मारामबे? रामसाड खे?माबे? योडा टुढामबे? रुवटाजु
 ॥ मोबा मो मेरे?वाडे? फिलिप सिप्सु, “खाकसे इगोबे? योडा टुउ हागो
 का बप्तिस्मा लामाबाड असे? सेवहेम्मे ?” ³⁷ [फिलिपडे? मो लु:सु, “हेनेए
 निडाडे? येसुबे? बिस्वास लेटुहोड बप्तिस्मा लाहेण्डुए ॥” मो मेरे?वाडे?
 लु:सु, “येसु खिरिस्ट निवाहाडमि पसा लेये लु:नुड के? बिस्वास ले:पेटुडे
 ॥”] ³⁸ मोबा मो रथ ना:नुड खोजि मिम्मु योडा टुढामबे? खे?नुड
 फिलिपडे? मो या?मि बप्तिस्मा पि:सु ॥ ³⁹ मोजि योडाबाड पाखे?यु
 आबाजि मोबा, परभुमि पबित्रा होडनिडाडे? फिलिप रा:पखे?टु, मोबा मो
 मेरे?वाडे? फिलिप मेडखाडडोवटु, तर खो साप्थाकसाड खोमि राम
 खडा ॥ ⁴⁰ तर फिलिप अस्टोद लु:मे ठाउबे? खाडमुसा ॥ मोबाड खोसे?
 कैसरिया लु:मे सहर मेरुवटुरो सहर सहरराजि सुसमाचार खेम्मे?साड
 खडा ॥

9

दमस्कसमि रामबे? सावलडे? येसु चुप्पा?आ

¹⁻² तर सावलडे? परभुमि चोड्साजि चोप से?नेनुडहाजि लु:नुड
 किरिसमा उवमे?साड रामडुसे ॥ मोबा खो चोप्पा एप्पा याडाडबाबे?
 खे?नुड दमस्कस लु:मे ठाउमि यहुदिजि सुम्हाम खिमबे? टुघुबा चोप
 एप्पाजि केए टुम्बे? इवको पत्रा साप्पे?मा लु:नुड बिन्ति ले:टु ॥ परभुमि
 राम टिडखुबा मे?ना?मि, वाडाडपसा रा:णुड यरुसलेमबे? लाजे?नुड
 सजाय पि:मे अधिकार डागु ॥ ³ मोबा सावल दमस्कस सहरमि केवपे?

खे?मे?निडसिमाबे? हाक्चोक्टो? नान्द्रुडमाबाड पो?इये उज्यालो खोमि
कि?यु मि?यु पोगा ॥ ⁴ मोबा खो भुइबे? यिप्किटो? कक्सा मोडोक्पे?
इडो? काबा?आ खेप्सु, “सावल! सावल! हेने? का इन्ढोड चुडजाडे ?”

⁵ सावलडे? सिप्सु, “हे परभु, हेड असाडे ?” फेरि खोसे? लु:सु ॥ “का
हेने? चुडजाडिडबा?आ येसु लेडे ॥ ⁶ हागो हेड येपोक्नुड सहरबे? खडे,
मोबे? हेने? इमाड ले:मा खे:ये मो के? हेड लु:न्ने ॥”

⁷ सावलनुड टुघुबा या?मिजिडे? मोडोक काबा?आ खेप्सुजि, तर असासो
मेडखाडडोक्टुजि ॥ मोडोणे? माहाजि या मे?निड लिसामि ॥ ⁸ सावल
येपोगा, तर खाडमायोक्माबे? इमाडसो मेडखाडहेसु ॥ मोडोणे? खोमि
लाडगामजिडे? खो हुक्पे? य:प्नुड दमस्कसबे? वि?खे?टुजि ॥ ⁹ मोबे?
रुक्नुड सुम याक्टोक खोमि मिणे? इमाडसो मेडखाडहेसु मोबा इमाडसो
मेन्चोसु, मेउक्सु ॥

¹⁰ दमस्कसबे? परभुमि चोडसा हननिया लु:मे इक्को या?मि टुसे ॥ मो
सेन्जि?माडबे? परभुडे? इडो? लु:बा?आ खेप्सु, “होउ हननिया!”
हननियाडे? लु:सु, “हे परभु, लु:डे!”

¹¹ परभुडे? खो लु:सु, “सिधा राम लु:मे रामबे? यहुदा मि खिमबे? खडे ॥
मोबे? टारसस लु:मे ठाउबाड लेम्बा?आ सावल निड ले:खुबा या?मि योगे
॥ मोबे? खो पारथना ले:मे?निडसिये ॥ ¹² खोसे? सेन्जि?माडबे?
हननिया लेन्नुड पावलमि मिक ए:लो लु:नुड खोमि निन्डावाबे? हुक
युडबा?आ मा?इटुए ॥”

¹³ हननियाडे? लु:सु, “हे परभु, मोसे?को यरुसलेमबे? टुघुबा बिस्वासिजि सारोनो? चुडजोन्डुए लु:बा?आ के? बे?लो या?मिजिबाड खेम्डुडे ॥ ¹⁴ हेनेहा निडबे? बिस्वास ले:खुबा या?मिजि रा:प्मामि एप्पा याडाडबाजिबाड अधिकार टोकनुड खो इगोबे? लेडइटे ॥”

¹⁵ तर परभुडे? हननिया लु:सु, “हेड खे?मा खे:ये इन्डो?होड मो या?मिडे?नो? हाइखा जातिहा या?मिजि, मोबा हाडबाजिनुड, इर्राएलि या?मिजिमि रुम्बे? केए टुम्बे? परचार ले:मामि के? आवको सेन्डुडे ॥

¹⁶ केए लागि आवकोसे? इन्डोक खे: आडमा खे:ये मो खो के? खाडमेनुडे ॥”

¹⁷ मोबा हननिया मो खिमबे? खे?नुड सावल सोवपे? खोमि हुक युडसाड इडो? लु:सु, “होउ निसा सावल, हेड आ?मे?निडसिमाबे? रामबे? हेडनुड खाडमुबा?आ परभु येसुडे? हेने? फेरि खाडडोवहेसे लु:नुड, मोबा हेडबे? पबित्रा होडनिडा लेडये लु:नुड का पाडइटिडे ॥ ¹⁸ मोडोवपे?नो? सावलमि मिक्बाड इमाइमा थोक हेओगा मोबा खोसे? खाडडोवहेसु ॥ मोबा येपोवनुड खोसे? बप्तिस्मा लासु ॥ ¹⁹ मोबा खोसे? चामा चानुड खोमि बोल लेन्डा ॥

सावलडे? दमस्कसबे? सुसमचार खेम्मे?पा?आ

मोबा सावल परभु येसुमि चोडसाजिनुडनो? दमस्कसबे? इ?याक नियाक पेना ॥ ²⁰ मोबा सावल खे?नुड यहुदिजि सुम्हाम खिमराजि, “येसुनो? निवाहाडमि पसा ले:ये” लु:नुड परचार ले:साड रम्बुगा ॥

21 खोमि खा खेम्युबाजि चोप खरि मिडसाड खोजिदाडबा इडो?
 कासामि, “यरुसलेमबे? येसुमि ओहाड ले:खुबा या?मिजि राप्नुड
 से?नेमा योक्खुबा या?मि इगोनो? ने?ने ? इगोबे?सो मोडोवनो?
 या?मिजि राप्नुड एप्पा याडाडबाजिबे? लाग्ने?सि? लेडयटे ने?नेन्डे ?”

22 तर सावलडे? झना सवितनुड येसुनो? खिरिस्ट ले:ये लु:नुड पक्का
 ले:टु ॥ मोडोने? दमस्कसबे?हा यहुदिजि इमाडसो माडकाहेसामि ॥

23 मोबा बे?लो याक एक्साड यहुदिजिडे? सावल से?नेमामि मोत्ता इ:सुजि
 ॥ 24 तर इगो खा सावलडे? लेडोक्टु ॥ माहा यहुदि या?मिजिडे? खो

रा:प्नुड से?नेमामि सेन्डा लेन्डा खोमि यम सुक्पोगुजि ॥ 25 तर इक्सेड
 सावलमि चोडसाजिडे? खो चेन्डाबे? एन्नुड पडाणे? परखालबाड

चि:माराप्टुजि||b00333c.tif|col||पावल लाडगामिजिडे? चेन्डाबे?
 एन्नुड चि:माराप्पा?आ|9:25 ॥

सावल यरुसलेम सहरबे?

26 सावल यरुसलेम खे?नुड मोबे?हा येसुमि चोडसाजिनुड लाडगाम
 ले:मा योगु ॥ तर माहाजि खोनुड बे?लो किस्सिडामि, खो चैबानो?

परभुमि चोडसा लिटे लु:नुड बिस्वास माले?हेसुजि ॥ 27 तर बारनाबास
 चोडसाडे? सावल एप्पा चोडसाजिबे? सोरि चि?खे?टु ॥ सावलडे?

दमस्कस खे?ठाम यमबे? परभु चुप्नुड, खोनुड यामुबा?आ खा मोबा
 येसुमि टुम्बे?हा खा मेडकिस्सिरे? लु:बा?आ चोप खा बारनाबासडे?

माहाजि लुःबे?टुजि ॥ ²⁸ मोबा सावल माहा चोडसाजिनुड सोरि पेम्बुगा ॥
मोबा मेडकिरिसरे? परभुमि टुम्बे?हा खा यरुसलेम बे?हा या?मिजि

खेम्मे?साड राम्बोगा ॥ ²⁹ मोबा गिरिक खाप्ला यामुघुबा यहुदिजिनुड

काघुसे?चुसा ॥ मोडोणे? माहाजिडे? सावल से?नेमा योगुजि ॥ ³⁰ इगो खा
येसुबे? बिस्वास ले:खुबाजिडे? लेडोवटुजि ॥ मोबा माहाजिडे? सावल
कैसरिया सहरबे? लाघे?टुजि मोबाडसो सावल टारसस ठाउलाम
पाडहाक्सुजि ॥

³¹ मोबा एक्सड यहुदिया, गालिलिनुड सामरिया ठाउराजिबे?हा सेवा
खिमबे? सान्ति लिसा ॥ खोजिडे? परभुमि पबित्रा होडनिडामि सवित
टोवनुड, सेवा खिममि भलाइ लिसा ॥ चोडसाजिडे? निवाहाडमि आदर
ले:टुजेनुड हाइखा बिस्वासिजि बे?लो लिसामि ॥

पत्रुस लुडनुड योप्पा ठाउबे? लेम्बा?आ

³² मोबा पत्रुस चोप ठाउराजि वाइडुसाड, लुड्डा ठाउबे? टुघुबा परभुमि
या?मिजिबे?सो लेन्डा ॥ ³³ मोबे? खोसे? इवको एनियास निड ले:खुबा
या?मि चुप्टु ॥ खो सोगुबा लिबा?आ आक्चनिड याक्खे?पा?आ लेटे ॥

³⁴ पत्रुसडे? मो या?मि लुःसु, “होउ एनियास, येसु खिरिस्टडे? हेड
नुबोइए ॥ हेड येपोवनुड हेनेए लुडघाक इ:गे” मोबा मोडोवपे?नो? मो

सुवाकटो? ये:प्पोवनुड खो राम्बोगा ॥ ³⁵ मो या?मि नुबुवपा?आ खाडनुड
लुड्डा सहरनुड सारोन ठाउबे?हा चोप या?मिजिडे? परभु येसुबे? बिस्वास
ले:टुजि ॥

पत्रुसडे? तबिता नुबोवपा?आ

³⁶ योप्या लुःमे सहरबे? तबिता निड लेः? खुबा इवको परभुबे? बिस्वास
लेः? खुबा मे?ना?मि टुसे ॥ खोमि निड डोरकास^० लेःटे ॥ खोसे?
सानिडनो? इमाड मेडकप्खुजि सहायोग लेः?मे योम्बोक लेःटुए ॥

³⁷ पत्रुस लुड्डाबे? टुमाबे?नो? खो टुक्पुगा मोबा खो सिघडा ॥ मोबा
खोमि सिग्रिक वासोवनुड सोड तलाबे? लाघे?नुड इवको कोठाबे?

युक्सुजि ॥ ³⁸ लुड्डा सहरबाड योप्या सहर केवपे?नो? सि?टेन्से?
चोडसाजिडे? पत्रुस लुड्डाबे? टुये लुःनुड लेडोवनुड निप्पाड या?मिजि
खोबे? इडो? लुःसि? पाक्सुजि ॥ “कानिडमि खिमडेम्बे? चान्डो
आप्पि?माना॥”

³⁹ मोबा पत्रुस येपोवनुड माहाजिबे? खडा ॥ पत्रुस योप्या लुःमे ठाउबे?
रुवनुड माहाजिडे? खो खिममि सोडबि?ए तलाबे? चिक्खे?टुजि ॥ मोबे?
राडमि?माजि हाःप्साडनुड डोरकास लुःमे मे?नामिडे? आक्पा?आ चे?नुड
हाइखा चे? खाडमुसाड पत्रुसमि कि?युमि?यु येःबामि ॥

⁴⁰ मोबा पत्रुसडे? माहा चोप या?मिजि मो कोठाबाड पाखे?यु पाडनुड
खो टुम्रुक ठोवनुड निवाहाडनुड पारथना लेः?पोगा ॥ मोबा मो
सिगुयावलाम हिडघे?नुड लुःसु, “नानि तबिता, पुकाडे! मोबा मोसे? मिक

उनुड पत्रुस खाडडोक्टु मोबा पुके?नुड पेना ॥ ⁴¹ पत्रुसडे? तबितामि
हुक्पे? राःप्नुड येःपुक्माराट्ट ॥ मोबा परभुमि या?मिजिनुड राडमि?माजि

केः?नुड हिडग्रिक लिबा?आ तबिता खोजि जिम्मा पिःसुजि ॥ ⁴² मोबा
इगो खा योप्या सहरबे? चोप या?मिजिडे? लेडोक्टुजि मोबा बे?लो

या?मिजिडे? परभुबे? बिस्वास लेःटुजि ॥ ⁴³ मोबा पत्रुस बे?लो याक
साउकमि योम्बोक लेः?खुबा सिमोननुड योप्याबे? पेना ॥

10

करनेलियसडे? पत्रुस के?पा?आ

¹ कैसरिया सहरबे? येरिडजिमि एप्पा करनेलियस निड ले: ?खुबा इक्को या?मि पेने ॥ खो रोमि येरिडमि इटालिया निडमा पल्टनमि एप्पा लेटे |

h00193b.tif|col||येरिडजिमि एप्पा करनेलियस|10:1॥ ² खोनुड

खोमि जाहानजि धारमिक या?मिजि ले:टामे मोबा खोजिडे? चोप निवाहाडमि आदर लेटुजे ॥ खोसे? खाचोबे? सि?पा?आ या?मिजि नामनामनुड सहायोग ले:टुजे मोबा सानिडनो? निवाहाडनुड पारथना

ले:टामे ॥ ³ इ?याक लेन्डा सुम बोडराजि खोसे? इक्को वैबानो? सेन्जिसेम्माडबे? निवाहाडमि इक्को थाडसिरिदुत नुरे? खाडडोक्टु ॥ मो थाडसिरिदुतडे? लु:सु, “होउ करनेलियस!”

⁴ करनेलियसडे? किरिसमानुड खाडसाड लु:सु, “हे परभु” लु:मा ॥ मो थाडसिरिदुतडे? खो लु:सु, “हेने? ले:पा?आ पारथनानुड इमाड मेडकाप्खुजि सहयोग ले:पा?आ खा निवाहाडडे? निडाबे? मि?युडइटुहा ॥” ⁵ हागो योप्पा सहरबे? टुये पत्रुस लु:मे सिमोन के: ?सि? या?मि पाक्से

॥ ⁶ खो सागुविम योम्बोक ले: ?खुबा सिमोनमि खिमबे? टुये ॥ खोमि खिम वाबोक्ला केक्पे? काप्मिन्डुए ॥”

⁷ मो थाडसिरिदुत इडो? लु:नुड खडा ॥ मोबा एक्साड करनेलियसडे?

निप्पाड खोमि योम्बोक ले: ?खुबानुड निवाहाडमि खा खेमखुबा खोमि येरिड केडुजि ॥ मो येरिडडे? खोमि नुबा योम्बोक लेटुए ॥

८ करनेलियसडे? सेन्जिसेम्माडबे? मावपा?आ चोप खा माहाजि इ:बे?नुड योप्पा सहरबे? पत्रुस चिविस? पाडहाक्सुजि ॥

पत्रुसमि सेन्जि?माड

९ वगियाराम लेन्डा बारो बोडराजि माहाजि योप्पा सहरमि केवपे? रुवटुजि ॥ मोडोवपे? पत्रुस पारथना ले:?सि? सोडबे? सवसा ॥

१० पत्रुस पारथना ले:?मे?निडसिमाबे? खो बे?लो साणे? सिनुड इमाइमा चामा मि?टु ॥ मोडोवपे? हाइखाजि चामाहा खा डिमे?निडसिडामे ॥

पत्रुसडे? चाहि ध्यानबे? टुमाबे? इवको खरिमा खा खाडडोवटु ॥ ११ मोबा थाडसिरि हेम्बोणा मोबा मोबे? बे?ए ओप्ताडडो?मा रिउम्लाम्बे? हि:वनुड

मावखामडेम्लाम हे?उवमे?निडसिबा?आ खाडडोवटु ॥ १२ मोबे?

मवखामडेम्बे?हा चोप खालहा जिब जन्तुजिनुड पेरसे?वा राम्खुबा,

नान्द्रुडमाबे? पेघुबा सोडाजि टुसामि ॥ १३ मोबा इडो? लु:बा?आ

पत्रुसडे? खेप्सु ॥ “होउ पत्रुस, पुके?नुड इघाजि से?चोसे ॥”

१४ तर पत्रुसडे? लु:सु, “फेन्नि परभु, इडो?हा असुद्ध थोक इन्डोकटे

के? चामे! इडो?हा गो आयुरो के? मेन्वाडि? ॥”

१५ मोबा फेरि इडो? काबा?आ खेम्मुसा, “निवाहाडडे? चोखो टोडबा?आ चामे खा हेने? चोखो ले?निहा एलु:से ॥”

१६ सुम्घे?टो? इडो? लु:बा?आ खेप्सु ॥ मोबा मो ओप्ताड फेरि थाडसिरि?टुनो? टेघडा ॥

१७ पत्रुसडे? इगो सेन्जि?माडडे? लु:मा योवपा?आ खा इमाडडे लु:नुड

खरि मिन्साड मि॑मे॑निडसिडुए, मोडोवपे॑ करनेलियसडे॑ पाडबा॑आ
 या॑मिजि सिमोनमि खिम योवसाड शम्डेम्बे॑ येबामि ॥ ¹⁸ मोबा
 माहाजिडे॑ केः॑साड इडो॑ सिप्सुजि, “पत्रुस लुःमे सिमोन इगोबे॑
 टुयेन्डे ?”

¹⁹ मोडोवपे॑ पत्रुस खोसे॑ खाडबा॑आ सेन्जिसेम्माडडे॑ लुःबा॑आ
 इमाड होला लुःनुड नुरो॑ मि॑मे॑निडसिडे ॥ मोडोवपे॑नो॑ पबित्य
 होडनिवाडे॑ पत्रुस लुःसु, “खेप्से सिमोन, मि॑मु सुम्बाड या॑मिजिडे॑
 हेड योवमे॑निडसिम्मे ॥ ²⁰ मोडोणे॑ हेड इमाड मेमिन्ले॑ मि॑मु खडे ॥
 आक्खाजि के॑नो॑ पाडइटुडहाजि ॥”

²¹ मोबा पत्रुस मिम्मु उडनुड माहा या॑मिजि लुःसुजि, “हेनिडे॑
 योक्पा॑आ या॑मि कानो॑ लेडे ॥ इन्होड हेनिडे॑ योइटानिडे ?”

²² माहाजिडे॑ खो लुःसुजि, “कानिड गो येरिडजिमि चोप्पा एप्पा
 करनेलियसडे॑ पाडइ॑टे ॥ खो धरमिनुड निवाहाडमि आदर लेः॑खुबा
 या॑मि लेःये ॥ खो यहुदिजिडे॑सो आदर सम्मान पिःन्डुजे ॥ निवाहाडडे॑
 पाडबा॑आ इक्को थाडसिरिदुतडे॑ हेड खोमि खिमबे॑ केः॑नुड हेनेहा
 खा खेप्से लुःनुड लुःबा॑आसे॑ करनेलियसडे॑ कानिड हेड चिक्सि॑
 पाडइटे ॥” ²³ मोबा पत्रुसडे॑ खोजि खिम होडसि॑यु के॑नुड चाबाडमि
 सेवा लेःटु ॥ मोबा मो सेन्डा मोबे॑नो॑ पोबामि ॥

पत्रुस करनेलियसमि खिमबे॑ खे॑पा॑आ

वागियाराम मा॑मि पोरोक्नुड योप्पाबे॑हा परभुबे॑ बिस्वास लेः॑खुबा

आढा या?मिजि पत्रुसनुड खडामि ॥ ²⁴ सिडआराम माहाजि कैसरियाबे?
लेन्डामि ॥ करनेलियसडे? चाहि खोमि टाडबाडजि खोम लाडगामजि
के?नुड पत्रुसमि राम वा:प्मे?निडसिडुए ॥ ²⁵ पत्रुस मोबे? लेन्नुड
खिम होडसि?यु पेखे?सि? पोरोवमाबे? करनेलियसडे? खोमि सराडबे?
उ:वनुड सेवा मुसु ॥ ²⁶ तर पत्रुसडे? करनेलियस इडो? लु:सु, “हेड
पुकडे, कासो हेडडो?मा या?मिनो? लेडे ॥”

²⁷ पत्रुस करनेलियसनुड यामुसाड खिमहोडसि?यु पेएम्माबे? मोबे?
बे?लो या?मिजि सुम्बा?आ खाक्सु ॥ ²⁸ मोबा पत्रुसडे? माहाजि लु:सुजि,
“कानिड यहुदि जातिजि हाइखा जातिहा या?मिजिनुड सोरि पेम्मा, मोबा
खोजिमि खिमबे? खे?मा, कानिडमि धरमबे? फेन्निबा लु:मे हेनिडे?
नुरो? लेन्डानुमे ॥ तर निवाहाडडे? असासो असुद्ध लेम्मे लु:नुड मि?मा
फेमिमि लु:नुड का लु:बेटिडे ॥ ²⁹ मोडोणे? हेणे? पाडबा?आ
या?मिजिनुड इमाडसो मेमिडरे? का इगोबे? लेडइटिडे ॥ हागो का लु:डे
इन्ढोड हेणे? का केएटिडे ?”

³⁰ करनेलियसडे? पत्रुस लु:सु, “रियाक या?लोए खा लेये, का लेन्डामि
सुम्बोडराजि पारथना ले:?मे?निडसिडिडे ॥ मोडोवपे? इक्को
सेन्जिसेम्माड मागुड मोबे? पो?इये चे? चाडघुबा या?मि केए पोम्बे?
खाडमुसा ॥ ³¹ मोबा का लु:सिड, ‘होड करनेलियस, हेणे? ले:?पा?आ
पारथना निवाहाडडे? खेम्डुए मोबा हेणे? इमाड मेडकाप्पुजि नामनवा
ले:?पा?आसो निवाहाडडे? मिडुए ॥ ³² सिमोन लु:मे पत्रुस योप्पा

सहरबे? टुये ॥ खो चिविस? या?मिजि पाक्से ॥ खो साउविम योम्बोक
ले:खुबा सिमोनमि खिमबे? पेडइटे ॥ मो खिम वाबोक्लामि केक्पे? टुये

॥³³ मोडोणे? सोरोवनो? केहा या?मिजि हेड चिविस? पाडबा?आ ॥ केहा
या?मिजिनुड हेडसो कस्ट ले:नुड इगोबे? लेम्बे?टा ॥ हागो निवाहाडडे?
हेड आग्या पि:बा?आ खा खेमिस? इगोबे? कानिड परभुमि पोम्बे?
सुम्डिटिडमे ॥

पत्रुसडे? सुसमाचार खेम्मे?पा?आ

³⁴ मोबा पत्रुसडे? लु:बोगु, “चैबानो? निवाहाडडे? आढाजि नामनाम,
आढाजि सि?चामा लेटुजिनिबा लु:मे खा हागो के? लेटुडे ॥³⁵ तर खो
आदर ले:खुबानुड खोसे? लु:बा?आडो? योम्बोक ले:खुबा चोप जातिहा
या?मिजि निवाहाडडे? नेन्जोन्डुजे ॥³⁶ हागो हेनिडे? लेन्डानुम मुक्ति
पि:खुबा हाडबा खिरिस्ट येसु चोपमि परभु ले:ये ॥ खोबाडनो?
निवाहाडडे? सान्तिनुडमा सुसमाचार चोप इर्याएलिजिबे? पाडइटुए ॥

³⁷ युहन्नाडे? बप्तिस्मामि टुम्बे? इ:मा एक्साडबाड गालिलबाडनुड
यहुदियाबे? चोपराजि लिबा?आ खा हेनिडे? लेन्डानुमे ॥³⁸ निवाहाडडे?
नासरतबि?ए येसु पबित्रा होडनिवामि सक्ति पि:सु ॥ मोबा खोनुड
निवाहाड टुबा?आसे? खोसे? या?मिजि भलाइमि योम्बोकनुड सैतानडे?
चुडजाबा?आजि नुबोक्साड चोपराजि रम्डुसा ॥

³⁹ मोबा येसुडे? यरुसलेमनुड यहुदिया देसबे? ले:पा?आ चोप
योम्बोकमि कानिड साविछ टुन्डिडमा ॥ खो यहुदिजिडे? काप्सिडबे?
किडनेसुजि ॥⁴⁰ तर निवाहाडडे? सुम याक एक्साड हिडबोक्नुड
या?मिजिडे? खो खाडडोक्टुजि ॥⁴¹ खो चोपनुड माडखाडमुसा ॥

सिधे?नुड हिडपुक्पा?आ खामि साविछ पि:मामि लागि सेन्बा?आ
कानिडनुड खो खाडमुसा ॥ मोबा कानिडनुड सोरि चासा उक्सा ॥

42 निवाहाडडे? सिधे?पा?आजिनुड हिडरिविजमि न्यया ले:मे योम्बोकमि
लागि येसु पाडइटे ॥ इगो खामि साविछ पि:मामिनुड चोप या?मिजि
सुसमाचारमि खा खेम्मे?सि? येसुडे? कानिड आग्या पि:टे ॥

43 अगमबक्ताजि चोबे?नो? खोमि टुम्बे? लु:बा?आ लेटे ॥ येसुबे? बिस्वास
ले:खुबाजि चोबे? पापबाड आम्लाड चुप्मिन्दुजे लु:मे खा खोजिडे?
या?लोनो? इ:बा?आ लेटा ॥”

हाइखा जातिजिडे? पबित्रा होडनिडा चुप्पा?आ

44 पत्रुसडे? इघा खा इ:मे?निडसिमाबे? खेम्खुबाजि चोप्पे? पबित्रा
होडनिडा लेन्डा ॥ 45 हाइखा जातिजिडे? पबित्रा होडनिडामि वरदान
चुप्पा?आ खाडनुड पत्रुसनुड जोप्पाबाड सोरि आप्खुबा यहुदि
बिस्वासिजिसोड खरि मिनामि ॥

46 इन्डो?होड माहा या?मिजिडे? हाइखा खाप्लाबे? यामुबा?आनुड
निवाहाडमि ओहाड ले:पा?आ माहाजिडे? खेप्सुजि ॥ मोबा पत्रुसडे?

माहाजि लु:सुजि, 47 “इघा या?मिजिडे?सो कानिडे?डोवनो? पबित्रा
होडनिडा चुप्मिटुजे ॥ हागो इघाजि बप्तिरमा लामाबाड असे? सेवहेन्दुजे

?” 48 मोडोणे? पत्रुसडे? माहाजि येसु खिरिस्टमि निडबे? बप्तिरमा पि:मे
आग्या पि:सुजि ॥ मोबा एक्साड माहाजिडे? हागोसो पत्रुस इ?याक
नियाक कानिडनुडनो? पेने लु:नुड खो बिन्ति ले:टुजि ॥

11

पत्रुसडे? सेन्जिसेम्माड टुम्बे? इ:बे?पा?आ

¹ मोबा एक्साड हाइखा जातिहा या?मिजिडे?सो येसुबे? बिस्वास ले:टुजि लु:मे खा यहुदियाबे?हा एप्पा चोडसाजिनुड बिस्वासिजिडे? खेमडोवटुजि ॥

² मोबा पत्रुस यरुसलेमबे? रुवमाबे? खतना ले:मा खे:ये लु:घुबा यहुदि बिस्वासिजिडे? खो इ:जोबोगुजि, ³ “हेड इन्डोड खतना मले:पा?आ या?मिजिनुड सोरि पेन्नुड चामे, उडमे योम्बोक ले:ये ?”

⁴ मोडोगे? पत्रुसडे? खोमि सेन्जि?माडबे? लिबा?आ चोप खा लु:बे?टुजि, ⁵ “योप्पा सहखे? टुमाबे? पारथना ले:मेनिडसिडिडे मो ध्यानबे? टुमाबे?, नान्द्रुडमाबाड बे?ए ओप्ताड रिछेउबे? हि:वनुड केए केवपे? हेओवमे?निडसिबा?आ के? खाक्सुड ॥ ⁶ मोबे? के? नुरे? खाडमाबे? मक्खामडेमबे?हा चोप खा?लाहा जन्तुजि, पेरसे?वा से?साड शम्खुबाजि, नाम्फुलाबे?, पेडघुबाजिनुड नान्द्रुडमाबे? पेघुबा सोडाजि टुसामि ॥ ⁷ मोबा इडो? लु:बा?आ के? खेप्सुड, ‘होउ पत्रुस, हेड येपोवनुड इघाजि से?चासाजे ॥’

⁸ “तर के? लु:सुड, ‘इडो?हा असुद्ध जन्तुजि इन्डोवटे चामे ॥ के?को आइरो इघाजि मन्वाडि? ॥’

⁹ “फेरि थाडसिरिबाड इडो? लु:बा?आ के? खेप्सुड, ‘निवाहाडडे? सुद्ध टोडबा?आ खा हेने? असुद्ध ए?लु:से ॥’ ¹⁰ सुम्घे? इडो? खेम्मुसा मोबा थाडसिरि?टुनो? माहा चोप टे:घडा ॥ ¹¹ मोडोवपे?नो? कैसेरिया लु:मे ठाउबाड का के?सि? सुम्बाड या?मिजि का पेम्बा?आ खिमबे? लेन्डाजि

॥ ¹² इमाडसो मेमिन्ले? माहाजिनुड खे?मामि पबित्रा होडनिडाडे? का लु:सिडा ॥ मोबे? कानुड एत्चि जना बिस्वासि वावानिसाजिसोड कानुड सोरि आबामि ॥ इडो? कानिड सोरि करनेलियसमि खिम रुवनुड

खिमहोडसि?यु पेखडिडमा ॥ ¹³ मोबा करनेलियसडे? इक्को थाडसिरिदुत

खोमि खिमबे? खाडमुनुड खो लु:बा?आ कानिड खेम्मे?टा, 'योप्पा

सहरबे? सिमोन पत्रुस टुये खो के:?सि? या?मिजि पाक्से ॥' ¹⁴ खोसे? हेड सुसमाचार खेम्मेये मोबा हेडनुड हेनेहा खिमबे?हा चोबे? पापबाड छुटकारा चुप्मिन्डानुमे ॥

¹⁵ "मोबा का माहा या?मिजिनुड यामुमे?निडसिडिडे ॥ मोडोक्पे?नो? पबित्रा होडनिडा या?लो कानिडबे? लेम्बा?आडो?नो? खोजि सोक्पे?सो

उक्सा ॥ ¹⁶ मोबा के? परभुडे? लु:बा?आ खा मि?टोगुड, 'युहन्नाडे?को योडे? बप्तिस्मा पि:सुजे, तर हेनिड चाहि पबित्रा होडनिडाडे? बप्तिस्मा

लिन्डानिडे ॥' ¹⁷ कानिडे? परभु येसु खिरिस्टबे? बिस्वास ले:?टुडमा ॥

मोबा निवाहाड्बाड कानिडे? पबित्रा होडनिडामि वरदान चुप्पुडमा ॥

मोडो?नो? यहुदिजिबाड हाइखा जातिहा या?मिजिडे?सो निवाहाडबे?

बिस्वास ले:?नुड खोबाड पबित्रा होडनिडा चुप्पुजि ॥ इडो?

निवाहाडडे?नो? माहाजि पबित्रा होडनिडा पि:न्दुजेहोड मो योम्बोक के?

इन्डो?टे सेक्मे ?"

¹⁸ पत्रुसबाड इघा खा खेप्सुजेबाड परभुबे? बिस्वास ले:?खुबाजिडे?

पत्रुस इजामा ले?नुड, खोजि इडो? कासामि, "निवाहाडडे? हाइखा जातिजिसोड पापबाड टेआप्मे मौका पि:टुजि लु:नुड निवाहाडमि ओहाड ले:?पोगामि ॥

एन्टिओखिया लुःमे सहरबि?ए सेवा खिम

¹⁹ स्तिफनस से?नेसुजे बाड येसुबे? बिस्वास लेखुबाजि चुडजाबा?आसे?

चोप चिः?खडामि, आढा फोनिकिया लुःमे ठाउबे?, आढा साइप्स लुःमे पोडबोडमाबे? मोबा आढा एन्टिओखिया सहरठोक रुवटुजि ॥ खोजिडे?

या?लो यहुदिजिरे? सुसमाचार खेम्मे?टुजि ॥ ²⁰ तर साइप्सनुड कुरेनिया लुःमे ठाउबाड लेम्बा?आ येसुबे? बिस्वास लेः?खुबा चोडसाजिडे? चाहि एन्टिओखियाबे? लेन्नुड हाइखा जातिजिसो परभु येसुमि टुम्बे?हा खा

खेम्मेटुजि ॥ ²¹ परभुमि सक्ति खोजिनुड टुसा ॥ मोडोणे? बे?लो या?मिजिडे? बिस्वास लेःटुजि ॥

²² मोबा इगो खा यरुसलेममि सेवा खिमबे?हा या?मिजिडे? खेप्सुजि ॥ मोबा सेवा खिमबे?हा अगुवाजिडे? बारनाबास एन्टिओकबे? पाक्सुजि ॥

²³ बारनाबास एन्टिओकबे? लेम्माबे? मोबे?हा या?मिजि निवाहाडडे? नाम्नावानुड आसिस पिःबा?आ खाडडोकनुड बे?लो साप्थाकसा ॥ खोसे? मोबे?हा बिस्वासिजि सानिडनो? परभुबे? नुरो? बिस्वास ले?मे लुःनुड

अरति पिःसुजि ॥ ²⁴ बारनाबास चाहि, पबित्या होडनिडानुड येसुबे? नुरो? बिस्वास लेः?खुबा लेटे ॥ मोडोणे? माहा खा खाडनुड हाइखा बे?लो या?मिजिडे? परभुबे? बिस्वास लेःटुजि ॥

²⁵ मोबा बारनाबास, सावल योक्सि? तार्सस सहरबे? खडा ॥ ²⁶ खोसे? सावल मोबे? चुप्नुड एन्टिओखिया सहरबे? चिक्चेडु ॥ मोजिडे? इक निडडो? एन्टिओखियामि सेवा खिमबे?हा या?मिजिनुड सेवा लेः?साड बे?लो या?मिजि इःडुजि ॥ बिस्वासिजि एन्टिओखिबे?नो? चोप्पा या?लो

‘खिरिस्टियन’ लुःनुड लुःबा?आ लेटे ॥

27 मोडोवपे?नो? अगमबक्ताजि यरुसलेमबाड एन्टिओकबे? लेरुसामि ॥

28 माहाजिबे? अगाबस निड ले:खुबा इक्को या?मि टुसे ॥ खोसे? पबित्रा
होडनिडामि सक्तिडे? सेवा खिमबे? खे?नुड या?मिजि इगो खा

इ:बे?टुजि, “हागो माक्खाम्डेम्बे? बे?ए सावआडसा लेडइये ॥” (एक्साड
क्लोडियस निड ले:खुबा रोम देसमि हाडबा लिमाबे? मो सावआडसा

लिसा) ॥ 29 अगाबसमि इगो खा खेमनुड एन्टिओकबे?हा परभुमि
चोडसाजिडे? खोजिडे? पि:हेरो भेति सहयोग यहुदियाबे? पेडघुबा

वावानिसाजि पि:मे निडा ले:टुजि ॥ 30 मोडोणे? माहाजिडे? इडो?
यिक्पा?आ भेति बारनाबासनुड सावलमि हुक्बाड यहुदियाबे?हा सेवा
खिमिम अगुवाजि पाडबे?टुजि ॥

12

हाडबा हेरोद अग्रिपासडे? सेवाखिमबे? या?मिजि चुडजाबा?आ

1 मोडोवपे? हाडबा हेरोद अग्रिपास? लु:मे हाडबाडे? सेवा खिमबे?हा
बिस्वासि वावा निसाजि बे?लोनो? चुडजाबोगुजि ॥ 2 मोसे? युहन्नामि

वावा याकुब ताब्याडे? चेन्नेमे?टु ॥ 3 इगो योम्बोकडे? यहुदि या?मिजि
साप्थाडबा?आ खाडनुड मोसे? पत्रुससो रा:प्मे निडा ले:पोगु ॥ इगो
खा सिडा मेन्तुबा?आ चारेपा चामे चाडमि बेलाबे? सि?पा?आ लेटे ॥

4 हाडबा हेरोदडे? पत्रुस रा:प्मे?नुड तिरोडगा खिमबे? सेगु ॥ मोबा
मोबे? सोरो जना येरिडजि रिबाड रिबाडमि हुल तिनुड पत्रुस सेन्डा
लेन्डा हुडमे?टुजि ॥ मोबा हाडबा हेरोदडे? मो यहुदिजिमि छुटकारामि चाड
एक्साड पत्रुस यहुदिजिमि पोम्बे? लाप्मा मि?टु ॥

⁵ पत्रुस तिरुडगा खिमबे? टुमाबे? सेवा खिमबे?हा या?मिजिडे? खोमि लागि बे?लो पारथना ले:१मे?निडसिडुजि ॥

तिरोडगा खिमबाड पत्रुस ले?खे?पा?आ

⁶ हाडबा हेरोदडे? पत्रुस या?मिजिमि पोम्बे? ला:१मे याकमि, या?लोए सेन्डा पत्रुस निप्पाड येरिडजिमि रुम्बे? इम्मे?निडसिडे ॥ खो निट्टि च्चेक्किमि कोडडे? हि:क्पा?आ ले:टे ॥ तिरुडगा खिममि राम्बाडेम्बे?सो

येरिडजिडे? हुडमे?निडसिडुजे ॥ ⁷ मोबा हाजोवटो? इक्को थाडसिरिदुत मो तिरुडगा खिममि कोठाबे? उज्यालो ज्योतिनुड खाडमुसा ॥ मो

थाडसिरिदुतडे? पत्रुसमि आवटाडबे? चोक्साड “चान्डो पुकाडे” लु:नुड

हुम्बोगु ॥ मोडोक्पे? पत्रुसमि हुक्पे? हि:क्पा?आ च्चेक्किमि कोड |

h00203c.tif|col||पत्रुस हि:क्पा?आ च्चेक्किमि कोड|

12:7हेम्बोक्खडा ॥

⁸ मोबा थाडसिरिदुतडे? खो लु:सु, “थोडमाई हि:क्नुड राडसुप चाक्से ॥

मोबा पत्रुसडे? मोडोक्नो? ले:टु ॥ मोबा फेरि थाडसिरिदुतडे? लु:सु,

ओप्ताड खाम्नुड “केए एडगुवा एडगुवा आबे ॥” ⁹ पत्रुस थाडसिरिदुतमि एडगुवा एडगुवा राम्नुड तिरुडगा खिमबाड पेएआबा तर पत्रुसडे? इगो योम्बोक थाडसिरिदुतडे? चैबानो? इडो? ले:१पा?आ लु:नुड मेलेसु ॥

खोसे? मि?टु, “के? सेम्माड माक्मे?निडसिनुडे ॥” ¹⁰ इडो? पत्रुसनुड थाडसिरिदुत या?लोएनुड हाइके राम हुडघुबा येरिडजि येण्ठाम ठाड काक्नुड सहर पेखे?ठाम च्चेक्किमि मुल राम्बाडेम्बे? लेस्साजि ॥ मो

रम्बाडेम खोम्दाडबा हेम्बोगा, मोबा निप्पाड पाखे?यु लेन्डाजि ॥ माहाजि
सहरमि हाइके एडे?मा मारामबे? लेम्मासोरो? थाडसिरिदुतडे? पत्रुस
या:१योसु ॥

¹¹ मोडोक्पे?रे? पत्रुसडे? खोबे? लिबा?आ चोप खा चैबानो?

लिबा?आलेए लु:नुड लेडोक्टु ॥ मोबा खोम्दाडबे? इडो? लु:सु, “परभुडे?
चैबानो? खोमि थाडसिरिदुत पाडनुड हाडबा हेरोदनुड यहुदिडे? का
सोक्पे? अन्यायबाड ले:१मा योक्पा?आ योम्बोकबाड का जोगबा ले:टिड
॥”

¹² इगो खा पत्रुसडे? लेडोक्नुड मरकुस लु:मे युहन्नामि मामा
मरियममि खिमबे? खडा ॥ मोबे? बे?लो बिस्वासि या?मिजि सुम्नुड
पारथना ले:१मे?निडसिडामि ॥ ¹³ पत्रुसडे? रम्बाडेम पाखे?युबाड
रो:वमाबे? रोदा निड ले:१खुबा सेउतिनि, रम्बाडेम हेडसि? लेन्डा ॥

¹⁴ मोसे? पत्रुसमि सेम्ला खेम्डोक्नुड रम्बाडेम माहेडले? साप्थाडसाड
पिडखे?नुड ‘पत्रुस पाखे?यु लेडइटा लु:सु ॥

¹⁵ माहाजिडे? मो लु:सुजि, “हेड नाड्सुमाड लिटेन्डे” तर मोसे? लु:सुजि
“चैबानो? पत्रुसनो? लु:नुड ये?ये? लेडइटे” लु:सुजि ॥ माहाजिडे?
लु:सुजि, “पत्रुस खाडखुबा थाडसिरिदुत होला ॥”

¹⁶ पत्रुसडे? चाहि रम्बाडेम रो:वमा मालेडु ॥ मोबा माहाजिडे? रम्बाडेम
हेम्बोक्माबे?को चैबानो? पत्रुसनो? खाडडोक्नुड, खरि मिनामि ॥

¹⁷ पत्रुसडे? माहाजि हुक्मि खाप्लाडे? योड उगानिडे लु:सुजि ॥ मोबा

इन्डो? निवाहाडडे? खो तिरोडगा खिमबाड पाखे?यु चाडआप्टे लु:मे खा
 माहाजि नुरो? इ:बे?टुजि ॥ मोबा “इगो खा याकुबनुड सेवाखिमबे?हा
 बिस्वासि वावानिसाजिसोड हेनिडे? लु:बे?टानुमो’ लु:नुड पत्रुस मोबाड
 खे?पेसा ॥

¹⁸ मोबा वगिया मा?मि उज्यालो लिनुड तिरोडगा खिमबे?हा येरिडजिमि
 रुम्बे? बे?लो खायोक मायोक लिसा ॥ ¹⁹ मो खा लेडोकनुड हाडबा
 हेरोदडे? येरिडजि पत्रुस योवमे?टुजि, तर पत्रुस हाम्बे?सो मान्चुप्टुजि
 ॥ मोबा हाडबा हेरोदडे? येरिडजि सिम्माबे? इमाडसोड जवाफ
 मान्चुपा?आसे? खोजि से?नेमे?टुजि ॥ मोबा खो चाहि यहुदिया ठाडबाड
 कैसरिया खे?नुड मोबे?नो? पेना ॥

हाडबा हेरोद सिधे?पा?आ

²⁰ हाडबा हेरोद टुरोसनुड सिदोन ठाडबे?हा या?मिजिनुड बे?लो
 सुरके?पा?आ ले:टे ॥ तर मोहा निच्चि ठाडबे?हा या?मिजिमि लागि चामे
 उडमे खा हाडबा हेरोदमि ठाडबाडनो? लाघे?मा खडे ॥ मोडोणे? मो
 निच्चि ठाडबे?हा एप्पाजि इवको लिनुड हाडबानुड लाडगाम ले?सि?
 खे?मा मिनाजि ॥ मोबा माहाजिडे? हाडबा हेरोदमि भरपरदो या?मि
 बलस्तस हुकपे? लानुड हाडबानुड चुप्पामि बिन्ति ले:?टुजि ॥

²¹ मोबा मो चुप्पे याकपे? हाडबा हेरोदडे? हाडबा चे? चाडमानुड हाडबा
 पेन्ढाम्बे? पेन्नुड माहा एप्पाजिनुड हाडखा या?मिजिमि पोम्बे? यासुरेना
 ले:टु ॥ ²² मोबे? टुबा?आ या?मिजिडे? हाडबामि यासुरेना खेम्नुड मोबे?हा
 या?मिजि इडो? कासामि, “इगो खागो निवाहाड ले:ये, या?मिमि गो
 ने?नि’ लु:साड हाडबामि ओहाड ले:?पुगामि ॥ ²³ तर हाडबा हेरोदडे?

निवाहाडमि महिमा मेलेः?पा?आसे? मोडोवपे?नो? परभुमि इवको
थाडसिरिदुतडे? हाडबा वागु ॥ मोबा खो फिबे? इःपुनुड सिघडा ॥

²⁴ तर निवाहाडमि बचन झना चोप या?मजिडे? खेम्सुजि ॥

²⁵ बारनाबासनुड सावल खोजिमि योम्बोक येः?नुड यरुसलेमबाड
एन्टिओखिया सहरबे? टेसाजि ॥ खोजि टेमाबे? मरकुस लुःमे युहन्नासोड
खडा ॥

13

सावलनुड बारनाबास सेम्बा?आ

¹ एन्टिओखिया सहरमि सेवा खिमबे? अगमबक्ताजिनुड खा इः?खुबा
बे?लो या?मिजि टुसामे ॥ माहाजि बारनाबास, काला लुःमे सिमियोन,
कुरेनिया ठाउबि?ए लुकियस, हाडबा हेरोद^१ आन्तिपासनुड सोरि
वाबोवपा?आ मनेननुड सावल टुसामि ॥ ² इ?याक माहाजि माञ्जारे?
पेन्नुड पारथना लेः?साड परभुमि आराधना ले?मे?निडसिमाबे? पबित्रा
होडनिवाडे? माहाजि इडो? लुःसुजि, “खेप्सानुमे, बारनाबासनुड साउल
के? इमाड योम्बोकमि लागि सेन्डुटुडहाजि, मो योम्बोवपे?नो? टिसानुमे
॥” ³ मोडोणे? माहाजिडे? फेरि माञ्जारे? पेन्नुड बारनाबासनुड
सावलसोवपे? हुक युडनुड पारथना लेःटुजि मोबा परभुमि योम्बोकपे?
पाक्सुजि ॥

बारनाबासनुड सावल साइप्स लुःमे पोडबोडमाबे?

⁴ पबित्रा होडनिडाडे? पाडबा?आ बारनाबासनुड सावल एन्टिओखिया

सहरबाड यम्बोगाजि, खोजि सिलुकिया सहरबे? खडाजि ॥ मोबाड

माहोडमामि राम लिसाड साइपरस पोडबोडमाबे? खडाजि ॥ ⁵ मोबा
सलामिस सहरबे? रुक्नुड यहुदिजि सुम्हाम खिमबे? पेएन्नुड माहाजिडे?
निवाहाडमि बचन खेम्मे?टुजि ॥ मो योम्बोक टिडमाराखुबा मरकुस लु:मे
युहन्नासो खोजिडे? वि?खे?पा?आ लेटे ॥

⁶ माहाजि साइपरस पोडबोड चोप वाइसे?नुड पाफोस लु:मे सहरबे?

रुक्नुजि ॥ मोबे? खोजिडे? इक्को बार-येसु लु:मे चाटक ले:खुबा यहुदि

चुप्टुजि ॥ मोसे? खोम्डाडबे? टाडबा अगमबवता मि?टुए ॥ ⁷ मो चाटक
ले:खुबा या?मि चाहि साइपरस पोडबोडमाबे?ए हाकिम सरगियस
पौलुसमि खिमबे? पेने ॥ सरगियस पौलुस निडा दाडबा लेटे ॥ खोसे?
निवाहाडमि बचन खेम्जामा मि?पा?आसे? बारनाबासनुड सावल के?सि?

पाक्सु ॥ ⁸ तर मो एलुमास लु:मे चाटक ले:खुबाडे? (एलुमास लु:बा?आ

चाटक ले:खुबा लिये) सावलनुड बारनाबास बिरोध ले:नुड सरगियस

पौलुस बिस्वासबाड फेम्बेमे?मा योगु ॥ ⁹ मोबा सावलडे? (सावलनो?

पावलसो लु:नुडजे) पबित्रा होडनिडामि सवितडे? टिपुड एलुमास खिड

नजिक टिनुड खाडसाड लु:सु, ¹⁰ “हेड चोप नुबा खामि सतुर मोबा

माडे?मा योम्बोकनुड माडे?मा निडा खि:घुबा सैतानमि पसा ले:ये ॥

इमाड हेने? परभुमि सोझो राम कि?यु मि?यु फेम्मा इन्डोक्पे?सो लेडुनिबा

? ¹¹ हागो खाक्से हेड ओक्पे? परभुमि चापहिमा सि?पा?आसे? हेनेए

मिक ए?निबा इन्डोक्लो नामसो खाडहेसुने!” ॥ इडो? लु:मा सोरोक्नो?

एलुमासमि मिक खिमिम?वाडे? टेक्पा?आडो? लिसा मोबा हुने? इनि?यु

मि॑यु यःप्टाम सुःप्पोगु ॥ ¹² मोबा मो खा बे॑ए हाकिमडे॑ मोबे॑ परभुमि
सिवछेबे॑ टुबा॑आ खरिमा सवित खाडनुड॑ खरि मिना मोबा खोसे॑
परभुबे॑ बिस्वास लेःटु ॥

बारनाबासनुड॑ पावल पिसिदियामि एन्टिओखिया सहरबे॑

¹³ मोबा पावलनुड॑ खोमि लाडगामजि पाफोसबाड॑ योडा जहाजबे॑
साडनुड॑ पाम्फेलिया ठाउमि परगा लुःमे सहरबे॑ रुवटुजि ॥ मोबाड॑

मरकुस लुःमे युहन्नाडे॑, पावलनुड॑ बारनाबास याः॑यानुड॑,

यरुसलेमलाम टेघडा ॥ ¹⁴ मोबा पावलनुड॑ बारनाबास चाहि परगाबाड॑
पिसिदिया छेत्यामि एन्टिओक सहरबे॑ खडाजि ॥ मोबा नाजामे याकपे॑

यहुदिजि सुम्हाम खिमबे॑ खे॑नुड॑ पेनाजि ॥ ¹⁵ मोसामि यहुदि धारमिक
नियममि ने॑चिरानुड॑ अगमबक्ताजिमि ने॑चिरा ने॑पेनुड॑ यहुदि सुम्हाम
खिमबे॑हा डायोडजिडे॑ बारनाबासनुड॑ पावल इडो॑ लुःमे लाम्बावा

पाक्सुजि, “होउ, निसाजि कानिडमि या॑मिजि साहस पिःढाम नुबा खा
हेन्जिडनुड॑ टुहाहोड इगोबे॑ इःसाजे ॥”

¹⁶ मोडो॑मा खेमनुड॑ पावल येपोवनुड॑ हुणे॑ खाप्साड॑ इमा तरिगु,

“इर्राएलि वावा निसाजि मोबा निवाहाडमि आदर लेः॑खुबा या॑मिजि,

केहा खा खेप्सानुमे ! ¹⁷ इगो इर्राएलि जातिजिमि निवाहाडडे॑ कानिडमि
टुबा पाबाजि सेन्नुड॑ मिर्रादेसबे॑ टुमाबे॑ चोप खाबे॑ महान जाति टोक्सु

॥ मोबा खोमि बे॑ए सवितडे॑ मिर्रादेसबाड॑ चाडआप्टुजि ॥ ¹⁸ महाजि
रे॑रे॑मा ठाउबे॑ रिबोड॑ निडठोक टुमाबे॑ निवाहाडडे॑ महाजि खाक्सुजि

॥ ¹⁹ निवाहाडडे॑ कनान देसबि॑ए चुक्चि जातिजि नासि लेः॑नुड॑ मो देस

कानिडमि टुबालाबाजि पिःसुजि ॥

²⁰ मोडोक्लोरो रिउम सय डाक्पोड निड याक्खे?पा?आ लेटे ॥ “मोबा निवाहाडडे? इघाजि सासन लेः?मामि न्यायधिसजि पाक्सुजि ॥ पालो पालो लेः?साड अगमबक्ता सामुएल मेलेल्लो खोजिडे? मो योम्बोक

लेःटुजि ॥ ²¹ मोबा माहाजिडे? हाडबा डागुजि ॥ मोबा निवाहाडडे? खोजि बेन्यामिनमि कुलमि किसमि पसा सावल हाडबा टोडबे?टुजि ॥ मोसे?

रिबोड निडठो? राज्य लेःटु ॥ ²² निवाहाडडे? खो हाडपेन्ढाम्बाड चाडबेसु लेःटु मोबा दाउद हाडबा टोक्सु ॥ निवाहाडडे? दाउदमि टुम्बे? इडो? लुःसु, ‘यिसैमि पसा दाउद केए नेन्जामे या?मि चुप्डुडे ॥ खोसे? केए निडाडे? मि?पा?आडो?नो? लेःन्डुए ॥’

²³ इगो या?मिमि सन्तानबाड निवाहाडडे? हेन्जरुड हेम्बा?आडो?नो?

मुक्ति पिःघुबा येसु कानिड इर्राएलिजिबे? पाडइन्डुए ॥ ²⁴ येसुडे? खोमि योम्बोक तारिक्मा या?लो युहन्नाडे? इस्रालिजिमि चोप या?मिजि पापबाड

टेआप्नुड बप्तिरुमा लासानुमे लुःनुड खा फुक्सु ॥ ²⁵ मोबा युहन्नाडे?

खोमि सेवामि योम्बोक ये?पेमे बेलाबे? या?मिजि इडो? लुःसुजि, ‘का

असाडे लुःनुड मिइन्डानुमे ? का गो हेनिडे? आस लेः?पा?आ या?मि गो

ने?नि, खो गो काबाडसो एक्साड लेडइए ॥ का गो खोमि राडसुप्मि तुना हेम्मारोमासो लेः?डानि ॥’

²⁶ होउ, अब्राहाममि सन्तान्, इर्राएलि वावा निसाजि, निवाहाडमि

आदर लेः?खुबाजि, निवाहाडडे? इगो सुसमाचार कानिड चोपमि लागि

पाडबा?आ लेहा ॥ ²⁷ तर यरुसलेमबे? पेडघुबा या?मिजिनुड खोजिमि
अगुवाजिडे? येसु छुटकारा पि:घुबा लु:नुड मालेसुजि ॥ खोजिडे?
अगमबवताजिडे? धारमिक साप्चिराबे? साप्पा?आ खा नाजामे याकपे?
सानिडनो? ने?माबे?सो माहाजिडे? मेलेहेसुजि ॥ येसु से?नेनुड दन्डा
पि:सुजि इडो? धारमिक साप्चिराबे? साप्पा?आ खा खोजिमि योम्बोणे?

पुरा ले:टुजि ॥ ²⁸ खो से?मारोमा दोस मेन्वुप्माबे?सोड से?नेमानो? खे:ये

लु:नुड रोम देसबि?ए बे?ए हाकिम पिलातस बिन्ति ले:टुजि ॥ ²⁹ खोमि
टुम्बे धरम साप्चिराबे? सप्पा?आ खा पुरा लिसा मोबा माहाजिडे? खो

काप्सिडबाड रिओवनुड ये:माबे? युक्सुजि ॥ ³⁰ तर निवाहाडडे? खो गो

सिघेपा?आबाड हिडबोगु ॥ ³¹ मोबा बे?लो याकरो खोनुड गालिलिबाड
यरुसलेम लेन्खुबाजिडे? खोमि सेन्जिसेम्माड चुप्टुजि ॥ मोबा आयु
माहाजिनो? इर्राएलि या?मिजिमि लागि खो खाडमुघु सक्छि लेम्मे ॥

³² “हागो निवाहाडडे? या?लोनो? कानिडमि पाबा टुबाजिनुड हेम्बा?आ

हेन्जरुडमि सुसमाचार खेम्मे?सि? हेनिडबे? कानिड लेडइटिडमे ॥ ³³ इगो
सुसमाचार चाहि निवाहाडडे? येसु सिघे?पा?आबाड हिडबोवनुड कानिड
खोमि सन्तानजिमि लागि मो हेन्जरुड हेम्बा?आ पुरा ले:पा?आ ले:ये ॥

मो भजन सडरहमि एक्सडए? भागबे? निवाहाडडे? इडो? लु:बा?आ

ले:ये,

‘हेड केए पसा ले:ये, आयु का हेनेए पाबा लिटिडे’ ॥

³⁴ निवाहाडडे? येसु सिघे?पा?आबाड हिडबोवमाबे? फेरि इन्डोवपे?सोड
ए?सि?घे?लो लु:नुड धारमिक साप्चिराबे? इडो? लु:बा?आ ले:ये

“के? दाउद पिःन्ने लुःनुड हेञ्जुरुड हेम्बा?आ पबित्रानुड चैबानो?मा आसिस हेनिड

पिःनिम्ने ॥”^{s 35} मोबा भजनसङ्ग्रहबे?सो इडो? सप्पा?आ लेःये,

‘हेने? हेनेए पबित्रा योम्बोक लेः?खुबामि हिडा किम्घे?मे?टुनिबा॥

³⁶ दाउदडे? खोमि जिबन टुरो निवाहाडमि सेवा लेःटु, मोबा खो

सिघे?नुड, खोमि पाबा टुबाजिनुडनो? येः?माबे? किम्घडा ॥ ³⁷ तर
निवाहाडडे? सिघे?पा?आबाड हिडबोक्पा?आ येसुमि हिडा चाहि
मेकिम्खे?मेटु ॥

³⁸ मोसे? ले?मे वावा निसाजि, येसुबाड कानिडमि चोप पापमि आम्लाड

लिहा लुःनुड चैबानो?मा खा खेम्मे?निम्ने ॥ ³⁹ येसुबे? बिस्वास
ले?खुबाजि चोपमि पापबाड छुटकारा चुप्नुड निवाहाडमि पोम्बे? ठिक
लिन्डानिडे ॥ इगो खा यहुदि धारमिक नियमडे? पुरा मले?हेसु ॥

⁴⁰ मोडोगे? हेनिड चाडखो पेनानिडे?, ने?निहोडगो अगमबक्ताजिडे?
साप्पा?आ खा हेनिडसोक्पे? लेडइयेयौ ॥

⁴¹ खाक्सानुमे, सि?चाघुबाजि, हेनिड खरि मिनानिडे मोबा नासि लिबेसानिडे

इन्डो?होड हेनिडमि बेलाबे? के? इडो?मा योम्बोक लेःनुडे, इगो
योम्बोकमि टुम्बे? हेनिड हाइखाजिडे? लुःबे?टानिडहोडसो हेनिडे?

बिस्वास लेःटानुम्नि ॥”^u

⁴² पावलनुड बारनाबास यहुदिजि सुम्हाम खिमबाड पेआप्नुड खे?माबे?

या?मिजिडे? माहाजि, “फेरि हाइको नाजामे याक्पे? हेनिड लेन्नुड इगो

खा फेरि कानिड खेम्मे?मा’ लुःनुड केडुजि ॥ ⁴³ मोबा यहुदिजि सुम्हाम

खिमबे? खा ये?नुड एक्साड बे?लो यहुदिजिनुड यहुदि धरमबे? बिस्वास
ले:खुबाजिडे? पावलनुड बारनाबास टिक्सुजि ॥ मोबा पावलनुड
बारनाबासडे? माहाजिनुड खा इ:नुड सानिड निवाहाडमि नाम्नावाबे?
टुहुडघे?मे लु:नुड बिन्ति ले:टुजि ॥

⁴⁴ मोबा हाइको नाजामे याकपे? मो सहरमि चोप या?मिजि परभुमि बचन
खेमिस? लेस्सामि ॥ ⁴⁵ तर यहुदि एप्पाजिडे? मोळे:लो या?मिजि खाडनुड
सुरके?नुड पावलडे? लु:बा?आ खामि बिरोध ले:साड पावल वोबुजि ॥

⁴⁶ तर पावलनुड बारनाबासडे? मेडकि?सिरे? इडो? लु:सुजि,
“निवाहाडमि बचनगो चोपबाड या?लो हेनिड यहुदिजि खेम्मे?मा खाडे,
तर हेनिडे?नो? इगो खा मेडखेप्सानुम ॥ हेनिड टाडबे?नो? मो
इन्डोवपे?सो ए?सिघे?मे जिबन ओ: टोक्सानुम ॥ हागो कानिड हाइखा
जातिजिबे? खाडिडमा ॥ ⁴⁷ इन्डो?होड परभुडे? इडो? कानिड आग्या
पि:टे,

‘मक्खाम्डेमबे?हा चोप या?मिजिडे? छुटकारा चुप्पुजियो लु:नुड के? हेनिड हाइखा
जातिजिमि लागि उज्यालो टोडनुड पाडबा?आ ले:ये’ ॥’

⁴⁸ इगो खा हाइखा जातिजिडे? खेम्नुड बे?लो सप्थाडसाड निवाहाडमि
बचनमि ओहाड ले:टुजि ॥ मोबा इन्डोवपे?सो ए?सिघे?मे जिबनमि लागि
या?लोनो? निवाहाडडे? सेम्बा?आजिडे? परभुबे? बिस्वास ले:टुजि ॥

⁴⁹ मोबा निवाहाडमि बचन चोप ठाउराजि मुक्खडा ॥ ⁵⁰ तर यहुदिजिडे?
निवाहाडमि आदर ले:खुबा एप्पा मे?ना?मिजिनुड मो सहरबे?हा एप्पा
एप्पा या?मिजि चोप्सुजि ॥ मोबा पावलनुड बारनाबासमि टुम्बे? मडेहा खा
लु:बे?नुड चोप्सुजि ॥ मोबा माहाजिडे? खोजि मो ठाउबाड यिवहाक्सुजि ॥

51 मोडोणे? पावलनुड बारनाबास खोजिमि सगडफेकमामि आक्खामा,
मोबे?हा या?मिजिमि बिरोधबे? फा?पा?आनुड, खोजि आइकोनियनलाम
खडाजि ॥ 52 मोबा चोडसाजिसो पबित्रा होडनिडामि सक्तिडे? सान्ति
लि:नुड आनन्दाडे? सप्थाक्सामि ॥

14

आइकोनियन सहरबे? पावलनुड बारनाबास

1 आइकोनियन सहरबे?सो पावलनुड बारनाबास यहुदिजि सुम्हाम
खिमबे? खडाजि ॥ मोबे? माहाजिडे? निवे?यु खे?लो लु:माबे? मोबे?
टुघुबा बे?लो यहुदिजिनुड हाइखा जातिजिडे?सो परभु येसुबे? बिस्वास
लेटुजि ॥ 2 तर बिस्वास मेले:?खु यहुदिजिडे? चाहि मोबे?हा हाइखा
जातिजि चोम्नुड परभुबे? बिस्वास ले:?खुबा वावा निसाजिमि बिरोध
ले:पोगुजि ॥ 3 मोडोक्सो पावलनुड बारनाबास मो सहरबे? बे?लो याक
पेनाजि ॥ खोजिडे? परभुमि निडबे? बिस्वास ले:?नुड परभुमि परचार
ले:टुजि ॥ परभुडे? खोजि खरि खरिहा योम्बोक ले:मे सक्ति पि:नुड
खोजिडे? अनुग्रहनुडहा बचन वैबानो?हा लु:नुड पक्का ले:पे?टु ॥ 4 मो
सहरबे?हा या?मिजि निच्चि खालहा हुल लिसामि आढा एप्पा
चोडसाजिलाम, आढा यहुदिजिलाम लिसामि ॥ 5 मोबे? हाइखा जातिहा
या?मिजिनुड बिरोध ले:खुबा यहुदिजि मोबा खोजिमि अगुवाजिनुड
टोडनुड पावलनुड बारनाबास रुडगो?वाडे? ए?नेमा लु:नुड मोत्ता
ले:टुजि ॥ 6 तर इगो खा पावलनुड बारनाबासडे? खेमडोवनुड खोजि
मोबाड चिखे?नुड लुकोनिया ठाउबे?ए लुस्त्यानुड डरबि लु:मे सहरबे?

खडाजि ॥ ⁷ खोजिडे? मो निट्ठि सहरनुड मोमि कि?यु मि?यु सि?इहा
ठाउराजिसो सुसमाचार परचार ले:टुजि ॥

लुस्त्यानुड डरबि सहरबे?

⁸ लुस्त्या सहरबे? इक्को सोगुबा या?मि पेने ॥ खो टोक्पा?आबाडनो?

सोगुबा ले:टा खो इन्डोक्पे?सो मेराम्बा?आ लेटे ॥ ⁹ पावलडे? इ:बा?आ
खा खोसे? नुरो? खेम्मे?निडसिडुए ॥ पावलडे?सो खोमि नजिक्पे?

नुरो? खाक्सु ॥ “मो या?मिडे? कासो नुबोक्हेडे” लु:नुड बिस्वास

ले:न्डुएले लु:नुड पावलडे? लेडोक्टु ॥ ¹⁰ पावलडे? बे?ए सेम्ले? लु:सु,

“येपोक्नुड टाडबामि सराडबे? येबे ॥” इडो? लु:बा?आ खेम्मेसोरो? मो
या?मि सुवाक्टो? येपोक्नुड रम्बोणा ॥

¹¹ पावलडे? ले:पा?आ इडो?मा योम्बोक खाडनुड मोबे?हा

या?मिजिडे? खोजिमि लुकोनिया खाप्लाबे? इडो? लु:बोगुजि,

“देबताजिगो या?मि लिनुड कानिडबे? लेडइटामि ॥” ¹² खोजिडे?

बारनाबास जिउस लु:मे देबता मि?टुजि मोबा पावलडे?नो? या?लो परचार

ले:पा?आसे? खोनो? हरमेस लु:मे एप्पा देबता मि?टुजि ॥ ¹³ जिउस लु:मे

देबतामि मन्दिर मो सहरमि केक्पे?नो? टुसे ॥ मो मन्दिरमि याडाडबाडे?

उडमि मालानुड बोर गोरु टिडमानुड सहरमि रम्डेम्बे? लेन्डा ॥

माहाजिडे? बारनाबासनुड पावलामि पोम्बे? माहा बोर गोरुजि भोग

पि:मामि पोरोगुजि ॥

¹⁴ इगो खा लेडोक्नुड बारनाबासनुड पावलडे? हागो ने?निबा योम्बोक

लिसि?पोरोणा लु:नुड दु:ख मिन्साड निप्पाडे? खोजिमि चे? ना:क्साड

या?मिजिमि रुम्बे? पिडघे?नुड इडो? कासाजि, ¹⁵ “ने?नि, हेनिडे? इगो

इमाडडे ले:?मामि पोरो?इटानुमे ? कानिडसोड हेनिडडो? दु:ख सुख
आडघुबा या?मिनो? ले:न्डडमा ॥ कानिड गो हेनिड निवाहाडबे?
टेआप्मामि सुसमाचार खेम्मे?सि लेडइटिडमे ॥ इघा योम्बोक मे?निडहा

खा ले?पेनुड, नान्दरुडमा, माहोडमानुड मक्खाम्डेम मोबे? टुहा चोप

टोडखुबा हिडगरिक निवाहाडमि सेवा ले:?मा खेये ॥” ¹⁶ उहिलेहा
या?मिजिगो निवाहाडडे? खोजिमि खुसि ले:?टुजिरो लु:नुड योडमे?टुजि

॥ ¹⁷ खोसे? गो सानिडनो? नुबानुड भलाइमि योम्बोक
ले?मे?निडसिन्डुए ॥ खोसे? नान्दरुडमाबाड ठिक बेलाबे? वारि

लेम्मेन्डुए, मोबाड बे?लो उब्जनि पि:ये, या?मिजि चामाया खा जुटबा
ले:?पिये ॥ या?मिजिमि निडा खुसिडे? टि?मिन्डुजे ॥ इडो? निवाहाडडे?

खोमि योम्बोकडे?नो? खोमि साविछ पि:न्डुए ॥” ¹⁸ इघा खा लु:साड
बारनाबासनुड पावलडे? खोजिमि लागि भोक टिमा पोरोक्पा?आ योम्बोक
याप्चे? सेवहेसाजु ॥

¹⁹ मोबा एक्साड एन्टिओखियानुड आइकोनियन सहरबाड आढा
यहुदिजि मोबे? लेस्सामि ॥ माहाजिडे? या?मिजि चोम्नुड पावल
रुडगो?वाडे? फेडनुड से?नेमे?टुजि मोबा सिघडा मि?नुड खो

से?खे?नुड सहरबाड पाखे?यु राप्पेसुजि ॥ ²⁰ तर परभुमि चोडसाजि

लेन्नुड पावलमि कि?यु मि?यु सुम्माबे?, खो येपोक्नुड मो सहरलामनो?
खडा ॥ वगियाराम बारनाबासनुड दरबि सहरबे? खडाजि ॥

पावलनुड बारनाबास सिरियामि एन्टिओखियाबे? टेसाजि

21 पावलनुड बारनाबासडे? मोबे? सुसमाचार परचार ले:नुड बे?लो या?मिजि परभुमि चोडसा टोक्सुजि ॥ मोबा एक्साड खोजि लुस्त्यानुड आइकोनियनमि राम लिसाड पिसिदिया ठाउमि एन्टिओक सहरबे? टेसाजि

॥ 22 खोजिडे? मो ठाउबे?हा परभुबे? बिस्वास ले:खुबाजि बलियो

टोडसाड नुबा अरति पि:सुजि ॥ “निवाहाडमि राज्यबे? रुक्मा या?लो

कानिडे? खेनुड कस्ट आडमानो? खेये’ लु:नुड इ:डुजि ॥ 23 मोबा पावलनुड बारनाबासडे? चोप सेवा खिमबे? अगुवाजि भरन युडबे?टुजि मोबा मेन्जारे? पारथना ले:साड माहा चोडसाजि ताडबे? बिस्वास

ले:पा?आ परभुबे? खोजि युक्सुजि ॥ 24 पिसिदिया ठाउ लिसाड खोजि

पामफिलिया ठाउबे? टेआबाजि ॥ 25 खोजिडे? परणा लु:मे ठाउबे?सो परभु येसु खिरिस्टमि टुम्बे? परचार ले:टुजि ॥ मोबा खोजि अटालिया सहरलाम युसाजि ॥

26 मोबाड माहाजि बे?ए योडा खोडबे? साडनुड एन्टिओखिया सहरबे? टेसाजि ॥ इगो एन्टिओखिया सहरबे?हा परभुबे? बिस्वास ले:खुबा वावानिसाजिडे? पावलनुड बारनाबास निवाहाडमि अनुग्रहबे? युडनुड खोजि सुसमाचार परचार ले:मे योम्बोकपे? पाडबा?आ ले:टे ॥ खोजि मो

योम्बोक ये?नुड मो ठाउबे?नो? टेसाजि ॥ 27 एन्टिओखियाबे? टेनुड एक्साड पावलनुड बारनाबासडे? सेवा खिमबे?हा चोप बिस्वासिजि केडुजि ॥ निवाहाडडे? खोजिबाड इन्डो?हा योम्बोक ले:टुएनुड खोसे? हाइखा जातिजिडे?सो बिस्वास ले:हेमे रम्डेम हेम्बे?टुजि लु:मे खा

खोजिडे? माहाजि खेम्मे?टुजि ॥ 28 मोबा एक्साड खोजि बे?लो याकरो एन्टिओखियाबे?हा बिस्वासिजिनुड पेनाजि ॥

15

यरुसलेममि यहुदिजि सुम्ढाम खिम

¹ मोबा एक्साड आढा या?मिजि यहुदिया ठाउबाड लेन्नुड एन्टिओखिया
सहरबे?हा बिस्वासिजि इडो? इ:पोगुजि, “मोसाडे? साप्पा?आ यहुदि
धारमिक नियमडो? खतना मेले:टानुम्होड हेनिडे? मुवित चुप्हेसानुम्नि
॥” ² इडो?मा खालहा सिक्छे खेम्नुड पावलनुड बारनाबास माहाजिनुड
बे?लो काघुसे? चुसाजि ॥ मोडोणे? मोबे?हा वावाजिडे? पावल,
बारनाबासनुड हाइखा इन्डोकजनाजि इगो खामि फैसला ले:सि?
यरुसलेमबे? पेडघुबा एप्पा चोडसाजिनुड सेवा खिमबे?हा एलडरजिबे?
खे?मे निधो ले:टुजि ॥

यरुसलेममि बे?ए सभा

³ सेवा खिमबे?हा बिस्वासि वावानिसा नानुसाजिडे? खोजि रामबे?
पाप्मिहा खा सहायता ले:नुड बिदा ले:टुजि ॥ पावलनुड बारनाबास
फोनिके लु:मे ठाउनुड सामरियाबाड खडाजि ॥ इडो? खे?माबे? खोजिडे?
ठाउ ठाउबे?हा बिस्वासि वावानिसाजि हाइखा जाति या?मिजिडे?सोड
बिस्वास ले:पा?आ लु:मे खा खेम्मे?टुजि ॥ मो खा खेम्खुबा
वावानिसाजि बे?लो साप्थावसामि ॥ ⁴ खोजि यरुसलेम सहरबे? लेम्माबे?
परभुबे? बिस्वास ले:खुबा मोबे? टुघुबा वावानिसाजि, एप्पा चोडसाजिनुड
सेवा खिमबे?हा अगुवाजिडे? स्वागत ले:टुजि ॥ मोबा एक्साड पावलनुड
बारनाबासडे? मोबे? सुम्बा?आजि चोप या?मिजि खोजिबाड निवाहाडडे?
ले:पा?आ योम्बोकमि खा लु:बे?टुजि ॥ ⁵ माहा खा खेम्नुड परभुबे?
बिस्वास ले:खुबा आढा फरिसि हुलबे?हा या?मिजि चाहि येपोवनुड इडो?

लुःसुजि, “हाइखा जातिजिबाड चोडसा लिघुजिडे? यहुदि रितिबे? लुःडिडो? खतना लेः?मानो? खेये ॥ मोबा मोसाडे? पिःबा?आ यहुदि धारमिक नियम चोप पालन ले?मे?मा खेम्मे ॥”

⁶ मोडोणे? एप्पा चोडसाजिनुड सेवा खिमबे?हा एलडरजि सुम्नुड इगो खामि टुम्बे? छल्फल् लेःटुजि ॥ ⁷ मोबे? बे?लो खा लिबा?आसे? पत्रुस येपोवनुड लुःसु, “होउ वावानिसाजि, हेनिडे? लेन्डानुम, हाइखा जातिजिडे? परभु येसुमि सुसमाचार खेम्नुड बिस्वास लेःटुमियो मोबा माहाजिडे? मुवित टोगुमियो लुःनुड निवाहाडडे? का हेनिडमि रुम्बाडनो? बे?लो या?लो सेम्बा?आ लेटे ॥ ⁸ चोप या?मिमि निडा मि खा लेखुबा निवाहाडडे? हाइखा जातिहा या?मिजि पबित्रा होडनिडा कानिड पिःडिडो?नो? खोजिसो पिःनुड टाडबामि या?मि टोडबा?आ खा खाडमुसु ॥ ⁹ निवाहाडडे? हाइखा जातिजिनुड कानिड यहुदिजिमि रुम्बे? इमाडसो भेदभाव मेलेःटुजि ॥ खोजिडे?सो निवाहाडबे? बिस्वास लेः?पा?आसे? खोजिमि निडा चोखो टोडबे?टुजि ॥ ¹⁰ हागो लेः?मा छा?इये यहुदि चलन हाइखा जातिहा या?मिजि लेः?मे?नुड कानिडे? इन्ढोड निवाहाड सुरके?मे?मे ? इगो चलन गो कानिडमि टुबा लाबाजिडे?सो मेलेः?हेसुजि मोबा कानिडे?सो मेलेः?हेसुडमा ॥ ¹¹ आक्टो? एलेः?मा, कानिडे? लेन्डुडमा, कानिडे? परभु येसुबे? बिस्वास लेः?नुड खोमि अनुग्रहडे? मुवित चुप्डुडमे ॥ मोडो?नो? खोजिडो?सो मुवित चुप्डुजे ॥”

¹² मोडोक्पे? चोप योड उगामि मोबा बारनाबासनुड पावलडे? खोजिबाड निवाहाडडे? लेः?पा?आ खारिहा योम्बोकनुड खारिहा खामि टुम्बे? हाइखाजातिजिमि रुम्बे? इःमाबे? सुम्बा?आ बे?हा या?मिजिडे? निडा

टिनुड खेप्सुजि ॥ ¹³ मोबा माहाजिडे? लु:से?नुड एक्साड याकुबडे?

येपोवनुड लु:सु, “होउ वावा निसाजि, केए खा खेप्सानुमे! ¹⁴ निवाहाड खोम्दाडबे? हाइखा जातिजिमि निडाबे? योम्बोक ले:नुड माहाजि खोमि या?मिजि टोक्सुजि ॥ इगो खागो सिमोन पत्रुसडे? हागोनो? हेनिड

लु:बेटे ॥ ¹⁵ इगो खागो अगमबक्ताजिडे? इ:बा?आ खानुड टोडइये ॥

धारमिक साप्तिराबे? इडो? साप्पा?आ ले:ये,

¹⁶ ‘मोबा एक्साड का टे:घे?नुड दाउदमि काडघे?पा?आ पेन्ढाम फेरि येपोवइनुडे ॥

मोबा योघे?पा?आ खिम आडइनुडेनुड के? फेरि खोमि राज्य^w सवितसालि टोडइनुडे^x ॥

॥ ¹⁷ एम्बा?आ चोप या?मिजिडे? परमपरभु योवहेसुमिरोनुड के? टाडबाड टोडमामि के?पा?आ हाइखा जातिहा या?मिजिसो काबे?

लेम्मिरो, ¹⁸ लु:नुड परभु निवाहाडडे? लु:ये ॥ खोसे? बे?लो या?लो इगो खा इ:बा?आ लैटे ॥’

¹⁹ मोबा याकुबडे? इ:बोगु “मोडोगे? निवाहाडबे? लेडघुबा हाइखा जातिहा या?मिजि दु:ख ए?पि:माजि लु:नुड के? मिड्टुडे ॥ ²⁰ तर खोजि इडो? लु:नुड इक्को पत्रा साप्हाडमा, खोजिडे? मुरतिबे? वे?टिबा?आ इमाडसो एच्चामिरो, बेभिचारबाड ओ:नो? पेम्मिरो, मोबा चोर फिन्नेबा?आ जन्तुमि सा एच्चामेनुड इमाडमिसो हारि एच्चामिरो ॥

²¹ इन्डो?होड मोसाडे? साप्पा?आ यहुदि धारमिक नियमगो या?लोएम्बाडनो? चोप सहरबे? परचार लिमे?निडसिये सानिड नाजामे

याकपे? यहुदिजि सुम्हाम खिमबे? ने?पा?आ चोबे? खेमडुजे मोडोणे? सहरबे?हा या?मिजिडे? लेबेटुजे ॥”

बिस्वास ले:खुबा हाइखा जातिजि साप्पा?आ साप्चिरा

²² मोडोणे? एप्पा चोडसाजिनुड सेवा खिमबे?हा एलडरजिडे? परभुबे? बिस्वास ले:खुबा वावा निसाजिनुड टोडनुड निप्पाड या?मि सेनुजि ॥

मोबा खोजिडे? मो निप्पाड या?मिजि पावलनुड, बारनाबासनुड सोरि एन्टिओखिया सहरबे? पाडमे निधो ले:टुजि ॥ मो निप्पाड या?मिजि बारसाबास लु:मे यहुदानुड सिलास लेटाजे ॥ परभुबे? बिस्वास

ले:खुबजिबे? खोजि निप्पाड चाहि अगुवा ले:टाजे ॥ ²³ मो रिबाडमि

हुवपे? इडो?मा साप्चिरा पाडहाक्सुजि, - “एन्टिओखिया, सिरियानुड किलिकियाबे? टुघुबा परभुबे? बिस्वास ले:खुबाजि कानिड यरुसलेमबे?हा

एलडरनुड एप्पा चोडसाजिबाड सेवा मुसिडमायो ॥ ²⁴ कानिडबाड खे?पा?आ आढा या?मिजिडे? टेडिगरिवहा सिवछे खेम्मे?नुड हेनिड दु:ख पिसामिरो लु:मे खा कानिडे? खेप्सुडमा ॥ तर माहाजि कानिडे?

पाडबा?आ ने?निहाजि ॥ ²⁵ मोडोणे? कानिडे? नुरो? छलफल ले:नुड या?मिजि सेन्नुड कानिडे? नामनाम ले:पा?आ बारनाबासनुड

पावलनुड सोरि मोजिसो पाडमे निधो ले:एटुडमे ॥ ²⁶ पावलनुड बारनाबास कानिडमि परभु येसु खिरिस्टमि सेवा ले:माबे? एडे?वे? मेसिघडाजि ॥

²⁷ इगोजिनुडनो? कानिडे? यहुदानुड सिलाससो हेनिडबे? पाडइटुडमे ॥

कानिडे? साप्पा?आ खा खोजिडे?सो हेनिड इ:बेम्मे ॥ ²⁸ पबित्रा होडनिडानुड कानिडे? ले:मामि इघा खाबाड हाइखा खा हेनिड

ले:मे?मा कानिडे? मेमि?टुडमा- ²⁹ माहा इघानो? लेहा खा चाहि

इघानो? लेहा- मुरतिबे? चे?टिबा?आ ए?चामे, इमाडमिसो हारि ए?चामे, बे?ला यिडनुड से?नेबा?आ जन्तुमि सा ए?चामे मोबा व्यभिचारबाड ओ: पेम्मे ॥ इघा खा पालन ले:टानुम्होड हेनिड नुबा लिये ॥ कानिडे? तु:मे खा इघानो? यो: ॥”

³⁰ मोबा एक्सड माहा रिबाड वावानिसाजि मो साप्पा?आ पत्रा याडनुड एन्टिओखिया सहर खडामि ॥ मोबे? माहाजिडे? चोप बिस्वासिजि इक्को ठाउबे? सुम्नुड मो पत्रा पि:सुजि ॥ ³¹ मो पत्राबे? सप्पा?आ हौसलानुडमा खा खेम्नुड चोप साप्थाक्सामि ॥ ³² यहुदानुड सिलास खोजिटाडबासो अगमबक्ता ले:?टाजे ॥ खोजिडे? बिस्वासि वावा निसाजि सहास पि:नुड बिस्वासबे? बलियो टोक्सुजि ॥ ³³ इ?याक नियाक मोबे? पेन्नुड मोबे?हा वावा निसाजिडे? खोजि नुरे? खडानिडे तु:नुड बिदा लिसामि मोबा खोजि पाडघुबाजिबे? टेखडामि ॥ ³⁴ [तर सिलास चाहि मोबे?नो? पेम्मा मिना] ³⁵ पावलनुड बारनाबासडे? एन्टिओखियाबे? हाइखा बे?लो या?मिजिनुड टोडनुड परभुमि सिक्छे पि:साड परचार ले:टाजु ॥

पावलनुड बारनाबास फावखे?पा?आ

³⁶ एडे? एक्सड पावलडे? बारनाबास तु:सु, “हागो कानिडे? निवाहाडमि खा परचार ले:?पा?आ चोप सहरबे? फेरि खे?मा ॥ मोबे?हा टुघुबा परभुबे? बिस्वास ले:?खुजि इन्डो? लेम्मे चुप्खाडमाजि ॥” ³⁷ मोबा बारनाबासडे? मरकुस तु:मे युहन्नासो सोरि चि?खे?मा मि?टु ॥ ³⁸ तर पावलडे? मरकुस चि?खे?मा मेमि?टु इन्डो?होड खोसे? या?लोसो निवाहाडमि योम्बोक मेये?ले? खोजि या:?यानुड खो पामफिलिया तु:मे

ठाउबाड टैघे?पा?आ लेटे ॥ ³⁹ मो खाबे? पावलनुड बारनाबासमि रुम्बे?
बे?लोनो? खा लिसा मोबा खोजि फक्खडाजि ॥ बारनाबासडे? चाहि
मरकुस चिवमानुड माहोडमामि राम लिसाड साइप्स लु:मे पोडबोडलाम

खडा ॥ ⁴⁰ मोबा पावलडे? चाहि खोमि लागि लाडगाम सिलास सेनु ॥
मोबा एक्साड खोजि बिस्वासि वावा निसाजिडे? परभुमि अनुग्रहबे?

युक्सुजि मोबाड खोजि बिदा लिनुड खडाजि ॥ ⁴¹ खोजि सिरियानुड
किलिकियामि लु:मे ठाउ लिसाड खे?माबे? मोबे?हा सेवा खिमिम
बिस्वासिजि बिस्वासबे? बलियो टोडआसाड खडाजि ॥

16

पावलनुड सिलासडे? तिमोथि चुप्पा?आ

¹ पावल डरबि सहर लिसाड लुस्त्या सहरबे? लेन्डा ॥ मोबे? तिमोथि
लु:मे इक्को बिस्वासि पेने ॥ खोमि मामासोड परभुबे? बिस्वास ले:?खुबा

यहुदि लेटे, तर खोम्बा चाहि गिरिक जातिमि लेटे ॥ ² लुस्त्यानुड
आइकोनियनबे?हा चोप बिस्वासि वावानिसाजिडे? तिमोथि नुबा या?मि

मि?टुजे ॥ ³ पावलडे? तिमोथिसोड चि?खे?मा मि?टु ॥ मोबा मोबे?हा

यहुदिजि बाधा ए?सि?लो लु:नुड पावलडे? तिमोथिमि खतना ले:?पे?टु,
इन्डो?होड तिमोथिमि पाबा गिरिक लेटे लु:मे खा मोबे?ए चोप यहुदिजिडे?

लेसुजे ॥ ⁴ मोबा एक्साड खोजि सहर सहरबे? खे?नुड परभुमि चोप
चोडसाजि यरुसलेमबे?हा एप्पा चोडसाजिनुड सेवा खिमबे?हा

एल्डरजिडे? टोडबा?आ रितिडो? लेटानुमे लु:नुड लुसाजु ॥ ⁵ इडो? सेवा

खिमबे?हा या?मिजिमि बिस्वास जना नुबा लिघडा, मोबा परभुबे?

बिस्वास लेः? खुबा या? मिजि बे? लो लिः घडामि ॥

पावलडे? तोरआस सहरबे? माक्पा? आ सेन्जि? माड

⁶ पबित्रा होडनिडाडे? पावल, सिलासनुड तिमोथि एसिया ठाउबे? सुसमाचार परचार लेः? सि? सेक्पा? आसे? खोजि फ्रिगियानुड गलातिया

लुःमे ठाउ लिसाड खडामि ॥ ⁷ खोजि माइसिया लुःमे ठाउमि केक्पे? रुक्नुड बिथिनियाराम खे? मे निडा लेः टुजि ॥ तर येसुमि होडनिडाडे?

खोजि मोबे? सो मेडखे? मे? टुजि ॥ ⁸ मोडोणे? खोजि माइसियाबाड

ओडलाम वाबोक्लामि केक्पे? ए तोरआस लुःमे सहरबे? युसामि ॥ ⁹ मो सेन्डानो? पावलडे? परभुबाड इक्को सेन्जिसेम्माड चुप्टु ॥ खोसे? माकेडोनिया ठाउबि? ए इक्को या? मिडे? येः प्नुड इडो? लुःसाड बिन्ति

लेः? पा? आ खाडडोक्टु, “माकेडोनिया आप्नुड कानिड सहायता लेः? मा

॥” ¹⁰ पावलडे? इडो? मा सेन्जिसेम्माड मक्मा सोरोवनो? कानिड रिबाड

माकेडोनियालाम खे? मामि पोरोगिडमा, इन्डो? होड मोबे? हा या? मिजि परभुमि सुसमाचार खेम्मे? सि? निवाहाडडे? नो? के? पा? आ लेः ये लुःनुड कानिडे? लेसुडमा ॥

लिडियामि बिस्वास

¹¹ मोडोणे? कानिड तोरआसबाड योडा जहाजबे? साडनुड मेएरेड सामोथ्राके लुःमे पोडबोडबे? खाडिडमा ॥ मोबा वागियाराम नियापोलिस

सहरबे? रुक्नुडमा ॥ ¹² मोबाड कानिड रम्नुड माकेडोनियामि बे? एम्मा सहर फिलिपिलाम खाडिडमा ॥ मो सहर रोमिजिमि अधिनबे? टुसे ॥

मोबे? कानिड इ? याक नियाक पेनिडमा ॥

13 यिवामि केक्पे? प्रारथना ले?ठाम ठाउ होला मि?नुड कानिड नाजामे याक्पे? मोबे? खाडिडमा ॥ मोबा मोबे? सुम्बा?आ मे?ना?मिजिनुड खा इ:बोगिडमा ॥ 14 मोबे? कानिडमि खा खेम्खुबाजिबे? लिडिया निड ले:खुबा इक्को राडमि मे?ना?मि टुसे ॥ खो थिआटिर लु:मे ठाउबि?ए लेटेनुड खो बैजनि रडमा चे? इन्जामे योम्बोक लेटे ॥ खो निवाहाडमि सेवा ले:खुबा मे?ना?मि लेटे ॥ पावलडे? लु:बा?आ खा खेमनुड बिस्वास ले:टुरो लु:नुड परभुडे? खोमि निडा हेम्बेबे?टु ॥ 15 बिस्वास ले:नुड लिडियानुड खोमि चोप खिम जहानजिडे? बप्तिस्मा लासुजि ॥ मोबा खोसे? कानिड खोमि खिमबे? पेम्मे बिन्ति ले:साड कानिड लु:सा, “चैबानो? हेनिडे? का परभुबे? बिस्वास ले:पा?आ निसा मिइन्डानुमेहोड काडमि खिमबे? आप्नुड पेम्बे?माजे ॥” इडो? खोसे? खोमि खिमबे? खे?मा लु:नुड कानिड कर ले:टा ॥

पावलनुड सिलास तिरोडगा खिमबे?

16 इ?याक कानिड पारथना ले:सि? खे?माबे? रामबे? इक्को सेउतेनि चुप्टुडमा ॥ खो माडे?मा चाबे? रा:प्पा?आ लेटे मो माडे?मा चापमि सवितडे? खोसे? हाइखा या?मिजिमि भाग्यमि जोखना खाडबे?नुड खोमि मालिकजि बे?लो याड टोडनुड पि:सुए ॥ 17 हागो मोसे? पावलनुड कानिड टिडसाड इडो? काबोगा, “इघा या?मिजि बे?ए निवाहाडमि या?मिजि लेम्मे ॥ इघाजिडे? मुवित चुप्टुडानुमे लु:नुड परचार लेण्डुजे ॥” 18 मोसे? बे?लो याक मोडो? कासा ॥ मोबा इडो? बे?लो याक काबा?आसे? पावल डिजो मि?नुड मो मे?ना?मिताम हिडघे?नुड माडे?मा चाप इडो? लु:साड योबु, “येसु खिरिस्टमि निडबे? हेड आग्या

पिन्ने, हेड इगो मे?ना?मिबाड खे?पेसे ॥” पावलडे? इडो?
लु:मासोरोवनो? मो माडे?मा चाप खे?पेसा ॥

¹⁹ तर खोमि मालिकजिमि याड् टोडमे राम मेखे?पा?आ लेडोवटुजि मोबा
माहाजिडे? पावलनुड सिलास रा:पुनुड से?साड मो सहरमि सासकजिबे?
लाघे?टुजि ॥ ²⁰ इडो? पावलनुड सिलास सहरमि रोमि एप्पा हाकिमजिमि
पोम्बे? ये:मे?साड इडो? लु:सुजि, “इघा यहुदिजिडे? कानिडमि सहरबे?
हुल-दडगा ले:नुड कानिड दु:ख पि:मे?निडसिममे ॥ ²¹ इघाजिडे?
कानिडमि रोमि नियममि टेडिगरिवहा रिति बिधि इ:मे?निडसिन्दुजे ॥”

²² मोडोवपे?नो? मोबे? सुम्बा?आ या?मिजि पावलनुड सिलासबे?
पेडिघडामि ॥ मोबे?हा एप्पा या?मिजिडे? पावलनुड सिलासमि चे?
ना:वनुड राप्पेबे?टु मोबा कोरराडे? सा:बानुमे लु:नुड आग्या पि:सुजि ॥

²³ मोबा खोजि बे?लो मो:वनुड पावलनुड सिलास तिरोडगा खिमबे?
चि?खे?नुड इगो निप्पाड या?मिजि मेले?खे?लो नुरो? सेगानुमो लु:नुड
मोबि?ए एप्पा लु:ओसुजि ॥ ²⁴ इगो आग्या टोवनुड तिरोडगा खिमबे?हा
एप्पाडे? मोजि चोप्पाड होडसि?युए कोठाबे? चि?खे?नुड साराडबे?
सिडभुमि ठिडगुरो ठागुजि ॥

²⁵ सेन्डा पावलनुड सिलास पारथना ले:साड निवाहाडमि सेम
सेम्लु:साड ओहाड ले:मे?निडसिडाजि ॥ हाइखा कैदिजिडे? चाहि

खेम्मे?निडसिडामे ॥ ²⁶ मोडोवपे?नो? हाजोवटो? किरिसमारोमा बे?ए
रु?मि खे?नुड तिरोडगा खिममि चारनो? सोवसा ॥ चोप रम्डेम हेम्बोगा

मोबा चोप कैदिजि हि:वपा?आ कोड हेडघडा ॥ ²⁷ एप्पा हुम्बुगा तिरोडगा
खिममि चोप रम्डेम हेम्बा?आ खाडडोवटु ॥ चोप कैदिजि चि:खाडामि

होला मि?नुड खोसे? सिप्पा?आ ताब्या रिक्नुड चेन्सिघे?मा योगा ॥

²⁸ इगो खाडनुड पावलडे? मो इडो? लु:सु, “होउ हजुर, आवटो? एलेटे कानिड चोप इगोबे?नो? टुन्डिडमा ॥”

²⁹ इडोवमा खा खेमनुड मो एप्पा उ:प्तिरा डाक्नुड पिडसाड होडसि?यु?नुड खो किरिसमानुड पावलनुड सिलासमि सराडबे? ओप्नुड सेवा मुसु ॥ ³⁰ मोबा एक्साड मोसे? खोजि पाखे?यु लाप्नुड सिप्सुजि,

“के? पापबाड छुटकारा चुप्पामि इमाड ले:?मा खेये ?”

³¹ खोजिडे? लु:साजु, “परभु येसुबे? बिस्वास लेटे मोबा हेडनुड हेनेहा खिमबे?हाजिडे? मुक्ति टोइन्डानुमे ॥” ³² मोबा पावलनुड सिलासडे?

परभुमि बचन खोनुड खोमि खिमबे?हाजि खेम्मे?टुजि ॥ ³³ मोबा एक्साड मो हाकिमडे? सेन्डानो? पावलनुड सिलास चिक्खे?नुड खोजिमि हुवा वासोक्पे?टु ॥ खोनुड खोमि खिमबे?हाजि चोबे? बप्तिरमा लासुजि ॥

³⁴ मोबा एक्साड पावलनुड सिलास खोमि खिमबे? चि?खे?नुड चामा हिवसुजि ॥ खोनुड खोमि खिमबे?हाजिडे? निवाहाडबे? बिस्वास ले:?पा?आसे? बे?लो माहाजि आनन्द मिनामि ॥

³⁵ वगियाराम मा?मि सहरबे?हा एप्पाजिडे? पावलनुड सिलास तिरोडगा खिमबाड लेप्पेसानुमे लु:मे आग्या पि:नुड येजाडजि पाक्सुजि ॥ ³⁶ मोबा

तिरोडगा खिमिब?ए हाकिमडे? पावल इडो? लु:सु, “सहरबे?हा एप्पाजिडे? हेडनुड सिलास ले?हाडमे लु:नुड लाम्बावा पाडइटामे ॥ मोडोणे? हेन्जिड नुरो? खडाजे ॥”

³⁷ तर पावलडे? माहा लाम्बावा लाजे?खु येरिडजि लु:सुजि, “कानिड

रोमि जन्ताजि लेन्डिमाहोडसोड इघाजिडे? इमाडसोड दोस मे?निडनो?
या?मिमि रुम्बे? कानिड हे:रो कोरराडे? पेगामि ॥ मोबा फेरि तिरोडगा

खिमबे?सो सेगामि ॥ आयु खुस्तिरड लेप्पेमा योइम्मे ? कानिड
खडिडमानि ॥ माहा आग्या पि:घुबा एप्पाजिडे?नो? लेन्नुड कानिड ले?मा
खे:ये ॥”

³⁸ मोबा पावलडे? लु:बा?आ खा येरिडजिडे? माहा एप्पाजि खेम्मे?टुजि ॥
माहाजिडे? पावलनुड सिलास रोमि जन्ताजि लेम्मे लु:नुड ले:डोवनुड

माहाजि कि?सिडामि ॥ ³⁹ मोबा माहाजि मोबे? लेन्नुड मोजिनुड आम्लाड
डा:वनुड मोजि तिरोडगा खिमबाड पाखे?यु चि?खे?नुड बिन्ति ले:टुजि

‘हागो इगो सहरबाड हेडजिड खे?पेसाजे’ ॥ ⁴⁰ मोबा पावलनुड सिलास
तिरोडगा खिमबाड ले?खे?नुड लिडियामि खिमबे? खडाजि ॥ खोजिडे?
मोबे?हा बिस्वासिजि चुप्नुड बिस्वासबे? नुरो? निडा टिमे लु:नुड आट
पि:आनुड मोबाड खोजि खडाजि ॥

17

पावलनुड सिलास थेसलोनिके सहरबे? चुडजाघुजि

¹ पावलनुड सिलास अम्फपोलिसनुड अपोल्लोनिया सहर लिसाड
थेसलोनिके सहरबे? रुवटाजु ॥ मोबे? यहुदिजि सुम्हाम खिम टुसे ॥

² सानिडडो?नो? पावल यहुदिजि सुम्हाम खिमबे? खडा ॥ खोसे? सुम
याकनो? नाजामे याकपे? मोबे?हा या?मिजिनुड धारमिक साप्तिराबाड

नुरो? खा इ:सु ॥ ³ खोसे? धारमिक साप्तिराबे?ए खा चैबानो? ले:ये

लु:नुड नुरो? लु:बे?टुजि, “छुटकारा पि:घुबा हाडबा खिरिस्टडे? खे
आडनुड सिमा खाडेनुड फेरि हिडबोवमा खाडे ॥ इगो के? इ:बा?आ

येसुनो? छुटकारा पिःघुबा हाडबा खिरिस्ट लेये ॥”⁴ इडो? खोमि खा
खेम्नुड आढा यहुदिजिडे? परभुबे? बिस्वास लेःटुजि ॥ मोडो?नो?
निवाहाडमि ओहाड लेः?खुबा बे?लो गिरिक जातिजिनुड एप्पा एप्पा
मे?ना?मिजिडे?सोड बिस्वास लेः?नुड पावलनुड सिलास टोडआबामि ॥

⁵ तर हाइखा यहुदिजिडे? चाहि खोजिनुड चेजेवा लेः?नुड मो सहरबे?हा
माडे?हा या?मिजि सुम्नुड सहरबे? बे?ए हुल-दङगा लेः?मे?टुजि ॥
माहाजिडे? पावलनुड सिलास चिआप्नुड या?मिजिमि पोम्बे? येःप्मे?मामि

यासोनमि खिमिस?यु काक्स? माहाजि पेः?युसामि ॥⁶ तर माहाजिडे?
पावलनुड सिलास मोबे? मेन्वुट्टुजि ॥ मोडोणे? यासोननुड परभुबे?
बिस्वास लेः?खुबा हाइखा वावानिसाजि राःप्नुड से?खे?टुजि ॥ माहाजि

सहरमि हाकिमजिबे? लाजे?नुड इडो? लुःसुजि, “इघा मावखाम्डेम्बे? हुल

दङगा लेः?खुबा या?मिजि कानिडमि सहरबे?सोड लेडइटामे⁷ इगो
यासोनडे? माहाजि खिमबे? कुनुड युडइटुजेले ॥ माहाजिडे? रोमि
हाडबामि हुकुम मेडखेम्ले? येसु लुःमे हाइको हाडबा टुःये लुःनुड लुःनुजे

॥⁸ इगो खा खेम्नुड मोबे? सुम्बा?आ या?मिजिनुड सहरबे?हा हाकिमजि

अलमल लिसामि ॥⁹ एक्साड माहाजिडे? यासोननुड हाइखा वावानिसाजि
धरौटि लानुड ले?हाक्सुजि ॥

पावलनुड सिलास बेरिया सहरबे?

¹⁰ मोबा सेन्डा लिमासोरोवनो? परभुबे? बिस्वास लेः?खुबा
वावानिसाजिडे? पावलनुड सिलास बेरिया सहरलाम पाडहाक्सुजि ॥ मोबे?

रुवनुड खोजि यहुदिजि सुम्हाम खिमबे? खडाजि ॥¹¹ मो बेरिया लुमे
ठाउबे?हा या?मिजि थेसलोनिके ठाउबे?हा या?मिजिबाड बे?लो नुबा

लेटामि ॥ माहाजिडे? निवाहाडमि बचन सारोनो? नुबा मि?नुड नुरो?
खेप्सुजि ॥ माहाजिडे? पावलडे? लु:बा?आ खा धारमिक साप्चिराबे?हा
खानुड टोडइहा टोडनिहा लु:नुड सानिडनो? ने?नुड जाच ले:टुजे ॥

¹² बे?लो यहुदिजिडे? बिस्वास ले:टुजि ॥ मोबा निड मुक्पा?आ गिरिक
जातिहा वाडाडपसानुड मे?ना?मिजिडे?सोड बिस्वास ले:टुजि ॥

¹³ तर थेसलोनिकेबे?हा बिरोध ले:?खुबा यहुदिजिडे? बेरियाबे?
पावलडे? निवाहाडमि बचन ले:?मे?निडसिन्डुए लु:मे खा खेमडोवटुजि ॥
मोबा माहाजि बेरियाबे?सोड लेन्नुड या?मिजि पावलमि बिरोधबे? चोम्नुड

बिरोध ले:?टुजि ॥ ¹⁴ इडोवमा खा लेडोवमासोरोवनो? बिस्वासि मोबे?हा
वावानिसाजिडे? पावल वाबोक्लामि केक्लाम पाडहाक्सुजि ॥ तर

सिलासनुड तिमोथि चाहि बेरियाबे?नो? पेनाजि ॥ ¹⁵ पावल चिक्ट्यासि?
खे:खुबा वावा निसाजिडे? एथेन्स लु:मे सहरठो? चिक्ट्यासुजि ॥ मोबाड

टेघुबा वावा निसाजिनुड पावलडे? 'सिलासनुड तिमोथि चाण्डोनो? खोबे?
आ?रो लु:बे?मायो' लु:नुड लाम्बावासो हाक्सु ॥

पावलडे? एथेन्सबे?हा या?मिजि इ:?पा?आ

¹⁶ पावल एथेन्स सहरबे? सिलासनुड तिमोथि हुडसाड पेम्मे?निडसिडे ॥
मोडोक्पे? मो सहरबे? मुरतिजिरे? खाडडोवनुड पावलमि बे?लोनो? निडा

टुगा ॥ ¹⁷ खो यहुदिजि सुम्ढाम खिमबे?हा यहुदिजिनुड निवाहाडमि
ओहाड ले:?खुबा गिरिक जातिहा या?मिजिनुड येसुमि टुम्बे? छलफल
ले:टु ॥ मोडो?नो? मो सहरमि हाटाबे? लेडघुबा या?मिजिनुडसोड खोसे?

बे?लो खा इ:सु ॥ ¹⁸ आढा एपिक्युरिनुड इस्तोइकि गुरुजिनुडसोड

पावलनुड खा इ:बोगामि ॥ माहाजिबे? इण्डोक जनाजिडे? लु:सुजि, "इगो

फतफत्याडे? इमाड इन्डुहा ?” आढाजिडे? चाहि, “इगोसे?को चोड
निवाहाडमि टुम्बे?हा खा इन्डुए” लु:सुजि ॥ इन्डो?होड पावलडे? येसुमि
टुम्बे? मोबा सिबा?आबाड हिडपुवमे खामि सुसमाचार इ:सुहा ॥ ¹⁹ मोबा

माहाजिडे? पावल अरियोपागस लु:मे सभाबे? लाये?नुड इडो? लु:सुजि,
“हेने? इ:बा?आ चोड सिक्छेमि टुम्बे?हा खा कानिडसोड खेम्मा
मि?टुडमा ॥ ²⁰ हेने? इ:बा?आ इगो खा कानिडमि लागि चोड ले:ये ॥

हेने? लु:मायोक्पा?आ खा चाहि इमाडडे ? मो कानिड इ:बे?माना ॥”

²¹ (इन्डो?होड एथेन्सबे?हा चोप या?मिजिनुड मो देसबे? पेडखुबा हाइखा
देसबि?हाजि चोड खारे? इ:मानुड पेनामे ॥)

²² पावलडे? अरियोपागसमि सभामि पोम्बे? ये:पुनुड लु:सुजि, “होड
एथेन्स सहरबे? पेडखुबा वावानिसाजि, हेनिड धरमि या?मिजि लेन्डानिडे
लेए ॥ ²³ का हेनिडमि सहरबे? वाइमाबे? पुजा ले:ठाम ठाउसोड के?

खाक्सुड ॥ इवको भोग पि:ठाम थानाबे? ‘मेलेबा?आ चाप’ लु:नुड
साप्पा?आ टु:सा ॥ हेनिडे? मालेरे? ओहाड ले:पा?आ निवाहाडमि
टुम्बेनो? आइ के? लु:मे?निडसिनुडे ॥

²⁴ माक्खाम्डेम्नुड मोबि? टुहा चोप थोक टोडघुबा निवाहाडनो?
थाडसिरिनुड माक्खाम्डेम्मि मालिक ले:ये ॥ खो या?मिजिडे? टोडबा?आ
खिमबे? पेन्निबा ॥ ²⁵ मोबा या?मिजिडे? वे?टिबा?आ इमाड थोकसो
पा?निबा, इन्डो?होड या?मिजि जिबन, सो:वमानुड या?मिजि पा?मिहा

चोप थोक पिःखुबा खोनो? लेःये ॥ ²⁶ माक्खाम्डेम्बे? या?मिजि पेम्मिरो
लुःनुड निवाहाडडे?नो? इक्को या?मिबाड चोप जातिहा या?मिजि टोक्सु
॥ खोजिडे? हिडमे उमेरनुड पेम्मेढाम ठाउ खोसे?नो? पक्का लेःटु ॥

²⁷ या?मिजिडे? खो योक्माबे? सुःप्माबे?सोड सुःप्तोक्कुजिरो लुःनुड इडो?

लेःटु ॥ तरसोड निवाहाड कानिडबाड ओः मा?आये ॥ ²⁸ इन्डो?होड

इक्को या?मिडे? इडो? लुःटुए, “कानिड खोबे?नो? हिडइन्डिडमेनुड
कि?यु मि?यु लेःन्डिडमा ॥” इगो खामिटुम्बे? हेनिडमि इक्को कबिता

साप्खुबाडे? इडो? लुःबा?आ लेःये, ‘चैबानो? कानिड खोमि पसाजि
लेन्डिडमे’ ॥

²⁹ इडो? कानिड निवाहाडमि पसाजि लियेम्बाड कानिडे? निवाहाड

या?मिमि निडाडे?नुड सिपडे? टोडबा?आ सिसेडमि, रुडगो?वामिनुड

सुनामि मुरतिडो?मा कानिडे? मि?मा फेन्निबा ॥ ³⁰ मोडोणे? या?लो
माल्लैरे? लेः?पा?आ पाप निवाहाडडे? ले?खो मालेःटु ॥ तर हागो

निवाहाडडे? चोप या?मिजि ‘खोजि टाडबामि पाप मि?नुड फेरि मोडो?

लेः?मा ले?पेमे’ लुःनुड आग्या पिटे ॥ ³¹ इन्डो?होड निवाहाडडे?

माक्खाम्डेम्बे?हा या?मिजि न्याय लेः?मे याक पक्का लेःपेटुए ॥ मो यिडे?

खोसे? सेन्बा?आ या?मिबाड माक्खाम्डेम्बे?हा या?मिजिमि न्यया

लेन्डुए ॥ चोप या?मिजि न्याय लेः?मे अधिकार खोबे? टुये लुःमे खा

पक्का लेः?मे?मामि लागिनो? निवाहाडडे? खो सिघे?पा?आबाड

हिडबोइटुए ॥

³² सिबा?आ या?मि हिडबिरक लिये लुःमे खा पावलबाड खेम्नुड इन्डोक

या?मिजिडे? खो इ:जोसुजि ॥ तर आढा आढाजिडे? लु:सुजि, “इगो खामि
टुम्बे? फेरि हाइको खेप्सोड कानिड खेम्मा मि?इन्डुडमा ॥”³³ मोबा

पावल माहाजिनुड बिदा लिसा ॥³⁴ तर आढा या?मिजि पावलमि इगो खा
खेम्नुड परभुबे? बिस्वास ले:टुजि ॥ माहाजिबे? अरियोपागस लु:मे सभामि
डियनुसियस लु:मे या?मिनुड दामारिस लु:मे मे?ना?मि ले:टाजे ॥ हाइखा
या?मिजिडे?सो परभुबे? बिस्वास ले:टुजि ॥

18

पावल कोरिन्थ सहरबे?

¹ मोबा एक्साड पावल एथेन्स सहरबाड बिदा लि:नुड कोरिन्थ सहरबे?

खडा ॥² मोबे? खोसे? अकिलास निडमा इक्को यहुदि चुप्टु ॥ अकिलास
पोन्टस ठाउबे? टोक्पा?आ ले:टानुड खोमि जहान पिरिस्किलानुड भरखरि
इटालि लु:मे देसबाड लेम्बा?आ ले:टाजे ॥ इन्डो?होड रोमि हाडबा
क्लौडियासडे? चोप यहुदिजि रोम सहर ले?मे हुकुम पि:बा?आ लेटा ॥

पावल खोजि चुप्सि? खडा ॥³ मोबा माहाजिडे? पाल टोडमे योम्बोक
ले:चासामे ॥ पावलसोड खोजिनुडनो? पेना इन्डो?होड खोसे?सोड पाल

टोडमे योम्बोक ले:टुए ॥⁴ पावल चोप नाजामे याकपे? यहुदिजि सुम्हाम
खिमबे? खे?नुड यहुदिनुड गिरिक जातिजिनुड छलफल ले:साड मो नि
जातिहा या?मिजिडे? लेसुमियो लु:नुड नुरो? लु:बे?टु?जे ॥

⁵ सिलासनुड तिमोथि माकेडोनिया लु:मे ठाउबाड मोबे? लेस्साजि,
पावलडे? चाहि सानिडनो? परचारमि योम्बोक ले:टु ॥ खोसे? यहुदिजि

‘येसुनो? पापबाड छुटकारा पि:घुबा हाडबा खिरिस्ट लेये’ लु:मे साविछ

पिःसुजि ॥ ⁶ तर माहाजिडे? पावल बिरोध लेः?नुड खो योबुजि ॥ पावलडे?
खोजिमि बिरोधबे? खोमि चे?पे?हा भुलो फाप्साड माहाजि इडो? लुःसुजि,
“हेनिडमि पापमि दोस हेनिड सोक्पे?नो? सि?रो ॥ मोमि दोस कासोक्पे?
सि?निबा ॥ हागोएम्बाड का हाइखा जातिहा या?मिजिबे? खेएडे ॥”

⁷ मोबा एक्साड पावल यहुदिजि सुम्हाम खिमबे? खे?मा ले?पेसु ॥ मो
यहुदिजि सुम्हाम खिम केक्पे? निवाहाडमि ओहाड लेः?खुबा तितस
युस्तस निड लेःखुबा गिरिक जाति या?मिमि खिमबे? पेडसि? पावल
खडा ॥ ⁸ यहुदिजिमि सुम्हाम खिमिब?ए सासक किरिस्पसनुड खोमि
खिमबे?हाजिडे? परभुबे? बिस्वास लेःटुजि ॥ कोरिन्थिबे?हा हाइखा बे?लो
या?मिजिडे?सोड पावलमि सिक्छे खेम्नुड बिस्वास लेः?नुड बप्तिस्मा
लासामि ॥

⁹ इक्सेड परभुडे? पावल सेन्जि?माडबाड इडो? लुःसु, “हेड असानुडसो
ए?किस्सिने, योड उक्नुड एपेन्ने ॥ सुसमाचार खेम्मे?साड खडे ॥

¹⁰ इन्डो?होड का हेन्नुडनो? टुडेनुड असे?सोड हेड इमाडसो
लेः?हेमिनिबा, इन्डो?होड इगो सहरबे? केहा या?मिजि बे?लो टुम्मे ॥”

¹¹ इडो? पावल कोरिन्थ सहरबे? इविनड चुक्चि महिनाडो? निवाहाडमि
बचन इः?साड पेना ॥

¹² अखैया ठाउबे? गालियोन निड लेः?खुबा या?मि बे?ए हाकिम टुमाबे?
यहुदिजि टोडनुड पावलसोक्पे? पेडिखे?नुड खो यबुजि ॥ मोबा पावल
बे?ए हाकिमबे? लाजे?नुड लुःसुजि, ¹³ “इगो या?मिजिडे? कानिडमि
यहुदि धारमिक नियमडे? लुःबा?आबाड टेडिगरिवलाम निवाहाडमि

ओहाड लेः?मा इःमे?निडसिनुडए ॥ ¹⁴ मोबा पावलडे? लुःसि? पोरोवमाबे?
 गलियोनडे? माहा यहुदिजि इडो? लुःसुजि, “होउ यहुदि या?मिजि, इगो
 या?मिडे? माडे?मानुड अपराध योम्बोक लेःटाहोड के? हेनिडमि खा
 खेम्नुड न्यया लेः?मा नुबा लिसा होला ॥ ¹⁵ तर इगो खागो हेनिडमि
 साप्चिरा, निडनुड यहुदि धारमिक साप्चिरामि खामि टुम्बे?रे? टुयेलेः ॥
 मोडोणे? इगो खामि न्याय हेनिडे?नो? लेःटानुमे ॥ इगो खामि न्याय के?
 लेः?टुडनि ॥” ¹⁶ इडो? लुःनुड माहाजि अदालतबाड पाखे?यु पाडहाक्सुजि
 ॥ ¹⁷ मोबा माहाजिडे? यहुदि सुम्हाम खिमबे?हा सासक सोस्थेनेस
 राःप्नुड अदालत पोम्बे?नो? मोगुजि ॥ तर गलियोनडे? मो खामि
 ले?खोनो? मालेःटु ॥

पावल एन्टिओखिया सहरबे? टेबा?आ

¹⁸ पावल बे?लो याक कोरिन्थ सहरबे?हा बिस्वासि वावानिसाजिनुड
 पेना ॥ मोबा एक्सड पावल बिदा लिनुड खोसे? या?लो टाड खोमे बावा
 लेः?पा?आसे? किन्करिया सहरबे? खे?नुड खोमि टाड खोसु^y ॥ मोबा
 एक्सड खो पिरिस्किला, अकिलासनुड वाबोवलामि राम लिसाड सिरिया
 ठाउलाम एनामि ॥ ¹⁹ मोबा माहाजि एफिसस सहरबे? रुवनुड
 पिरिस्किलानुड अकिलास मोबे?नो? पेनाजि ॥ तर पावल चाहि
 एफिससमि यहुदिजि सुम्हाम खिमबे? पेखे?नुड यहुदिजिनुड नुरो? खा
 इःसु ॥ ²⁰ मोबा माहा यहुदिजिडे? इ?याक नियाक खोजिनुडनो? पेने
 लुःनुड बिन्ति लेःटुजि, तर खो पेम्मा माडखसिडा ॥ ²¹ पावल इडो?

कासाड माहाजिनुड बिदा लिसा, “निवाहाडडे? मि?टुहोड फेरि का
हेनिडबे? लेडइडे ॥” मोबाड एक्साड खो माहोडमामि राम खडा ॥ ²² मोबा
पावल कैसरिया सहरबे? लेन्नुड यरुसलेमबे?टु खडा ॥ मोबा मोबे?हा
सेवा खिमबे?हा बिस्वासिजिनुड चुबा ॥ मोबा एक्साड खो एन्टिओखिया
सहरबे? खे?नुड ²³ मोबे? इ?याक नियाक पेना ॥ मोबा एक्साड खो
गलातियानुड फिरगिया लु:मे ठाउ लिसाड खे?नुड मोबे?हा ठाउ ठाउहा
बिस्वासिजि बिस्वासबे? बलियो टोक्सुजि ॥

अपोल्लोस एफिसस सहरबे?

²⁴ अलेक्जेन्डरिया सहरबे?ए अपोल्लोस निड ले:खुबा इक्को यहुदि
एफिससबे? लेन्डा ॥ खो बे?लो नुरो? यामुरेघुबा या?मि लेटेनुड खोसे?
धारमिक साप्तिरामि खा बे?लो लेसुहा ॥ ²⁵ खोसे? परभु येसुडे?
इ:पा?आ जिबनमि राममि टुम्बे? नुरो? चिम्बा?आ लेटे ॥ तरसोड खोसे?
युहन्नाडे? पि:बा?आ बप्तिस्मारे? लेसुहा ॥ ²⁶ खोसे? यहुदिजि सुम्हाम
खिमबे? मेडकिरिसरे? मो सिक्छे इ:पोगुजि ॥ खोमि सिक्छे खेम्नुड
पिरिकलानुड अकिलासडे? मो या?मि खोजिमि खिमबे? के:नुड
निवाहाडमि राममि टुम्बे?ए खा नुरो? इ:बे?टुजि ॥

²⁷ मोबा एक्साड अपोल्लोसडे? अखैया ठाउबे? खे?मि?टु ॥
एफिससबे?हा परभुमि चोडसाजिडे? खो मोबे? खे?मे हौसला पि:सुजि ॥
मोबा मोबे?हा बिस्वासिजि अपोल्लोसमि नुरो? स्वागत ले:मे लु:नुड
इक्को पत्य सो साप्पे?टुजि ॥ अखैयाबे? रुवनुड अपोल्लोसडे? मोबे?हा
परभुमि अनुग्रहबे? लेम्बा?आ बिस्वासिजि बे?लो सहायोग ले:टुजि ॥

²⁸ इन्डो?होड मोबे? टुघुबा यहुदिजिनुड वादविवाद ले:नुड खोसे?
धारमिक साप्तिरामि खाबाड येसुनो? खिरिस्ट ले:ये लु:नुड मोबे?हा

यहुदिजि पक्का लेः?पे?टुजि ॥

19

पावल एफिसस सहरबे?

¹ अपोल्लोस कोरिन्थ सहरबे? टुमाबे? पावल एसिया छेत्यामि मे?टोडबाड एफिसस सहरबे? उक्सा ॥ मोबे? पवालडे? परभुबे? बिस्वास

लेः?खुबा आढा चोडसाजि चुप्टुजि ॥ ² खोसे? माहाजि सिप्सुजि, “इमाड हेनिडे? परभुबे? बिस्वास लेः?नुड पबित्या होडनिडा चुप्टानुमे ?”

माहाजिडे? लुःसुजि, “कानिडे?को पबित्या होडनिडा टुये लुःमे खागो खेम्सो मेडखेमिड? ॥”

³ फेरि पावलडे? माहाजि सिप्सुजि, “मोडो?होड हेनिडे? इन्डो?मा बप्तिस्मा लासानुमे ?” माहाजिडे? लुःसुजि, “युहन्नाडे? इः?पा?आ बप्तिस्मा लासुडमा ॥”

⁴ पावलडे? लुःसु, “युहन्नाडे? पिःबा?आ बप्तिस्मा चाहि पापबाड टेआप्मामि लागि पिःसुजि ॥ खोसे?को लुःबा?आ लेटे ‘काबाड एक्साड लेडघुबाबे? बिस्वास लेः?मे’ ॥ खोबाड एक्साड लेडघुबा चाहि येसुनो? लेये ॥”

⁵ इगो खा खेमनुड माहाजिडे? परभु येसुमि निडबे? बप्तिस्मा लासुजि ॥

⁶ मोबा पावलडे? माहाजिसोक्पे? हुक युडनुड माहाजिबे? पबित्या होडनिडा लेन्डा ॥ मोडोक्पे? माहाजिडे? हाइखा खाप्लाबे? यामुसामिनुड अगमबानि इःबोगुजि ॥ ⁷ माहाजि जम्मा इक्पोड नि जनाडोक या?मिजि

टुसामे ॥

⁸ पावल यहुदिजि सुम्हाम खिमबे? खे?नुड सुम महिनाडोक
मेडकि?सिरे? या?मिजि निवाहाडमि राज्यमि टुम्बे इ:डुजि ॥ खोसे?
लु:बा?आ खा नुरो? लेसुमियो लु:नुड निवाहाडमि राज्यमि टुम्बे?हा खा

लु:मा मेलेडु ॥ ⁹ तर आढाजिडे?को परभुबे? बिस्वास माले:टुजि ॥ तर
खोजिडे?को परभुडे? इ:पा?आ जिबनमि राममि बिरोध ले:टुजि ॥
माहाजिडे?नो? पावलडे? इ:पा?आ खामि बिरोध ले:पोगुजि ॥ मोडोणे?
पावल यहुदिजि सुम्हाम खिमबे? खे?मानो? लेप्पेनुड परभुबे? बिस्वास
ले:खुबा चोडसाजि खोनुड वि?खे?टुजि ॥ मोबा एक्साड पावलडे?
टुरान्नस मि पाठसालाबे? सानिडनो? या?मिजिनुड चुप्नुड मुवितमि

टुम्बे? छलफल ले:टु ॥ ¹⁰ इडो? डिनिडडो? पावलडे? इगो योम्बोक ले:टु ॥
मोबा एसिया छेत्याबे?हा यहुदिनुड हाइखा जातिहा या?मिजिडे? परभुमि
बचन खेप्सुजि ॥

निवाहाडडे? पावलबाड एफिससबे? खारिहा योम्बोक ले:पा?आ

¹¹ निवाहाडडे? पावलमि हुवबाड खारिहानुड बे?हा बे?हा योम्बोक ले:टु
॥ ¹² खोसे? केवपा?आ रुमालनुड ओप्ताड लाघे?नुड टुवखुबाजिसोवपे?
युडबे?माबे? या?मिजि नुबोगामेनुड माडे?हा चापजि प्रेआप्ननुड
चिखडामि ॥

¹³ ठाउ ठाउ वाइसाड माडेहा चापजि मि:खुबा यहुदिजिडे?सो परभु
येसुमि निडबे? माडे?हा चापजि यिवमा योगुजि ॥ माहाजिडे? माडे?मा

चाप इडो? लु:सुजे, “पावलडे? परचार ले:पा?आ येसुमि निडबे? हेड

खे?पेसे लु:नुड आग्या पि:न्ने” ॥ ¹⁴ मोबे? इवको स्केवास निड ले:खुबा
यहुदि चोप्पाड एप्पा याडाडबामि एच्छ जना पसाजि टुसामे ॥

खोजिडे?सोड मोडोकमा योम्बोक ले:टुजे ॥ ¹⁵ तर इ?याक माडे?मा चाबे?

माहाजि इडो? लु:सुजि, “के? येसु लेनुडे, पावलसोड लेनुडे तर हेनिड
चाहि असाजिडे ?” ¹⁶ इडो? कामानुड मो माडे?मा चाबे? य:प्पा?आ
या?मि माहाजिसोकपे? पेडिगे?नुड माहाजि हेजासुजि ॥ माहाजि उक्वुडरे?
हुवा खिमानुड मो ठाउबाड वि:खडामि ॥

¹⁷ इगो खा एफिससबे? टुघुबा चोप यहुदिजिनुड गिरिक जातिजिडे?
खेम्नुड चोप कि?सिसामि ॥ माहाजिडे? परभु येसुमि बे?लो ओहाड लेटुजि
॥ ¹⁸ बिस्वास ले:खुबाजि बे?लो लेन्नुड खोजिडे? ले:पा?आ माडेहा

योम्बोक या?मिजिमि रुम्बे? लु:नुड खिकार ले:टुजि ॥ ¹⁹ इडो? बे?लो
चटकि, माडबा, याडाडबा योम्बोकमि टुम्बे? साप्पा?आ खोजिमि साप्चिरा
या?मिजिडे? मोबे? लाजे?नुड चोपमि पोम्बे? हि?पेसुजि ॥ माहा
हि?पा?आ साप्चिरामि दाम हिसाब ले:माबे? सिसेडमि याड डाक्पोड
हजार लिसा ॥ ²⁰ मोबा इडो? परभुमि बचन सवितनुड मुखडा ॥

एफिससबे? हुल-दडगा

²¹ मोबा एक्साड पावलडे? माकेडोनियानुड अखैया लु:मे ठाउ लिसाड
यरुसलेम खे?मे निडा ले:टु ॥ खोसे? लु:सु, “का मोबे? रुक्नुड का रोम
सहरबे?सोड खे?मानो? खेये ॥” ²² मोबाड एक्साड खो योम्बोक
ले:माराखुबा तिमोथिनुड इरास्तस माकेडोनियाबे? पाक्सुजि ॥ तर खो
चाहि इ?याक नियाक एसियाबे?नो? पेना ॥

²³ मोडोकपे? मुवितमि राममि खा लिबा?आसे? एफिससबे? बे?ए हल्ला

खल्ला लिसा ॥ ²⁴ डेमेतिरियस लुःमे सुनारडे? आरतेमिस² देबिमि
सिसेडमि एद्रिहा मन्दिर टोक्सुहा ॥ इघा टोडनुड खोनुड खोसे?

युडबा?आ या?मिजिडे?सोड बे?लो याड टोक्सुजे ॥ ²⁵ हागो
डेमेतिरियसडे? खोमि योम्बोक लेः?खुबाजिनुड हाइखा मोडो?हा योम्बोक

लेः?खुबाजि चोप सुम्नुड इडो? लुःसुजि, “होउ निसाजि, हेनिडे?

लेन्डानुम, इगो योम्बोकबाडनो? कानिडे? याड टोडइटुडमाहा ॥ ²⁶ तर
इगो पावलडे? इमाड लुःमे?निडसिन्दुए हेनिडे?नो? खाडमे?नुड
खेम्मे?निडसिन्डानुमे ॥ या?मिजिमि हुणे? टोडबा?आ देउताजि चाहि
देउतानो? ने?निहाजि लुःमे?निडसिये ॥ इगोसे? इगो एफिससनुड
एसियाबे? पेडखुबा चोप या?मिजि खोमि खा इः?नुड खोमिताम

लाघे?सि?पोरोइटुए ॥ ²⁷ इडो? कानिडमि योम्बोकमिरे?नो? ने?नि तर
कानिडमि महान देबि आरतेमिसमि मन्दिरमिसोड हेला लिःये मोबा
एसियानुड माकखामडेम्बे?हा या?मिजिडे? लेः?मे?निडसिबा?आ
आरतेमिस आदर मे?निडमा लिये ॥”

²⁸ इगो खा खेम्नुड मोबे? सुम्बा?आ चोप या?मिजि सुरके?नुड इडो?

काबोगामि, “एफिससबे? टुघुबा आरतेमिस देबिमि ओहाड!” ²⁹ मोडो?
ओहाड लेः?पा?आसे? चोप सहरबे? खेम्मुसानुड हल्ला लिसा ॥ या?मिजि
सुम्नुड लेन्डामि मोबा माकेडोनियाबाड लेम्बा?आ पावलमि लाडगामजि
गायसनुड अरिस्तारखस गःणुड बे?ए डेम्माबे? लाघे?टुजि ॥

³⁰ पावलसोड मोबे? खे?मा योगा ॥ तर बिस्वासि वावानिसाजिडे? खो

मेडखे?मे?टुजि ॥ ³¹ एसियाबे?हा आढा सरकारि या?मिजिडे?सोड
पावलमि लाडगामजि लेःटामि माहाजिडे?सोड मोबे? एखे?ने लुःनुड
सेगुजि ॥

32 माहा सुम्बा?आ या?मिजिबे? खाल खालहा खा पुःवपा?आसे? बे?ए हल्ला लिसा ॥ आढाजिडे? इक्को खा इःसुजे आढाजिडे? हाइको खा इसाड वोसामे ॥ तर मोबे? सुम्बा?आ बे?लो या?मिजिडे? इन्ढोड सुम्नुड इडो? काम्मे लुःमे खा मेलेसुजि ॥ 33 यहुदिजिडे? मोडोक्पे? लिडिडबा?आ खामि टुम्बे? या?मिजि लुःबे?मामि लागि अलेक्जेन्डर पोम्बे? येःमे?टुजि ॥ मोबा खोसे? हुक्मि खाप्ले? सान्त लेः?साड जोग लिमामि लागि इमाड खा इःमा योगु ॥ 34 तर खो यहुदि लुःनुड माहाजिडे? लेःडोक्नुड या?मिजिडे? निबोडठोक “एफिससबि? टुये आरतेमिस देबिमि ओहाड!” लुःसाड कासामि ॥

35 एक्साड मो सहरबि?ए साप्खुबा एप्पाडे? चोप या?मिजि योड उक्मे?नुड इडो? लुःसु, “एफिससबे?हा वावानिसाजि, एफिसिजिमि सहर चाहि बे?ए आरतेमिस देबिमि मन्दिरनुड नान्दुरडमाबाड हेओक्पा?आ खोमि मुरति जोगालेः?खुबा लुःनुड चोप या?मिजिडे? लेन्डुजे ॥

36 असे?सोड इगो खा ने?नि लुःहेसुजिनि मोडोने? हेनिड चोप योड पेनानिडे ॥ इडो? इमाड मेमि?रे? इमाड योम्बोकसोड लेः?मा नुबा लिनिबा ॥ 37 हेनिडे? राःप्नुड लाजे?पा?आ इघा या?मिजिडे? कानिडमि मन्दिरबाड इमाडसोड मेडखुडि? मोबा कानिडमि देबिमि बिरोधसो

मेलेः?टिटु?जि ॥ 38 हागो डेमेतिर्यसनुड खोमि सुनार लाडगामजिमि हागोसो खा टुहोड न्याय लेः?ठाम्बे? खे?नुड उजुर लेः?नुड माहाजिमि रुम्बे? मुध्द लेः?मिरो ॥ 39 तर मोबाडसो बे?लो हाइखा खा हेनिडनुड टुहोड जन्ताजिमि सभा केः?नुड मो खामि छलफल लेः?पे?हेन्डुडमे ॥

40 आयु इडो? होहाल्ला लिबा?आसे? मोमि दोस कानिडसोक्पे? सि?हेये ॥

कानिडसोक्पे इगो दोस टिमिहोड इमाडे? होहाल्ला लिसे कानिडे? लु:मे
खा इमाडसो माये ॥ ⁴¹ इडो? लु:से?नुड सुम्बा?आ या?मिजि बिदा
पि:सुजि ॥

20

पावल माकेडोनियानुड गिरिस देसबे?

¹ मो हुल दडगा सान्ति लिसे?नुड पावलडे? परभु येसुमि चोडसाजि
सुम्नुड खोजि बिस्वासबे? बलियो लिमियो लु:नुड सिक्छे पि:से?नुड बिदा
लिसा मोबा माकेडोनियालाम खडा ॥ ² मोबे? रुक्नुड खोसे? ठाउ ठाउबे?
खे?नुड परभुमि चोडसाजि सहास पि:सुजि ॥ मोबा एक्साड खो गिरिस
देसबे? लेन्डा ³ मोबा खो सुम महिनाडो? मोबे?नो? पेना ॥ मोबा
पावलडे? योडा जहाजबाड सिरियालाम खे?मे निडा ले:टु ॥ इडो? पावल
खे?मामि पोरोक्माबे? यहुदिजिडे? खोमि बिरोधबे? मोत्ता इ:बा?आ
खोसे? ले:डोक्टु ॥ मोडोणे? खो योडा जहाजबाड णे?नि सराडे? राम्साड
माकेडोनिया लिसाड खे?मे निडा ले:टु ॥ ⁴ मोडोक्पे? खोनुड सेवा
खिमबे?हा हाइखा बे?लो वावानिसाजि योम्बोक ले:टामि ॥ मोडोक्पे?
योम्बोक ले:खुबाजिबे? बेरिया सहरबे? पेडखुबा पुरसमि पसा सोपाट्रोस
लु:मे, थेस्सलोनिके सहरबे? पेडखुबा अरिस्तारखसनुड सिकन्दस लु:मे
डरबि सहरबे? पेडखुबा गायसनुड तिमोथि मोबा एसिया ठाउबाड
लेम्बा?आ तुखिकसनुड तोरफिमस ले:टामे ॥ ⁵ खोजि चाहि कानिडबाड
या?लोनो? खे?नुड तोरआस सहरबे? कानिड हुडसामि ॥ ⁶ कानिड चाहि
सिडा मे?निडमा चरेपा चामे चाडमि एक्साड फिलिपि सहरबाड
वाबोक्लामि राम लिसाड खडिडमा ॥ मोबाड डा याक एक्साड खोजि

तोरआस सहरबे? कानिडे? चुप्टुडमा ॥ मोबे? कानिड साता इवकोडो?
पेनिडमा ॥

पावल एक्सडए खे? तोरआस सहरबे?

⁷ मोबा आइताबारमि युडा कानिड मोबे? टुघुबा बिस्वासि
वावानिसाजिनुड परभु भोज चासि? सोरि सुप्सिडमा ॥ पावल चाहि
वागियारामनो? खे?पेमा सि?पा?से? खोजिनुड सेन्डाठोक यामुसामि ॥

⁸ कानिड सुम्बा?आ सोड तलाबे? बे?लो कुप्पि उःप्मे?निडसिडा ॥ ⁹ मो
तलामि जोस्केलोबे? युटिकस लुःमे इवको वेन्जा पि?छा पेम्बा?आ लेःटा ॥
पावल यामुमे?निडसिमाबे? मो पि?छा इम्मे?मि?चोबुनु ॥ मोडोणे? खो
इच्छो?पे? इम्दिखे?नुड सुम तलाबाड मिम्मु भुइबे? हेडा ॥ मिम्मु खे?नुड

खाडमाबे? खो सिघे?पेबा?आ लेटा ॥ ¹⁰ पावल मिम्मु उडनुड मो पि?छा

हेप्साड खोसे? या?मिजि लुःसुजि, “हेनिड सुरता एलेः?टानिडे, इगो

पि?छागो हिडरिक्कनो? लेये ॥” ¹¹ मोबा एक्सड पावल मिन्डुए तलाबे?
साडनुड चोबे? परभु भोज चासामि ॥ परभु भोज चासे?नुड खो सेन्से

खोजिनुड यामुसा मोबा खोजिनुड बिदा लानुड खडा ॥ ¹² मोबे?हा
चोडसाजिडे? मो पि?छा खोमि खिमबे? चिविटयोसुजि ॥ मो पि?छा
हिडबा?आ खाडनुड माहाजि बे?लोनो? साप्थावसामि ॥

तोरआसबाड मिलेटस ठाउठोक रम्बा?आ

¹³ तोरआसबाड पावलबाड हाइखा कानिड चाहि योडा जहाजबे?
साडनुड अस्सोस लुःमे सहरबे? खडिडमा ॥ पावल चाहि अस्सोसठोक
सराडे? रम्साड खे?मामि निवे? मि?पा?आसे? अस्सोसबाडरे?नो? योडा

जहाजबे? साडमे खा टोडबा?आ लेटे ॥ ¹⁴ कानिड आस्सोसबे? रुवमाबे?

पावलसो मोबे? लेरसा मोबाड कानिड सोरि योडा जहाजबे? साडनुड
मितिलेने लु:मे सहरबे? खाडिडमा योडा जहाज|h00215c.tif|col|||

20:14॥ ¹⁵ वागियाराम कानिड वाबोक्लामि राम लिसाड खियस लु:मे
योडे? यिजुम्बा?आ पोडबोडमामि केक्पे? रुगिडमा ॥ सिडआराम सामोस
लु:मे पोडबोडबे? रुक्कुडमा ॥ मोबाड हाइके याक चाहि मिलेटस लु:मे

सहरबे? लेण्डिडमा ॥ ¹⁶ एसियाबे? हागो बे?लो एपेम्मामि पावल एफिसस
सहरबे? ए?खे?मे बिचार लेटु ॥ इण्डो?होड खो चान्डो चान्डो यरुसलेम
रुक्मा मिने ॥ खोसे? पेन्तिकोसमि चाडबे? इण्डो?होडसो रुक्मा
मि?पा?आ लेटे ॥

एफिससबे?हा सेवा खिमिम अगुवाजिनुड पावल हा:बा?आ

¹⁷ पावलडे? मिलेटस सहरबाड एफिसस सहरबे? टुघुबा सेवा खिमबे?हा
एलडरजि मिलेटस सहरबे? के:हाक्सुजि ॥ ¹⁸ माहाजि मोबे? लेरसामि

मोबा पावलडे? इडो? इ:सु, “का एसियाबे? लेम्बा?आ याकबाडनो?
हेनिडनुड पेम्माबे? माहा याक के? इण्डो? पेनिडे माहा चोप हेनिडे?

लेण्डानुम ॥ ¹⁹ यहुदिजिडे? घरि घरि चुडजामाबे?सोड के? एडेम्मा लिनुड

परभुमि योम्बोक हा:प्साड ले:टुड ॥ ²⁰ मोबा हेनिड चोपमि पोम्बे?नुड
हेनिडमि खिम खिमबे? लेण्डुड नुबा खा इ:माबे? के? इमाड खासोड

केए निडाबे? मेन्चुम्युक्सुड ॥ ²¹ “के? यहुदिजिनुड हाइखा जातिहा
या?मिजि चोप टाडबामि पापि योम्बोक ले?नुड निवाहाडबे? टेसानिडे?
मोबा कानिडमि परभु येसुबे? बिस्वास ले:टानुमे लु:नुड परचार ले:टुड ॥

²² हागो का पबित्रा होडनिडाडे? लु:बा?आ खसिनुड यरुसलेम

खे?मामि पोरोवइटिडे ॥ मोबे? के? इमाड इमाड आडमा खे:हा, के?

लेसुडनि ॥ ²³ तर के? इडो? चाहि लेनुडे, का खेएडे चोप सहरबे? के? खे
आडमा खेयेनुड तिरुडगा खिमबे? सि?इये लु:नुड का पबित्रा

होडनिडाडे? लु:टिडे ॥ ²⁴ तर सोड केए जिबनगो काडमि लागि इमाडसो
योम्बोक ले:निबा ॥ के? मि?पा?आ इगोरे?नो? टुये निडा हाडडे? चोप
या?मिजि अनुग्रह लेएटे लु:मे सुसमाचार चोप ठाउराजि खेम्मेहेमा ॥ इगो
योम्बोक चाहि का परभु येसुडे? ले:मा लु:टिडे ॥

²⁵ हागो खावसानुमे, हेनिड असा असाजिमि पोम्बे? के? निवाहाडमि

राज्य परचार ले:टुड, हागोएम्बाड एक्सड फेरि हेनिडनुड का

इन्डोवपे?सोड चुपेडानि लु:नुड के? लेनुडहा ॥ ²⁶ मोडोणे? के? आयु

हेनिड लु:निम्ने, हेनिडजिबे? असाहोडसो नासि लिसानिडहोड काबे?

मोमि दोस सि?निबा ॥ ²⁷ इन्डो?होड निवाहाडडे? कानिडमि लागि
ले:पा?आनुड एक्सड लिहा खामि टुम्बे?हा इमाड खासो केए निडाबे?

मेयुडले? हेनिड लु:बे?निम्नि ॥ ²⁸ मोडोणे? हागो हेनिड टाडबानुड सेवा
खिमबे?हा या?मिजिमि लागिओ होसियार ले:टानिडे ॥ पबित्रा

होडनिडाडे? हेनिड खाडघुबा टोडबा?आसे? निवाहाडमि पसामि हरिडे?

इम्बा?आ सेवा खिम नुरो? खावसानुमे ॥ ²⁹ के? लेनुडे का खे?पेडे मोबा

एक्सड नाम्भुडलाबे?हा ए:भा ए:भाडो?हाजि||b00011c.tif|col||||

20:29लेन्नुड सामुजि इमा मेयुडरे? से?नेबा?आडो? हेनिडमि रुम्बे?
ने?निहा खा इ:खुबाजि लेडइम्मेनुड ने?निहा खा इ:नुड सेवा

खिमबे?हाजि दुःख पिःमा लेडुजिने ॥ ³⁰ हेनिडमि रुम्बे?सो मे?नो?हा
सिवछे इः?खुबा या?मिजि लिम्मे ॥ माहाजिडे? परभुमि चोडसाजि

खोजिमि टेडिगरिक रामलाम लाघे?मा योइण्डुजे ॥ ³¹ मोडोणे? चनाखो
लिनुड पेनानिडे मोबा के? सुम्निडडोक लेन्डा सेन्डा मि?वानुड परभुमि
चोप चोडसाजि होसियार लेःटानुमे लुःनुड इःडुडघे?टुड ॥

³² “हागो के? हेनिड निवाहाडमि हुक्पे? जिम्मा युडआनुड मोबा
खोमिन्नो? अनुग्रहनुडमा खोमि बचनमि भोरबे? याः?यानिम्ने ॥
मोसे?नो? हेनिड निवाहाडबि?ए बिस्वासबे? बोलियो टोडइयेनुड खोसे?

सेन्बा?आजिनुड हकदार टोडइये ॥ ³³ के? असामिसोड सुना सिसेडमि
लोभ मेलेःटुड ॥ ³⁴ हेनिडे?नो? लेन्डानुमे, केए हुणे? योम्बोक लेः?नुड

कानुड केहा लाडगामजि पाप्मिहा खा पुरा लेःटुडहा ॥ ³⁵ के? लेः?पा?आ
चोप योम्बोकगो के? हेनिडे?नो? पोम्बे?नो? खाडनिनिम्ने

‘लाघुबाजिबाड पिःघुबाजि बे?लो आसिसित लेम्मे’ लुःनुड परभु येसु
खोम्दाडबे? लुःबा?आ खा मि?नुड कमजोर या?मिजिमि ले?खो
लेःटानुमेनुड नुरो? योम्बोक लेःचासानिडे लुःनुड के? चोप खा
खाडमेनिम्ना ॥

³⁶ इडो? लुःनुड पावलडे? खोजिनुड सोरि टुम्रुक ठोःवनुड पारथना

लेःटु ॥ ³⁷ मोबे? सुम्बा?आहाजि बे?लोनो? हाःप्साड पावल हेण्डुड चुम्बन

लेः?नुड बिदा लेःटुजि ॥ ³⁸ पावलडे? खोजिनुड फेरि इण्डोक्पे?सो कानिड
चुबिनि लुःबा?आ खाडे?सो माहाजि बे?लो हाबामि ॥ मोबा खोजिडे?
पावल खो खे?ठाम योडा जहाजठोक चिविटओसुजि ॥

पावल यरुसलेम खे?पा?आ

¹ एफिससमि सेवा खिमबे?हा बिस्वासिजिनुड बिदा लिनुड कानिड
 वगियाराम योडा जहाजबाड कोस लु:मे पोडबोडबे? लेन्डिडमा ॥
 वागियाराम रोडस लु:मे पोडबोडबे? रुवनुड मोबाड ओडलाम पटारा
 सहरबे? लेन्डिडमा ॥ ² मोबे? कानिडे? फोनिके ठाउ खे?ठाम योडा
 जहाज चुप्पुडमानुड मोबे?नो? साडनुड खडिडमा ॥ ³ मोबा साइप्स
 पोडबोडमि केवबाड लाडगेतलाम लिसाड कानिड सिरियालाम खाडिडमा
 ॥ टुरोस लु:मे सहरबे? कोवनाम चाडमामि योडा जहाज नासा ॥ मोडोणे?
 कानिडसोड ओरलबा लिसिडमा ॥ ⁴ मोबा मोबे? पेडखुबा परभुमि
 बिस्वासि वावानिसाजि चुप्सि? खे?नुड मोबे? इवसाता माहाजिनुडनो?
 पेनिडमा ॥ पबित्या होडनिडाडे? लु:बा?आसे? माहाजिडे? पावल
 'यरुसलेमबे? ए?खे?ने' लु:नुड बिन्ति ले:टुजि ॥ ⁵ मोबा इक साता
 एवसाड मोबे? पेम्मे बेला रुवखे?नुड कानिड राम्बोवमाबे? मोबे?हा
 बिस्वासि वावानिसा, नानानिसानुड पि?छा चोप कानिड चि?आसि?
 सहरबाड कि?युठो? आबामि ॥ मोबा कानिड चोबे? माहोडमामि केवपे?
 टुम्रुक ठो:वनुड पारथना ले:?नुड मो ठाउबाड बिदा लानुड हासिडमा ॥
⁶ मोबा एवसाड कानिड योडा जहाजबे? साक्सिडमा खोजि चाहि खिमबे?
 टेखडामि ॥
⁷ कानिड टुरोस सहरबाड टोलेमाइस लु:मे सहरबे? रुवनुड योडा
 जहाजबाड ओरलबा लिसिडमा ॥ मोबे? कानिड परभुबे? बिस्वास
 ले:?खुबा वावानिसाजिनुड चुप्सि? खे?नुड इ?याक खोजिनुडनो?
 पेनिडमा ॥ ⁸ मोबाड बिदा लिघे?नुड वागियाराम कानिड कैसरिया
 सहरबे? रुवटुडमा ॥ मोबे? कानिड सुसमाचारमि खा परचार ले:?खुबा

फिलिपमि खिमबे? पेनिडमा ॥ फिलिप चाहि यरुसलेमबे? निवाहाडमि योम्बोक ले:१मामि सेम्बा?आ चुक्च जनाबे? खोसोड इक्को लेटे ॥

९ खोमि रिबाड फुडसया मेल्ले:१पा?आ मे?ना?मि पसाजि टुसामे ॥

खोजिबे? निवाहाडमि खा इ:मे बरदान काप्टामे ॥ १० कानिड फिलिपमि खिमबे? इ?याक नियाक पेम्माबे? यहुदिया ठाउबाड अगाबस निड

ले:१खुबा अगमबक्ता यहुदि या?मि कानिडबे? लेन्डा ॥ ११ अगाबसडे?

पावलमि थोडमाइ लानुड मोसे? टाडबामि हुक सयड हि:क्नुड लु:सु,

“पबित्रा होडनिडाडे? इडो? लु:सु, ‘इगो थोडमाइमि धनि यरुसलेमबे? खे?येम्बाड यहुदि अगुवाजिडे? य:प्नुड इडो?नो? हि:१इन्डुजेनुड हाइखा जातिजिमि हुक्पे? पि:न्डुजे ॥”

१२ इगो खा खेम्नुड कानिडनुड मोबे?हा चोबे? पावल ‘यरुसलेम ए?खे?ने’ लु:नुड बिन्ति ले:१टुडमा ॥ १३ तर पावलडे? इडो? लु:सा, “हेनिडे? हाप्साड इन्डोड केए निडा निरास टोडइन्डानुमे ? का गो यरुसलेमबे? खे?नुड हि:क्चमुमारे?नो? ने?नि, तर परभु येसुमि लागि सिग्ने?मासो यजि लेडे ॥” १४ कानिडे? पावल मासेवहेसुडमा मोडोणे? कानिडे? खो ‘निवाहाडमि हुक्पे? युडनुड’ योड उगिडमा ॥

१५ मोबा एक्सड कानिडमि कोवनाम पोरोक्नुड यरुसलेम रम्बुगिडमा ॥

१६ कैसरियाबे?हा आठा बिस्वासि वावानिसाजिसोड कानिडनुडनो? सोरि खडामि ॥ मोबा साइप्स योडे? यिजुम्बा?आ पोडबोडमाबि?ए इक्को मनासोन निड ले:१खुबा या?मिमि खिमबे? पेडसि? कानिड

चिक्खे?टामि ॥ खो या?लोए बिस्वासि लेटे ॥

पावलडे? याकुब चुप्पा?आ

¹⁷ मोबा कानिड यरुसलेमबे? रुवमाबे? मोबे?हा बिस्वासिजिडे? कानिड

साप्थाडमानुड स्वागत लेटामि ॥ ¹⁸ वगियाराम पावलडे? कानिड
याकुबमि खिमबे? चिक्खे?टा ॥ याकुबमि खिमबे? चोप एलडरजि

सुम्बा?आ ले:टामि ॥ ¹⁹ पावलडे? खोजि चुप्नुड स्वागत ले:टुजि खोजिनुड
जातिजिमि रुम्बे? सुसमाचार परचार ले:माबे? निवाहाडडे? इन्डो?हा

योम्बोक ले:टुहा लु:नुड चोप खा मोबे?हाजि इ:बे?टुजि ॥ ²⁰ पावलमि खा
खेम्नुड माहाजिडे? निवाहाडमि ओहाड ले:टुजि ॥ मोबा माहाजिडे? पावल

इडो? लु:सुजि, “इगोबे?सोड बे?लो यहुदिजिडे? परभुबे? बिस्वास ले:नुड
मोसाडे? पि:बा?आ यहुददि धारमिक खासोड नुरो? पालन

ले:मे?निडसिन्डुजे ॥ ²¹ तर हागो ‘मोसाडे? पि:बा?आ नियम ले:मा
पाप्नि मोबा वाडाडपसे? खतनासो ले:मा पाप्निनुड यहुदिजिमि
नियमसोड ले:मा पा?नि’ लु:नुड हाइखा जातिजिमि रुम्बे? पेडखुबा

यहुदिजि हेने? इ:न्डुए लेए लु:मे खा खोजिडे? खेम्डुजे ॥ ²² मोडोणे?

हागो कानिड इन्डोवटे ले:मे ? हेड इगोबे? लेडनुड पेडइटे लु:नुड

माहाजिडे? चैबानो? खेम्डुन्डुजे ॥ ²³ मोडोणे? कानिडे? लु:बा?आ खेप्से ॥
कानिडनुड इगोबे? चोखो लिमामि लागि सावमेन्जा पेन्नुड हेन्जरुड

हेडखुबा रिबाड या?मिजि टुम्मे ॥ ²⁴ हागो खोजिनुड हेडसोड मन्दिरबे?
खे?नुड चोखो लिमामि खोजिनुड पेने ॥ इघाजि मोडोवपे? सिइये खर्व
वाहि हेने? फोडबे?नुड माहाजिमि टाड खोमे?टाजे ॥ इडो? हेने? यहुदि
धारमिक नियमडो? ले:पा?आ खाडनुड माहाजिडे? खेम्बा?आ खा

चैबानो?मा ने?निहाले लु:नुड लेडोवडुजे ॥ ²⁵ परभु येसुबे? बिस्वास

ले:?खुबा हाइखा जातिहा या?मिजि चाहि 'मुरतिबे? चे?टिबा?आ खा

ए?चामे, हरि ए?चामेनुड बे?ला फिन्नेबा?आ जन्तुमि सा ए?चामे मोबा
बेबिचारबाड ओ: पेम्मे' लु:नड कानिडे? निधो ले:?नुड पत्रा
साप्हाडडुडमे ॥”

²⁶ इडो? पावलडे? इगो खा खासिनुड वागियाराम माहा रिबाड या?मिजि
चिक्मानुड चोखो लिमामि मेन्जारे? पेन्नुड मन्दिरबे? खडा ॥ खोसे?
माहाजिनुड चोख्याबा लिमे मेन्जारे? याकसोड ले:टु ॥ मोबा एक्साड
पावल चोख्याबा लिमे साक्मेन्जामा हेन्जरुड येप्पेनुड भोग पि:मे याक
इन्डोवपे?टे सिइये लु:नुड याडाडबाजि लु:सि? मन्दिरहोडसि?यु पेखडा ॥

पावल मन्दिरबे? रा:प्पा?आ

²⁷ चोखो लिमे एच्चि याक पुरा लिरिस? पोरोक्पा?आ लेटा ॥ मोडोवपे?
एसिया ठाउबे?हा यहुदिजिडे? पावल मन्दिरहोडसि?यु खाडडोवटुजि ॥

माहाजिडे? या?मिजि चोप्टिनुड पावल रा:बुजि ॥ ²⁸ मोबा माहाजि बे?ए

सेम्ले? वोसाड इडो? काबोगामि, “आबानिडे इर्राएलि वावानिसाजि, इगो
या?मिनो? कानिडनुड कानिडहा यहुदि नियममि बिरोध ले:?खुबा मोबा
मन्दिरबे? पुजासोड एले:?मे लु:नुड या?मिजिमि निडा फेडघुबा ले:ये ॥
मोडोवरे?नो? ने?नि हाइखा जातिहा या?मिजि मन्दिर होडसि?यु

चिक्खे?नुड पबित्रा ठाउसोड इगोसे? अपबित्रा टोडडुए ॥” ²⁹ माहाजिडे?
एफिससबाड लेम्बा?आ तोरफिमस पावलनुड सोरि सहरबे? खाडबा?आ
लेटे ॥ माहाजिडे? मि?टुजि पावलडे? मो या?मि मन्दिर होडसि?युसोड
चिक्खे?टु ॥

³⁰ इगो खा सहरबे?हा चोप या?मिजिडे? लेडोक्टुजि मोबा चोप या?मिजि मोबे? पिन्जासामि ॥ माहाजिडे? पावल राःप्लुड मन्दिरबाड पाखे?यु

से?आप्लुड मन्दिरमि राम्बाडेम सेक्टिसुजि ॥ ³¹ माहाजिडे? पावल से?नेसि? पोरोक्पा?आ लेटे ॥ मोडोक्पे?नो? यरुसलेमबे? या?मिजि से?खुसे?चुसि? पोरोक्पे?टामे लुःमे खा रोमि येरिडजिमि चोप्पाड एप्पा

येरिडडे? खेमडोक्टु ॥ ³² मो खा खेम्मासोरोवनो? खो येरिडजिनुड येरिडजिमि एप्पा चिक्मानुड या?मिजि सुम्बा?आ ठाउलाम खडा ॥ माहा येरिडजि मोबे? लेम्बा?आ खाडनुड पावल रोम्मा लेडुजि ॥

³³ मो येरिडमि चोप्पा एप्पाडे? पावल राःप्लुड त्रेक्चिमि निक्चि कोडडे? हिक्मे?टुजि ॥ मोबा मोसे? या?मिजि सिप्सुजि, “इगोसे? इमाडडे लेःटुए ?

इगो या?मि हाम्बिण्डे ?” ³⁴ तर माहा या?मिजिबे? आढाडे? इक्को खा लुःसुजि, आढाजिडे? हाइको खा लुःसुजि ॥ तर हाइखाजिडे? हाइके खा लुःसुजि ॥ इडो? मो येरिडमि चोप्पाड एप्पाडे? इमाड लुःनुड मालेहेसु ॥

मोडोणे? खोसे? पावल येरिडजि पेन्ढाम ठाउबे? लाघे?मे?टुजि ॥ ³⁵ माहा येरिडजिडे? पावल चिक्खे?माबे? या?मिजिमि हुलसो खोजि टिडसाड एडगुवा एडगुवा खडामि ॥ थेनाडबा मिन्डु साडमे?निडसिमाबे? पावल से?नेमामि खोबे? माहा या?मिजि पेडिघडामि ॥ मोडोणे? माहा या?मिजिबाड टाक्लु टेम्मामि येरिडजिडे? पावल हुणे? ठे?खे?टुजि ॥

³⁶ मोडोक्लोसोड माहा या?मिजिडे? पावल से?नेमानो? खेःये कासाड वोमे?निडसिडामे ॥

³⁷ येरिडजिमि पेन्ढाम खिमबे? प्रेखे?सि? पोरो?माबे? पावलडे?

येरिडजिमि चोप्पाड एप्पा लुःसु “हजुर, केए इक्को खा के? हेडनुड

युडहेनुडे ?” येरिडजिमि चोपपा एप्पाडे? मो लुःसु, “इमा हेने? गिरिक
खाप्लासो लेनुडए ? ³⁸ इमा हेड मो हुल दुडगा लेः? खुबा मिर्यामि नेता
ने?नेन्डे, हेने? रिक्पोड हजार सरकारमि बिरोध लेः? खुबाजि

नाम्भुडलाबे? लाघे?टुजे ?” ³⁹ पावलडे? लुःसु, “ने?नि हजुर, का गो
किलिकिया ठाउमि टारसस लुःमे सहरबे?ए यहुदि जाति लेडे ॥ का मो
निड मुक्पा?आ सहरमि इक्को नागरिक लेडे ॥ नामनाम लेः?नुड इघा

या?मिजिमि पोम्बे? का इच्छे? खा इःमे?मो ॥” ⁴⁰ येरिडजिमि चोप्पाड

एप्पाडे? यामुसे लुःसु, मोबा पावलडे? थेनाडबे? येःप्लुड या?मिजि हुक्मि
खाप्ले? योड उगानिडे लुःसुजि ॥ मोबाड एक्साड पावलडे? हिब्रु

खाप्लाबे? इःबोगु-

22

¹ होउ पाबाजि, वावाजिनुड निसाजि, हेनिडमि पोम्बे? के? लुःमानो?

खेये खा हागो लुःनिम्ने खेप्सानुमो ॥” ² पावलडे? खामि टाडबामि यहुदि
हिब्रु खाप्लाबे? यामुबा?आ खेमनुड चोप या?मिजि हागोसो योड उगामि ॥

³ पावलडे? लुःसु, “का किलिकिया ठाउमि टारसस सहरबे?ए यहुदि लेडे ॥
तर का इगो यरुसलेम सहरबे?नो? गमलियलबाड कानिडमि टुबालाबाजि
लेः?आ?पा?आ धारमिक साप्चिरामि खा नुरे? चिडइटुडे ॥ आयु हेनिड
निवाहाडलाम इन्डोक पाडनुन्डानिडे मोडोवनो? या?लो के?सोड खोमि

खा इमा पाडनुसिडे ॥ ⁴ निवाहाडमि रामबे? रामखुबा वाडाडपसाजिनुड

मे?ना?मिजि राःआप्लुड सेक्मे?नुड सिघे?लो चुडजासुडजि ॥ ⁵ इघा के?

लुःबा?आ खा चैबानो? लेहा लुःनुड चोप्पा एप्पा यहुदि न्याधिसमि हुलजि
सुम्हाम खिमबे?हा या?मिजिडे?सो लुःहेन्दुजे ॥ खोजिडे?नो? का
दमस्कस लुःमे ठाउबे? टुःघुबा यहुदि वावानिसाजि राःप्मे अधिकार पत्रा
पिःबा?आ लेटामे ॥ मोडोणे? का माहाजि राःप्नुड यरुसलेमबे? लाजे?नुड

दन्डा पिःमामि दमस्कसबे? खडिड ॥ ⁶ “का दमस्कस
रुक्सि?पोरोवमाबे? नाम्लेलुम याक्खे?पा?आ लेटा ॥ मोडोक्पे?नो?

नान्द्रुडमाबाड हाजोक्पे? बे?लोनो? उज्यालो का सोक्पे? पोणा ॥ ⁷ का

भुइबे? काडघडिड ॥ मोडोक्पे?नो? के? इक्को इडो? लुःबा?आ खेप्सुड,

‘सावल, होउ सावल, हेने? का इन्ढोड चुडजाडे?’ ⁸ मोबा के? लुःसुड,

‘परभु! हेड असाडे?’ मोबा खोसे? का लुःसिड, ‘का नासरतबे?ए येसु

लेडे, हेने? का चुडजामे?निडसिडे’ ॥ ⁹ मोडोक्पे? कानुड टुघुबाजिडे?

उज्यालो गो खाडडोगुजि, तर इडो? काबा?आ चाहि मेडखेप्सुजि ॥ ¹⁰ के?

लुःसुड, ‘हे परभु, हागो के? इमाड लेः?मे?’ खोसे? का लुःसिडा,

‘येपोक्नुड दमस्कस सहरबे? खडे, हेने? लेः?मे योम्बोकमि टुम्बे?

मोबे?नो? लुःये’ ॥ ¹¹ मो बे?लो पोक्पा?आ उज्यालोडे? का मिकसुरुम्बा
लिसिड मोबा केहा लाडगामजिडे? हुक्पे? राःप्नुड दमस्कस चिक्खे?टामि
॥

¹² “मो सहरबे? हननिया निड लेः?खुबा इक्को या?मि पेने ॥ खो
मोसाडे? पिःबा?आ यहुदि धारमिक नियम नुरो? पालन लेः?खुबा धरमि

या?मि लेटे ॥ खो मोबे?हा चोप यहुदिजिडे? सम्मान् लेःटुजे ॥ ¹³ मो

या?मिडे? काडमि केवपे येःपुण्ड लुःसा, 'सावल निसा, हेनेए मिने?
 एपोवलो' ॥ खोसे? इडो? लुःमासोरो? के? खो खाडडोक्टुड ॥ ¹⁴ मोबा
 खोसे? का लुःसिड, 'हेने? कानिडमि टुबाजिमि निवाहाडमि निवे?
 मि?पा?आ खा लेहेसे लुःनुड हेड सेडइटे ॥ हेने? धरमि सेवाक येसु
 खाडडोक्टु मोबा खोसे? लुःबा?आ खा खेमडोक्टु ॥ ¹⁵ इण्डो?होड खोमि
 गवाहि लिनुड हेने? खाडबा?आनुड खेमबा?आ खा चोप या?मिजि
 खेम्मे?मा खेये ॥ ¹⁶ मोडोने? हागो इमाड हुडइण्डानुमे ? येःपोवनुड
 बप्तिस्मा लासे मोबा येसुमि निड लानुड टाडबामि पापबाड चोखो लिसे' ॥
¹⁷ "मोबाड का यरुसलेम खडिड मोबा मन्दिरबे? पारथना लेः?मारोनो?
 सेन्जिसेम्माडबे? मेःखडिड मोडोवपे? ¹⁸ के? परभु खाडडोक्टुड मोबा
 परभुडे? का लुःबा?आ खाक्सुड, 'चाण्डोनो? यरुसलेमबाड राम्बोवपेसे
 इण्डो?होड हेने? केए टुम्बे? लुःमाबे? इगोबे?हा या?मिजिडे? खेप्सुजिनि'
 ॥ ¹⁹ के? परभु लुःसुड, 'हे परभु, के? चोप यहुदिजि सुम्हाम खिमबे?
 खे?नुड हेन्बे? बिस्वास लेः?खुबा या?मिजि राःपुण्ड मोःवसाडनुड
 से?खे?साड सेवपा?आ खा इघाजि चोबे? लेण्डुजे ॥' ²⁰ हेनेए टुम्बे?
 गबाहि पिःघुबा स्तिफनस हरि चेकचेक मोःवनुड से?नेमाबे? कासोड
 मोबे?नो? टुसिड् ॥ खो से?नेघुजिनुड टोडनुड खोजिमि चे? हुडमानुड
 का मोबे? पेम्बा?आ लेःटिड ॥ ²¹ तर परभुडे? लुःसिड, 'हेड खडे, के? ओः
 ओःराजि हाइखा जातिजिबे? हेड पाडमे?निडसिण्णे' ॥" ²² इडो?
 लुःडिडलो या?मिजिडे? पावलमि खा योड खेप्सुजि ॥ तर मोबा एक्साड

वोसाड काबुगामि, “इगो से?नेमानो? खेये! से?नेमानो? खेये! हागो इगो
 या?मि हिडरिक ले?मा फेन्निबा ॥” ²³ इडो? सुखिनुड खोजिडे? टाडबा
 टाडबामि खाम्मा चे? हेनुजि मोबा नान्दरुडमे?टु धुलो टुप्साड काबोगामि
 ॥ ²⁴ इगो खाडनुड रोमि येरिडमि चोप्पा एप्पाडे? “पावल होडसि?यु
 चिखे?नुड कोरराडे? रेवमे?नुड इडो? लु:सु, इडो? कोरराडे?
 मो:वमाबे?को इन्डोड यहुदिजि सुरके?पा?आ खामि टुम्बे? लु:न्दुएण्डे ?”
²⁵ इडो? कोररा टिमामि येरिडजिडे? पावल हि:वमाबे? पावलडे? खोम
 केवपेनो? ये:प्खुबा येरिडजिमि एप्पा लु:सु, “इमा रोमि जनताजि खोजिमि
 दोस मान्चुप्ले? कोरराडे? रेवमा नुये ? इमा रोमि कानुनडे? इडो?नो?
 ले:मा लु:टे ?” ²⁶ मोबा मो एप्पा येरिड चोप्पाड एप्पा येरिडबे? खे?नुड
 इगो खा खेम्मे?साड लु:सु, “हजुर! इमाडडे ले:मा योडुए ? हेने? लेन्दुए
 ? इगो या?मिगो रोमि जनतारे ले:ये ले:!” ²⁷ इगो खा खेम्नुड येरिडजिमि
 चोप्पा एप्पाडे? होडसि?यु पेखे?नुड पावल सिप्सु, “इमा हेड वैबानो?
 रोमिनो? लेये ?” पावलडे? लु:सु, “एड” ॥ ²⁸ चोप्पा एप्पा येरिडडे? लु:सु,
 “कागो बे?लो याड फोडनुड रोमि लिबा?आ ॥” पावलडे? लु:सु, “कागो
 टोवमाबे?नो? रोमि जन्त लेडे ॥” ²⁹ तर इडो?मा खा खेम्मा सोरो? पावल
 जाच ले:सि? लेम्बा?आ या?मिजि एडगुवाराम सेनामि ॥ इगो खा
 लेडोवनुड चोप्पा एप्पा येरिडसो कि?सिडा इन्डो?होड खोसे? पावल
 वेविचमि कोडडे? हि:वमे?पा?आसे? मो रोमि येरिडमि एप्पा किरिसडा ॥

पावल यहुदिजि सुम्हाम खिमबे?

³⁰ यहुदिजिडे? पावल इन्ढोड दोस टिबा?आ लु:मे खा मो येरिडजिमि चोप्पा एप्पाडे? लेमा मि?टुए ॥ मोडोगे? वगियाराम खोस्रे? एप्पा याडाडबाजिनुड चोप यहुदिजि सुम्हाम खिमबे?हा या?मिजि सुम्नुड सभा ले:मे हुकुम पि:सुजि ॥ मोबा पावल चि?खे?नुड चोपमि पोम्बे? ये:मे?टु ॥

23

¹ पावलडे? मोबे? सुम्बा?आ चोप खाडनुड इडो? लु:सु, “होउ वावा निसाजि, आयुरो केए जिबनबे? निवाहाडमि पोम्बे? चोखो निडा युडइटुडे ॥” ² पावलडे? इगो खा लु:बा?आ खेम्नुड चोप्पा एप्पा याडाडबा हननियाडे? पावलमि केवपे? ये:प्खुबा या?मिजि पावलमि याबुकपे? उबानुमे लु:सुजि ॥ ³ तर पावल हननियालाम हिडघे?नुड लु:सु, “होउ हेड खेवा खामडे? रेडबा?आ भित्ताडो?मा! खाडबाबे? नुबा तर माडे?मा निडा खि:घुबा हेडसो निवाहाडडे? मो:वइये ॥ हेड मोसाडे? पि:बा?आ नियमडो? केए न्यया ले:सि? पेडइटेहोडसो नियममि टेडिगरिक ले:नुड का मोवमे आग्या इन्ढोड पि:नुजे ?” ⁴ पावलमि केवपे? ये:प्खुबा या?मिजिडे? पावल लु:सुजि, “इमा हेने? निवाहाडडे? सेन्बा?आ चोप्पा एप्पा याडाडबासोड योड्नुए ?” ⁵ पावलडे? माहाजि लु:सुजि, “होउ वावा निसाजि, खोनो? चोप्पा एप्पा याडाडबा लेये लु:मे खा के? मेलेसुड ॥ टाडबामि या?मिजिबे? अधिकार ले:खुबा चोप्पा एप्पा याडाडबामि बिरोधबे? कामा फेन्निबा^a लु:मे खा धारमिक साप्चिराबे? सप्पा?आ खा

के?सो लेनुडहा ॥” ⁶ यहुदिजि सुम्हाम खिमबे? सदुकिनुड फरिसि
हुलबे?हा या?मिजि टुम्मे लु:मे खा लेनुड पावलडे? बे?ए सेम्लाडे? लु:सु,
“होउ वावा निसाजि, का फरिसिमि पसा फरिसिनो? लेडे ॥ सिघे?पा?आजि
फेरि हिडबोइम्मे लु:मे आस ले:पा?आसे? इगोबे? केए मुहा
लिमे?निडसिये ॥ ⁷ पावलडे? लु:बा?आ इघा खाडे? फरिसिनुड
सदुकिजिमि रुम्बे? खा मेन्डोवसा मोबा यहुदिजि सुम्हाम खिमबे?
फावखडामि ॥ ⁸ इन्डो?होड सदुकिजिडे? या?मि सिघे?नुड फेरि
हिडबोइम्मे लु:मे खाबे? बिस्वास माले:टुजे ॥ मोबा थाडसिरिदुतनुड
होडनिडा मानो?मा?आये लु:सुजे ॥ तर फरिसिजिडे? चाहि इघा सुम्जि
खाबे?नो? बिस्वास ले:टुजे ॥ ⁹ मोडोणे? मोबे? बे?ए हल्ला लिसा ॥
फरिसि हुलबे?हा आढा धारमिक खा इ:खुबाजिडे? येपोवनुड
सदुकिजिमि मारे बिरोध ले:साड लु:सुजि, “कानिडे?को इगो या?मिमि
इमाडसो दोस मान्चुटुडमा ॥ इगो या?मिबाड होडनिडा अथबा
थाडसिरिदुत यामुबा?आनो?होडसो इमाडडे पि?खेये!” ¹⁰ माहाजिमि
रुम्बे? खि:मावा बे?ए लिघडा ॥ मोडो? खोजि खि:माबे? पावल
से?नेन्डुजेन्डे मि?नुड येरिडजिमि चोप्पा एप्पाडे? ‘पावल मो यहुदिजिबाड
खोजि पेन्हाम खिमबे? चि?खे?टानुमे’ लु:नुड येरिडजि लु:सुजि ॥ ¹¹ मो
सेन्डानो? परभुडे? पावलमि केवपे? लेन्नुड लु:सुजि, “ए?किसिने! इगो
यरुसलेमबे? केए साविछ पि:डिडोवनो? रोमबे?सोड पि:मा खे:ये ॥”

पावल से?नेमामि मोत्ता

¹² वगियाराम माविम यहुदिजि सुम्नुड पावल से?नेमे मोत्ता इःनुड
 खोजिडे? इडो? कामानुड हेञ्जुरुड हेनुजि, “पावल मेसे?नेरो कानिडे?
 इमाडसोड चामा उडमा फेन्नबा ॥” ¹³ इडो? पावल से?नेमा खेःये लुःनुड
 हेञ्जुरुड हेडघुबाजि रिबोडबाडसो बे?लो टुसामि ॥ ¹⁴ मोबा एक्साड
 माहाजिडे? एप्पा याडाडबाजिनुड हाइखा यहुदि धारमिक नियम
 इः?खुबाजिबे? खे?नुड लुःसुजि, “कानिडे? पावल मेसे?नेरो इमाडसोड
 चासुडमानि लुःनुड इगो पावल चैबानो से?नेमे हेञ्जुरुड हेडइटुडमे ॥
¹⁵ हागो हेनिडे? येरिडजिमि चोप्पाड एप्पा इडो? लुःसानुमे ‘यहुदिजि
 सुम्हाम खिमबाड पावलमि टुम्बे?हा बे?लो खा लेमा मिइण्डुडमा’ लुःनुड
 पावल येरिडजि पेन्हाम किल्लाबाड के?पि?माना ॥ मोबा यहुदिजि
 सुम्हाम खिमबे? पावल आप्पाबे? कानिडे? खो रम्बे?नो? से?नेण्डुडमे
 ॥” ¹⁶ तर माहा यहुदिजिडे? पावल से?नेमामि रम्बे? सुक्मे?निडसिण्डुजे
 लुःमे खा पावलमि हाडले?साडे? लेडोक्टु ॥ मोबा खोसे? येरिडजि पेन्हाम
 खिमबे? खे?नुड खोमि कोयाड पावल खेम्मे?टु ॥ ¹⁷ पावलडे? मो खा
 खेम्मासोरोक इक्को एप्पा येरिड के?नुड लुःसु, “इगो पिच्छा येरिडमि
 चोप्पा एप्पानुड बिन्ति लेः?मे खा टुउरो, मोमि लागि इगो पिच्छा खोबे?
 चिक्त्त्याबे?माना ॥” ¹⁸ मो येरिडजिमि एप्पाडे? पावलमि हाडले?सा
 येरिडजिमि चोप्पाड एप्पाबे? वि?खे?पे?नुड लुःसु, “हजुर, सेकयुडबा?आ
 पावलडे? का के?नुड ‘इगो पि?छामि हेडनुड बिन्ति लेः?मे खा टुये
 लुःबासे?’ इगो पि?छा हेनेएम्बे? चिक्त्तेटुडे ॥” ¹⁹ येरिडजिमि चोप्पाड

एप्पाडे? मो पि?छामि हुकपे? राःप्नुड एडे? मे?योड वि?खे?नुड सिप्सु,
 “इमा खा लुःमा टुहा ? इःबेसे ॥” ²⁰ मो पि?छाडे? लुःसु, “वागिया
 यहुदिजिडे? ‘पावल यहुदिजि सुमठाम खिमबे? हाइखा खा सिम्मामि
 लाघे?टोकमा लुःनुड हेडबे? बिन्ति ले?सि? लेम्मामि मोत्ता इःटुजे ॥ ²¹ तर
 हेने? खोजिमि खा ए?खेम्मे! इन्डो?होड रिक्पोडबाडसो बे?लो
 यहुदिजिडे? ‘पावल मेन्से?लो इमाडसो ए?चामे, एउडमे लुःनुड हेन्जुरुड
 हेन्डुजे ॥ खोजि हागोनो? पावल से?नेमामि रामबे?
 सुक्मे?निडसिम्मेनुड खोजिडे? हेनेए आग्यामि आसबे? पेडइटामे ॥

²² इडो?मा खा खेम्नुड येरिडजिमि चोप्पाड एप्पाडे? मो पि?छा लुःसु,
 “इगो खा हेने? का लुःबा?आ लुःनुड असासो ए?लुःमेयो लुःनुड पाक्सु ॥”

पावल बे?ए हाकिम फेलिक्सबे? पाडबा?आ

²³ मोबा एक्सड येरिडजिमि चोप्पाड एप्पाडे? येरिडजिमि निप्पाड

एप्पाजि के?नुड लुःसुजि, “कैसरिया खे?मामि निच्चि सय येरिडजि,
 सत्तरिजनाडो? घोडा साडघुबाजिनुड निच्चि सयडो? भाला खिःघुबा
 येरिडजि पोरोगानुमे ॥ खोजि युडा नोक्चि बोडनो? राम्बोकमा खेम्मे ॥

²⁴ पावल साडमे घोडासोड पोरोगानुमेनुड खो नुरो? टाप्पु टेन्नुड बे?ए

हाकिम फेलिक्सबे? चिक्त्यासानुमे ॥” ||b00198c.tif|col|||पावल

चिक्त्याखुबा येरिडजि |23:24 ²⁵ इडो? लुःसे?नुड मो येरिडजिमि चोप्पा
 एप्पाडे? बे?ए हाकिम फेलिक्स इडो?मा इक्को पत्र्य साबु-

26 “आदरनिया बे?ए हाकिम फेलिक्स, का क्लौडियस लुसियसबाड सेवायो: ॥

27 इगो या?मि यहुदिजिडे? से?नेमामि रा:ण्टुजि तर इगो रोमि जन्त लेये ले ॥ इगो खा लेडोवनुड के? काडडाडबे? खे?नुड इगो जोगाबा लेएटुडे ॥

28 इगोसे? इमाड बिरोड लेएटु लु:नुड लेमामि के? यहुदिजि सुम्हाम

खिमबे?सोड वि?खे?टुड ॥ 29 तर इगो से?नेमारोमा अथबा तिरोडगा खिमबे? सेवमेडो?मा बिरोडगो इमाडसो मेले:टि?टु ॥ खोजिडे? टिबा?आ दोस चाहि मोसाडे? पि:बा?आ खोजिमि यहुदि नियममि खामि टुम्बे? लेए

॥ 30 यहुदिजि इगो या?मि से?नेमे दाउबे? टुम्मे लु:मे खा के?

खेम्बा?आसे? हेनेएम्बे? पाडइटुडे ॥ 31 येरिडमि एप्पानुड येरिडजिडे? येरिडजिमि चोप्पाड एप्पामि आग्या खेम्नुड पावल चिवमानुड राम्बोगामि ॥ खोजिडे? पावल मो सेन्डानो? एन्टिपात्रिस लु:मे सहरठोक चिविटओसु

॥ 32 राम्घे?खुबा येरिडजि चाहि वागियाराम् पावल घोडाबे? साडखुबा

येरिडजि जिम्मा पि:आनुड खोजि पेन्हाम किल्लाबे? टेसामि ॥ 33 घोडाबे? राम्घुबा येरिडजि कैसरियाबे? रुवटुजि ॥ मोबा पावल चाहि बे?ए

हाकिमबे? येरिडजिमि चोप्पाड एप्पामि पत्रासो जिम्मा पि:सुजि ॥ 34 मो

पत्रा ने?से?नुड बे?ए हाकिमडे? पावल सिप्सु, “हेनेए खिम हाम्बे?टे ?

हाम्बे ठाउबे? सिइये ?” पावलडे? लु:सु, “किलिकियाबे? सिइये ॥” 35 मोबा

बे?ए हाकिमडे? लु:सु, “मोडो?होड हेड उजुर ले:खुबाजि इगोबे? लेडनुडरे? हेनेहा खा खेमडनुडे ॥” मोबा बे?ए हाकिमडे? पावल नुरो? हुडनुड हाडबा हेरोदमि हाडखिमबे? युवसानुमे लु:नुड आग्या पि:सुजि ॥

24

बे१ए हाकिम फेलिक्समि पोम्बे१ पावल

¹ डाउम याक एक्सड चोप्पाड एप्पा याडाडबा हननियानुड यहुदि खा इः१खुबाजि तरतुल्लस लुःमे वकिल चिक्मानुड कैसरिया१मु लेस्सामि ॥ माहाजि चोबे१ बे१ए हाकिममि पोम्बे१ पावल दोस टिसाड बिरोध लेःटुजि ॥

² पावल मोबे१ केः१नुड तरतुल्लसडे१ पावलमि दोस इडो१ लुःसाड

फेलिक्समि पोम्बे१ युक्सु “केए आदरनिया हाकिम फेलिक्स, हेड निडा दाडबा अगुवाडे१ बे१लो निडबाड कानिड सान्तिबे१ पेन्डोवइटिडमे ॥

मोबा कानिडमि देसबे१ नुबा नुबा योम्बोक लि१मे१निडसिये ॥ ³ इगो खा कानिडे१ मि१युडइटुडमे मोबा मोमि लागि निडा होडसि१युरा हेड ओहाड

पिःनिम्ने ॥ ⁴ हेडनुड इच्छे१ यामुमे खा टुये ॥ मो कानिडमि इक्को बिन्ति

खेम्बे१माना ॥ ⁵ कानिडे१ लेबा१आ इगो या१मि हुल दडगा लेः१खुबा लेये

॥ इगोसे१ नासरि^b धरम- हुलबे१ए नेता लिनुड माक्खाम्डेम्बे१हा

यहुदिजिमि रुम्बे१ खायोक् मायोक् लेः१साड रम्इये ॥ ⁶ इगो या१मिडे१

मन्दिर जुठो टोडमा योक्माबे१ कानिडे१ राबुडमा ॥ [मोबा कानिडमि

नियमडो१ न्याय लेः१मा पोरोपा१आ लेःटुडमा ⁷ तर येरिडमि चोप्पाड एप्पा

लुसियसडे१ ये१ये१ कानिडमि हुकबाड इगो या१मि डाप्खे१टु ॥ ⁸ मोबा

लुसियसडे१ दोस टिघुबा या१मिजि आदरनिया हाकिम्बे१ खे१मिरो लुःनुड

आन्या पिःसु ॥] हेने१ टाडबे१नो१ इगो या१मि सिम्होड कानिडे१ खोमि

बिरोधबे१ टिबा१आ दोस चैबानो१ लेए लुःनुड लेडोइन्डुए ॥” ⁹ मोबे१

हाइखा यहुदिजिडे?सो मो दोस चैबानो? लेये लु:नुड गवाहि पि:सुजि ॥

फेलिक्समि पोम्बे? पावल

¹⁰ मोबा बे?ए हाकिम्डे? पावल 'यामुसे' लु:नुड हुविम खाप्ले? लु:सु,
पावलडे? इडो? लु:सु, "आदरनिया एप्पा हाकिम, हेड बे?लो निडबाड इगो
देसबे? न्यया ले:खुबा लिबा?आ लु:मे खा के? लेनुडे ॥ मोडोणे? केए
खा युडमामि केए निडा साप्थाडइटे ॥ ¹¹ यरुसलेमबे? निवाहाडमि सेवा
ले:सि? का खे?पा?आ बारो याकबाड बे?लो मालिडि? ॥ इगो खा गो
हेणे? नेक्वा लेडोइन्डुए ॥ ¹² का दोस टिघुबाजिडे? का चुप्माबे? मन्दिरबे?
असानुडसोड खिबा?आ खा इक्को यहुदिडे?सोड दाबि ले:हेसुनि ॥ न
माहाजिडे? के? यहुदिजि सुम्हाम्नुड सहरबे?हा या?मिजि माडेहा खा
इ:नुड हुल दडगा ले:पा?आनो? दाबि ले:हेन्डुजे ॥ ¹³ न आक्खाजिडे?
का टिबा?आ दोसमि गवाहिनो? ला:पहेन्डुजे ॥ ¹⁴ तर इक्को खा चाहि के?
लु:नुडे मुक्ति चुप्ये राम इघाजिडे? मे?नो?मा लु:न्डुजे मो रामबे? का
रामडेनुड कानिडमि टुबाजिडे? ओहाड ले:पा?आ निवाहाडमि ओहाड
ले:नुडे ॥ तरसोड मोसाडे? पि:बा?आ नियमनुड अगमबक्ताडे?
साप्पा?आ साप्चिराबे? टुहा चोप खा के? बिस्वास ले:नुडे ॥

¹⁵ खोजिमिडो?नो? धरमिजिनुड पापिजि सिघे?नुड फेरि हिडबोवइम्मे

लु:मे खामि आस काबे?सोड टुये ॥ ¹⁶ मोडोणे? का निवाहाडनुड
या?मिजिमि पोम्बे? केए निडा चोखो युडमा मिइनुडे ॥

¹⁷ यरुसलेमबे? बे?लो निड याक्नुड एक्साड के? केहा यहुदि
वावानिसाजिमि लागि सुम्बा?आ दाननुड निवाहाड भेटि पि:सि? लेन्डिडे

॥ ¹⁸ इडो? ले:टिडमाबे? माहाजिडे? का मन्दिरबे? चुबामि ॥ मोडोक्पे?

चोखो लिमे रिति लेः?से?पा?आ लेःटिडे ॥ मोडोक्पे? कानुड या?मिमि
हुलसोड माडामि, इमाड हुल दडगासोड मेलिडि? ॥ ¹⁹ तर एसिया ठाउबाड
आप्खुबा आढा यहुदिजिडे? का मन्दिरबे? खावडोवटामि ॥ केए बिरोधबे?
लुःमाहा खा माहाजिनुड टुसाहोड माहाजिनो? हेनेए पोम्बे? लेन्नुड उजुर
लेः?मा खाडे ॥ ²⁰ ने?निहोड यहुदिजि सुम्हाम खिमबे? केए बिरोधबे?
दोस टुउहोड इगोबे? टुघुबाजिडे? लुःसुमियो ॥ ²¹ इक्को खाबे? इघाजिडे?
दोस टिममे ॥ मो खा के? इडो? लुःबा?आ लेःटे, 'सिघे?खुबाजि हिडइम्मे
लुःमे खाबे? के? बिस्वास लेःनुडे लुःबा?आसे? आयु इघाजिडे? केए न्यया
ले?मे?निडसिममे ॥'

²² फेलिक्सडे? इगो मुक्वितामि राममि टुम्बे?ए खा नुरो? लेबा?आ लेटे ॥
मोडोने? खोसे? इडो? लुःनुड बिटा पिःसुजि, "हागो हेनिडमि उजुरिमि खा
येरिडमि चोप्पाड एप्पा लुसियस लेन्नुडरे? लिये ॥" ²³ मोबा फेलिक्सडे?
येरिडजिमि चोप्पाड एप्पा इडो? लुःनुड आग्या पिःसु, 'पावल नुरो? हुडमे
तर खो पा?मिहा कोवनाम याडघि?खुबा लाडगामजि चाहि आसेवमाहाजि
मोबा पावलसोड चुरोकनो? एलेः?मे' ॥

पावल फेलिक्सनुड दुरसिल्लामि पोम्बे?

²⁴ मोबा इ?याक नियाक एक्साड फेलिक्स खोमि ठा?मा दुरसिल्लानुड
लेस्सा ॥ दुरसिल्ला यहुदि लेटे ॥ मोसे? पावल केः?नुड खिरिस्ट येसुबे?
बिस्वासमि टुम्बे?हा खा पावलबाड खेप्सु ॥ ²⁵ तर पावलडे? खा
इघे?माबे? इडो? लुःसु, 'निवाहाडमि धारमिक आग्याडे? लुःडिडो?

योम्बोक लेः?मा खेहा, कानिडमि निडा नुबा योम्बोकपे? टिमा खेहानुड,
निवाहाडमि न्यायमि याक लेम्मे?निडसिये' लुःमाबे? फेलिक्सडे?

कि?सिसाड पावल लुःसु, “हागो हेड खडे, हाइखा खा वागिया सिडआ

इःमा सि?होड केन्ने ॥”²⁶ फेलिक्सडे? पावलबाड याड चुप्डयेन्डे लुःनुड
आस लेः?पा?आ लेटे ॥ मोडोगे? घरि घरि पावल केः?नुड खा इःसे ॥

²⁷ मोबा डिनिड एक्साड फेलिक्समि साटोबे? परकिअस फेस्तस निड
लेः?खुबा हाकिम लिसा ॥ फेलिक्सडे? चाहि यहुदिजि साप्थाडमे?मामि
अना पावल येरिडजिमि तिरोडगा खिमबे? सेक्नुड युक्सु ॥

25

पवालडे? योमि हाकिम फेस्तसनुड बिनित लेः?पा?आ

¹ फेस्तस हाकिम लिनुड रोम्बाड यहुदिया ठाउबे? लेम्बा?आ सुम याक
एक्साडनो? कैसेरियाबाड यरुसलेम खडा ॥ ² खो मोबे? टुमाबे? एप्पा
याडाडबाजिनुड यहुदि नेताजिडे? पावलमि बिरोधबे? दोस युक्सुजि ॥

³ मोबा माहाजिडे? फेस्तस “इन्डोवहोडसो पावल यरुसलेमबे?

पाडबे?माना लुःनुड बिनित लेटुजि, इन्डो?होड पावल माहाजिडे?

रामबे?नो? से?नेमामि मोत्ता इःबा?आ लेटे ॥ ⁴ तर फेस्तसडे? माहाजि

इडो? लुःसुजि, “पावल गो कैसेरियामि तिरोडगा खिमबे? सेक्नुडबा?आ

लेये ॥ कासोड चान्डोनो? कैसेरियाबे? खेएडे ॥ ⁵ हेनिडबे? आढा नेताजि
कानुड खे?मा मिडइडानिडहोड पाक्सानुमे ॥ पावलडे? चैबानो? बिरोड
लेः?पा?आहोड खोमि बिरोधबे? मोबे?नो? उजुर टिहेन्डुजे ॥

६ इक्पोड याकडो? फेस्तस यरुसलेमबे? पेना मोबा खो कैसेरियाबे? टेसा
 ॥ कैसेरिया रुक्नुड वागियारामनो? न्यया ले:१ठाम्बे? पेन्नुड 'पावल
 मोबे? लाप्टानुमे' लु:नुड आग्या पि:सु ॥ ७ पावल मोबे? लेन्डा मोबा
 यरुसलेमबाड लेडखुबा यहुदिजि खोमि खिरिखिरि ये:पुनुड खाल खालहा
 दोस टिसुजि ॥ तर खोजिडे? टिबा?आ दोस वैबानो? लु:नुड पक्का
 माले:१हेसुजि ॥ ८ मोबा पावलडे? माहाजि इडो? लु:सुजि, "के? गो यहुदि
 धरममि बिरोध मेले:१टि?, मन्दिरनुड रोमि बे?ए हाडबामि बिरोधसोड
 माले:१टि? ॥"

९ तर फेस्तसडे? यहुदि अगुवाजिमि निडा हेजामामि पावल लु:सु, "हेड
 यरुसलेम पाडइन्ने मोबे?नो? इघा चोप हेनेए टुम्बे?हा खामि न्याय
 ले:नुडे, फेन्निबा ?" १० तर पावलडे? लु:सु, "का रोमि सिजरमि न्याय
 ले:१ठाम्मि पोम्बे? टुडे ॥ केए न्याय इगोबे?नो? लिमा खेये ॥ इन्डो?होड
 यहुदिजिमि बिरोधबे? के? इमाडसोड माडे?मा योम्बोक मेले:टि? लु:मे खा
 हेने?सोड लेन्डुए ॥ ११ के? देसमि नियममि टेडिघरिक्नुड आढा या?मि
 से?मे योम्बोक ले:१पा?आ चुफ्होड मोमि सजाय का सिमा सि?होडसोड
 सिडे ॥ तर यहुदिजिडे? का टिबा?आ दोस वैबानो? मेले:१होड असे?सोड
 का खोजिमि हुक्पे? पि:हेनि ॥ का रोमि बे?ए हाडबाबे? बिन्ति युडडोवमे
 अधिकार डावइडे ॥"

१२ मोबा फेस्तस खोमि हाइखा लाडगामजिनुड छलफल ले:१नुड पावल
 लु:सु, "हेने? रोमि बे?ए हाडबाबे? बिन्ति युडडोवमे लु:नुड लु:सु ॥
 मोडोने? हेड खोबे?नो? पाडइन्ने ॥"

फेस्तसडे? हाडबा अग्रिपानुड सल्लाह ले:१पा?आ

13 इ॒याक॑ नियाक ए॒वसाड॑ हाडबा अ॒रिपानुड॑ खोमि निसा बरनिकि लुःमे फेस्तस स्वागत लेः॑मामि कैसेरियाबे॑ लेस्साजि ॥

14 माहाजि मोबे॑ इ॒याक॑ नियाक पेडनुड ए॒वसाड॑ फेस्तसडे॑ हाडबा अ॒रिपा पावलमि टुम्बे॑ खा इडो॑ खेम्मे॑टु, इगोबे॑ फेलिक्सडे॑नो॑

शेवपा॑आ इवको या॑मि टुये ॥ 15 का यरुसलेमबे॑टु खे॑माबे॑ एप्पा याडाडबाजिनुड यहुदि नेताजिडे॑ खोमि टुम्बे॑ दोस टिबा॑आ लेटेनुड खो दन्डा पिःमा खेये लुःसुजि ॥

16 तर के॑ माहाजि इडो॑ लुःसुडजि 'या॑मि टिबा॑आ दोस पक्का मेलिरो रोमि नियमडे॑ दन्डा पिःडोविनबा ॥ दोस टिबा॑आ या॑मिडे॑ दोस टिघुबा

या॑मिमि पोम्बे॑ टाडबामि खा लुःडोवमा खेये ॥ 17 मोबा माहाजि काबे॑ लेस्सामि के॑ चाण्डो लेः॑नुड वागियारामनो॑ पावल न्यया लेःठाम्बे॑

चि॑आप्टानुमे लुःसुडजि ॥ 18 पावल दोस टिघुबाजिडे॑ खो चैबानो॑ दोसि लेये लुःनुड पक्का लेःन्डुजि होला मिडुडे तर के॑ मि॑पा॑आडो॑

माहाजिडे॑ खा पक्का मेलेः॑हेसुजि ॥ 19 खोजिमिनो॑ धरमनुड सिघे॑पा॑आ येसु मि टुम्बे॑रे॑ पावलनुड खिःमावा काप्टुजि ॥ मो पावलडे॑ चाहि सिघे॑पा॑आ येसु हिडबोइटे लुःमे खाबे॑ जिद्धि लेःन्डुए ले

॥ 20 मोबा इघा खामि टुम्बे॑ के॑ इमाडसोड मेसिमहेसुड ॥ मोडोणे॑ के॑

पावल 'यरुसलेमबे॑टु खे॑नुड मोबे॑नो॑ हेनेए न्यया लेः॑मा फेन्ने ?'

लुःनुड सिप्सुड ॥ 21 तर पावलडे॑ खोमि मुद्दामि न्यया रोमि हाडबाबाडनो॑ लेः॑टोवमा लुःनुड बिन्ति लेः॑पा॑आसे॑ के॑सोड खो हाडबाबे॑ मेम्पाडलो येरिडमि पोम्बे॑नो॑ नुरो॑ हुडमे आग्या पिःटुडे ॥

22 मोडोणे? अग्रिपास हाडबाडे? फेस्तस लु:सु, “इगो या?मिनुडनो?
चुप्नुड खोमि खा खेम्मा मि?इनुडे ॥” फेस्तसडे? इडो? लु:सु,
“वागियारामनो? हेने? खेम्डोवइन्डुए ॥”

पावल अग्रिपासमि पोम्बे?

23 मोबा वागियाराम हाडबा अग्रिपासनुड बरनिकि बे?ए सम्माननुड
लेस्साजि ॥ खोजि यहुदिजि सुम्हाम खिमबे? येरिडमि एप्पाजिनुड सहरमि
चोप्पाड बे?हाजिनुड पेनाजि ॥ मोबा फेस्तसडे? पावल लाप्मे आग्या

पि:नुड एवसाड खो मोबे? चिक्चे?टुजि ॥ 24 मोबा हाकिम फेस्तसडे?

लु:सु, “हाडबा अग्रिपानुड इगोबे? लेडघुबा चोप वावानिसाजि, यहुदिजि
चोबे? काबे? उजुर ले:पा?आ या?मि इगोनो?यो ॥ इगो या?मि चोप
यहुदिजिडे? यरुसलेमबे?नुड कैसेरियाबे?सोड से?नेमा लु:नुड केएम्बे?

बिन्ति ले:एटुजे ॥ 25 तर इगो या?मिडे? सिमानो? खेयेडो? माडे?मा
योम्बोक ले:पा?आ इमाडसोड के? मान्चुप्नुड ॥ तर इगो या?मिडे?
खोम्दाडबे?नो? रोमि हाडबाबाडनो? न्याय ले:टोवमा लु:नुड बिन्ति

ले:पा?आसे? के?सोड खो पाडमामि पक्का ले:टुड ॥ 26 तर इगोमि
टुम्बे? रोमि हाडबा इमाडसोड मेसाप्हेसुड ॥ मोडोणे? इगो या?मि इगोबे?
हेनिडमि पोम्बे? चिक्चे?टुडे ॥ चैबानो? इमाबे? के? हाडबा अग्रिपासमि
पोम्बे? चिक्चे?मा मिडइटुडे ॥ हेनिडे? इगो नुरो? सिम्नुड जाच
ले:पे?टानुम्होड के? साप्मे खा चुप्नुडेन्डे लु:मे आस ले:एटुडे ॥

27 इन्डो?होड खोबे? इमाड दोस मेन्चुप्ले? सिजरबे? पाडमा नुबा
मि?टुडनि ॥”

हाडबा अरिपासमि पोम्बे? पावल

¹ मोबा एक्साड अरिपासडे? पावल लुःसु, “हागो हेनेए खा युडमा टुहोड युडडोइण्डुए ॥”

पावलडे? खोमि हुक ठे?साड टाडबामि खा इःबोगु ² “हे हाडबा अरिपास, का सोक्पे? यहुदिजिडे? टिबा?आ दोसमि टुम्बे?हा खा हेनेए पोम्बे? युडडोवमाबे? काडटाडबा ओहाक मिडइटिडे ॥ ³ हाडबा हेने?

यहुदिजिमि चालचलान, रितिथितिनुड खा इःजोरैबा?आसे? का झना ओहाक मिडइडे ॥ मोडोगे? हागो केहा खा युडइनुडहा, केहा खा नुरो? खेम्बे?मा ॥ ⁴ “का काडमि देसबे? मोबा यरुसलेम सहरबे? यहुदिजिमि रुम्बे?नो? वाबुगिड ॥ मोडोगे? इघा यहुदिजिडे? का इण्डो?मा या?मि लेडे लुःमे खा खोजिडे? केए पि?छाबाडनो? नुरो? लेम्मे ॥

⁵ या?लोएम्बाड का कानिडमि फरिसि लुःमे कट्टर धारमिक हुलमि या?मिजिबे? इक्को लेःटिडे मोबा मो धरमबे?नो? टुसिडे ॥ मोडोगे?

माहाजिडे? लेण्डुजे इघा खा खोजि टाडबे?सोड लुःहेण्डुजे ॥ ⁶ निवाहाडडे? कानिडमि टुबा लाबाजिनुड लेः?पा?आ हेण्डरुडबे?नो? भरोसा

लेः?पा?आसे? का आयु न्याय लेः?ठामबे? येःप्मा सि?टिड ॥ ⁷ हे हाडबा

एरिपास, मोनो? हेण्डरुड चुप्मे आसबे? कानिडमि बारो कुलहा टुबा

लाबाजिडे? निडा टिनुड लेण्डा, सेण्डा निवाहाडमि ओहाड लेःटुजे ॥

के?सोड मोनो? आस लेः?पा?आसे? इघा यहुदिजिडे? आयु कासोक्पे?

दोस टिटामे ॥ ⁸ निवाहाडडे? या?मिजि सिघे?पा?आबाड हिडबोवइण्डुजे

लु:मे खाबे? इन्ठोड हेनिडे? बिस्वास ले:१हेसानुम्निबा ?

९“या१लो के१सोड नासरतमि येसुमि बे१लो बिरोध ले:१मा खेये लु:नुड मि१टुड ॥ १० के१ यरुसलेमबे१ मोडो१नो१ बिरोध ले:टुड ॥ के१ एप्पा याडाडबाजिबाड अधिकार लानुड बे१लो निवाहाडमि या१मिजि तिरोडगा खिमबे१ सेगुडजि मोबा खोजि से१नेमा नुये लु:सुडजि ॥ ११ बे१लो खे१ के१ खोजि ‘हागोएम्बाड नासरतमि येसुबे१ बिस्वास ले:१डानि लु:मे१मामि यहुदिजि सुम्हाम खिमबे१ से१खे१नुड सजाय पि:मे१टुडजि ॥’ का खोजिनुड सारोनो१ सुरकाडिडे मोडोणे१ के१ हाइखा देसबे१हा सहरराजिसोड खे१नुड खोजि चुडजासुडजि ॥

पावलमि जिवन फेम्बा१आ

(परैरित ९:१९; २२:६-१६)

१२ इडो१ इ१याक एप्पा याडाडबाजिबाड अधिकार चुप्नुड येसुबे१ बिस्वास ले:१खुबाजि रा:प्सि१ दमस्कस लु:मे ठाउबे१ खे१मे१निडसिडिडे ॥ १३ हे हाडबा, मो लेन्डा यमबे१ खे१मे१निडसिमाबे१ नाम्बाडसोड बे१लो उज्यालो कानिडमि खिरिखिरि पोगा ॥ १४ मोबा कानिड चोप भुइबे१ काडघडिडमा मोडोवपे१नो१ हिब्रु खाप्लाबे१ इडो१ लु:बा१आ के१ खेप्सुड, ‘सावल, होउ सावल, हेने१ का इन्ठोड चुडजाडे ? चुजुमा टाकुवाबे१ हेने१ रावितडे१ इवमाबे१ हेने१एन्नो१ साराडबे१ हुवा लिये’ ॥ १५ मोबा के१ ‘परभु हेड असाडे लेये ?’ लु:नुड सिप्सुड ॥ मोबा परभुडे१ फेरि लु:सिड, ‘का हेने१ चुडजामे१निडसिबा१आ येसु लेडे ॥’ १६ हागो

पुकाडे के? हेड योम्बोक ले: खुबानुड केए साविछ पि:घुबा या?मि
टोडइन्ने ॥ मोडोणे? का हेन्नुड खाडमुटिडे ॥ हेने? केए टुम्बे?
खाडबा?आ खानुड एक्साड के? हेड खाडमुनुडहा खासो हाइखा

या?मिजि हेने? खेम्मे?मा खेये ॥ ¹⁷ हागो के? हेड यहुदिजिनुड हाइखा
जातिहा या?मिजिमि रुम्बे? पाडमे?निडसिन्ने ॥ हेड माहाजिबाड टाप्लु
टेडइन्ने ॥

¹⁸ “हेने? माहाजिमि मिक हेम्बे?नुड सेन्जिगुप्बाड उज्यालोबे? लाप्पा
खेये ॥ मोबा सैतानमि हुवबाड निवाहाडलाम टेआप्पा खेम्मे ॥ माहाजिडे?
काबे? बिस्वास ले:न्दुजेनुड माहाजिमि पाप वासोवखेहा मोबा माहाजिडे?
निवाहाडडे? सेम्बा?आ या?मिजिनुड सोरि सेवा ले:टो?इन्दुजे’ ॥

¹⁹ “हे हाडबा अगिरपास, थाडसिरिबाड चुप्पा?आ इगो सेन्जिसेम्माड
निडाबे? युडनुड पेडहेडानि ॥ ²⁰ या?लो दमसकसबे?नुड यरुसलेमबे?
मोबा चोप यहुदिया देसबे? मोबा हाइखा जातिहा या?मिजिसो पाप ले:मा
ले?नुड निवाहाडलाम टेसानिडे लु:नुड खेम्मे?टुडजि ॥ निवाहाडलाम
टेआप्पा?आ खा पक्का ले:मामि योम्बोकपे? खाडमुमा खेये लु:नुड
इ:डुडजि ॥ ²¹ मोडोणे?नो? का यहुदिजिडे? मन्डिरबे? रा:प्नुड से?नेमा
योगामि ॥ ²² तर आयुरो निवाहाडडे?नो? सहायोग ले:मे?निडसिडे ॥
मोडोणे? का इगोबे? टुघुबा चोपमि पोम्बे? ये:प्नुड येसुमि साविछ
पि:मे?निडसिनुडहाजि ॥ मोसानुड अगमबक्ताजिडे?सो एक्साड लिये
लु:नुड लु:बा?आ खाबाड हाइखा बे?लो इमाडसो के? माइ:डि? ॥

²³ ‘मुवित पि:खुबा हाडबा खिरिस्टडे? खे आडमानुड सिमा खेये, खो
सिघे?पा?आबाड हिडबोवखुबाजिबे? चोपपा या?लोमा लियेनुड खोसे?
मुवितमि उज्यालो खोमि जाति यहुदिजिनुड हाइखा जातिहा

या?मिजिबे?सोड लाजेनुडे, लु:नुड अगमबवताजिडे? लु:बेबा?आ लेटे ॥”

²⁴ पावलडे? लु:बा?आ इघा खा खेम्नुड फेस्तसडे? वोसाड लु:सु, “पावल हेडगो नाडबोइटा, हेड गो हेनेए निडाडे? नाक्सुबाड टोडइटा ॥” ²⁵ तर

पावलडे? लु:सु, “आदरनिया हाकिम फेस्तस, का नाडबोवपा?आ ने?नि, का गो साधेनो? लेडेनुड चैबानो?मा खा इ:मे?निडसिनुडे ॥

²⁶ आदरनिया हाडबा अरिपासडे? इघा चोप खा नुरो? लेण्डुए इघा खामि टुम्बे? के? खो मेडकि?सि?रे? लु:हेनुडे ॥ खोसे? इघा खामि टुम्बे? नुरो? लेण्डुहा इण्डो?होड इघा खा चोप या?मिजिमि रुम्बे? लिबा?आ लेटे

॥ ²⁷ हे हाडबा अरिपास, इमा हेने? अगमबवताजिमि खाबे? बिस्वास

लेण्डुए ? चैबानो? हेने? बिस्वास लेण्डुए लु:मे खा के? लेनुडे ॥”

²⁸ मोडोवपे?नो? अरिपासडे? पावल लु:सु, “इडो? एडे?वा खाडे? हेने?

का खिरिस्ट्यान टोडमा यो?इये ?” ²⁹ पावलडे? लु:सु, “हागो एडे?वाहोडसो बे?लोहोडसो इगो केहा खाडे? हेडरे?नो? ने?नि आयु टुघुबा चोबे? के? लु:बा?आ खा खेम्नुड चोप या?मिजि काडो?मा बिस्वासि लिमाहोड नुबा लिसे ॥ के? इगोमि लागि निवाहाडनुड पारथना ले:नुडे ॥”

³⁰ मोडोवपे? हाडबा अरिपास, बे?ए हाकिम फेस्तस, बरनिकिनुड माहाजिनुड लेम्बा?आ या?मिजि मोबा चोप या?मिजिसोड सुवाक्टो?

ये:पोगामि ³¹ मोबा पाखे?यु खे?माबे? खोजि खोजि इडो? कासामि, “इगो या?मिडे? से?नेमे सजायनो? चुप्मारोमा बिरोडगो मेले:टिटुए लेए ॥”

³² हाडबा अरिपासडे? हाकिम फेस्तस लु:सु, “इगो या?मिडे? रोमि बे?ए

हाडबा सिजरबे? बिन्ति ले:१मे खा मेडाकपा?आहोडगो ले?हाडमासोड
नुडे ॥”

27

पावल रोमबे? खेप्पा?आ

¹ कानिड इटालि देस* खे?मामि निधो लियेम्बाड एक्सड खोजिडे?
पावल हाइखा कैदिजिनुड सोरि हाकिम अगस्टसमि सेनाजिमि एप्पा येरिड

युलियस मि जिम्मा टिहाक्सु ॥ ² कानिड एड्रामिटेनोस लु:मे सहरबाड
आप्नुड एसिया ठाउमि बे?लो योडे? यिजुम्बा?आ पोडबोडमा लिसाड
खे?सि? पोरोकपा?आ योडा जहाजबे? साडनुड रम्बोगिडमा ॥
माकेडोनिया ठाउबे? सि?इये थेसलोनिके सहरबाड आप्पा?आ
अरिस्तारखस सोड कानिडनुडनो? टुसे ॥

³ वागियाराम कानिडे? सिदोन सहरबे? रुक्टुडमा ॥ मो ठाउबे? एप्पा
येरिड युलियसडे? पावल नामनाम ले:१नुड खोमि लाडगामजिनुड

चुप्सि? खे?नुड खो पाण्डहा खानुड सहयोग लासे लु:सु ॥ ⁴ मोबाड
कानिड साडबा?आ योडा जहाज फेरि रम्बोगा ॥ तर योडा जहाजमि
पोम्लाम्बाड हि?वाबा लेम्बा?आसे? कानिडे? योडा जहाज साइप्स लु:मे
योडे? यिजुम्बा?आ पोडबोडमामि केवपाड हि?वाबा यि:प्साड खडिडमा ॥

⁵ किलिकियानुड पामफिलिया लु:मे ठाउमि केवपे?सिइये वाबोक्ला
पाडघे?नुड लुकिया ठाउबे? सिइये माइय लु:मे सहरबे? लेन्डिडमा ॥

⁶ मोबे? एप्पा येरिड युलियसडे? अलेक्जेन्डरिया लु:मे सहरबाड इटालिया
देसबे? खे?एये योडा जहाज चुप्नुड खोसे? मो योडा जहाजबे? कानिड

साडमे?टा ॥ ⁷ हि?वाबा पोम्लाम्बाड लेम्बा?आसे? कानिड बे?लो याकरो
ता:म ले:१साड खे?माबे? याप्चे? विनडस लु:मे सहरमि केवपे? रुक्टुडमा

॥ मोबे? रुक्माबे? हि?वाबे? झना मोबाड पोम्बे? मेडखे?मे?टा ॥
मोडोगे? कानिड योडे? यिजुम्बा?आ केरेट लु:मे पोडबोडमाबाड

यिप्खे?साड सालमोने लु:मे ठाड लिसाड खडिडमा ॥ ⁸ बे?लो खे
आडसाड कानिड मो योडे? यिजुम्बा?आ पोडबोडमामि केवबाड लासिया
सहरमि केविपए सुन्दर लु:मे ठाडबे? लेन्डिडमा ॥

⁹ मोबे? रुक्माबे? बे?लो याक यागा ॥ सावमेन्जा पेम्मे याकसोड

रुक्खे?पेबा?आ ले:टा, मो चुड बेलाबे? सानिड लेडइये हुन्डिबेरिडे?
ले:मे? मोबाड योडा जहाज रम्बोवमा सारो सि?टा ॥ मोडोगे? पावलडे?

योडा जहाजबे? खो हुडखुबा या?मिजि इडो? लु:सुजि, ¹⁰ “होड

लाडगामजि, हागो इडो?सोड लिहेये कानिड इगोबाड योडा जहाजबे?
साडनुड पोम्बे? खे?माहोड योडा जहाजबे? टुहा कोवनामरे?नो? ने?नि

कानिडनो?सोड सिघेन्डि होला के? मि?इनुड ॥ ¹¹ तर एप्पा येरिडडे?
पावलडे? लु:बा?आ खा चैबानो? लिये मेमि?टु ॥ तर खोसे? योडा
जहाजमि मालिकनुड योडा जहाज खि:वखुबाडे? लु:बा?आ चाहि

बे?लोनो? बिस्वास ले:टु ॥ ¹² चुड याकपे? पेम्मामि लागि मो योडे?
यिजुम्बा?आ पोडबोडमा नुबा मेले:ते ॥ मोडोगे? बे?लो या?मिजि मोबाड
चान्डी चान्डी ले:नुड फोनिकस लु:मे सहर रुक्मा बोल ले:टामे ॥ मो

फोनिकस ठाड चाहि थाडगेत-नाम्थानुड नाडगेत- नाम्थालाम
हिडघे?पा?आ ठाड ले:टे ॥

¹³ लाडगेतलाम्बाड ता:म हि?वाबा लेम्बोगा ॥ चोप या?मिजिडे? ‘हागो
कानिड खे?हेन्डिडमा मिनामि ॥ माहाजिडे? हाणुड युडबा?आ योडा
जहाज हाण्ठाम खे?वा फि?नुड खोजिमि योडा जहाज केरेट लु:मे

पोडबोडमामि केवबाड खिःक्खे?पोगुजि ॥ ¹⁴ तर इच्छे? एक्साड मो
पोडबोडबाड फुइक्सुमा बे?ए यिक्खाबा ॥ मोमि निड चाहि नाम्गेत

थाडगेत लुःमे फुइक्सुमा लेटे ॥ ¹⁵ मो फुइक्सुमाडे? योडा जहाज टेगु मोबा
मोमि पोम्बे? इमाडसोड माले?हेसुडमा ॥ मोबा मो फुइक्सुमाडे? हाम्बे?

हाम्बे? लाघेन्दुए मोबे?नो? यि?खे?मे?टुडमा ॥ ¹⁶ मोबा क्लौडा लुःमे
योडे? यिजुम्बा?आ पोडबोडमामि लाडगेतलाम रुक्नुड एक्साड
पोडबोडमाडे? फुइक्सुमा यिक्खडा ॥ तर मोबे?सोड योडा जहाजमि
एडगुवाराम हिःक्नुड युडबा?आ एडे?मा योडा जहाज कानिडे?

याप्ते?नो? जोगाबा लेटुडमा ॥ ¹⁷ मो से?के?नुड योडा जहाज होडसि?यु
युडनुड योडा जहाज खिःक्खुबाजिडे? मो एडेम्मा योडा जहाज बे?हा
बे?हा पडाणे? नुरो? हिःगुजि ॥ हागो योडा जहाज लिबियामि सिरटिस
ठाउमि केक्काजि रुडगोवा खा?मिनुडमा ठाउबे? हुम्सिघेयेण्डे लुःनुड
कि?सिबोणिडमा ॥ मोडोणे? योडा जहाज खिःक्खुबाजिडे? योडा
जहाजमि ताम्बु हेओक्नुड हि?वाबामि बोलबे?नो? योडा जहाज

ले?हाक्खुजि ॥ ¹⁸ मो कि?सिमारेमा हुण्डारि लिडुडक्खडा मोबा वागियाराम
माहाजिडे? योडा जहाजबे?हा कोक्कनाम वाबोक्लाबे? राबुजि ॥

¹⁹ सिडआराम योडा जहाज टोडमामि लागि पा?मिहा कोक्कनाम खोजि

टाडबे? वाबोक्लाबे? राप्हेक्खुजि ॥ ²⁰ बे?लो याकरो कानिडे? साडगेनुड
नाम इमाडसोड मेडखाडडोक्कुडमा ॥ फुइक्सुमा बे?ए लेन्दुडघडा
मोडोणे? कानिड हिडइण्डिडमा लुःमे आससोड मेखे?पेबा?आ लेटा ॥

²¹ या?मिजिडे? चामा मेक्काबा?आ बे?लो याक लिघे?पा?आ लेटा ॥

पावलडे? मोबे? टुघुबा चोप या?मिजिमि पोम्बे? येःप्नुड लुःसु,

“वावानिसाजि, हेनिडे? के? लु:बा?आ खा खेमनुड, केरेटबाड रम्बोवमा
मेम्फेने ॥ मोडो? ले:पा?आहोड इडो?मा खे आडमासोड मेसि?टे इमाड

कोकनाम्सोड नासि मेलिसे ॥ ²² तर हागो बिन्ति ले:निम्ने, हारेस

ए?चासानिडे, आसे?सोड टाडबामि जिबन खेरो एम्मा पा?नि, इगो योडा

जहाजरे?नो? नासि लिये ॥ ²³ का निवाहाडमि या?मि लेडेनुड के?
खोमिन्नो? सेवा लेनुडे ॥ आयु सेन्डा खोमिन्नो? इक्को थाडसिरिदुतडे?

केए पोम्बे? ये:पुड लु:सिडा ॥ ²⁴ ‘होड पावल, एविकसिने, न्यायमि लागि
हेने? हाडबा रोमिमि पोम्बे? खे?मानो? खेयेनुड हेने? ले:मे हेडनुड

सोरि खे?खुबा चोप या?मिजि निवाहाडडे? रा?छे लेये ॥ ²⁵ मोडोने? केहा

वावानिसाजि, दुक्का लिसानिडे इन्डो?होड निवाहाडडे? लु:बा?आ मो खा

वैबानो? पुरा लिहा लु:नुड के? बिस्वास लेएटुडे ॥ ²⁶ तर हागो योडे?
यिजुम्बा?आ इक्को पोडबोडमामि केक्पे? ठो:इन्डि होला ॥”

योडा जहाज नासि लिबा?आ

²⁷ कानिडमि योडा जहाज इडो? माहोडमाबे? लेम्बा?आ फुइक्सुमामि
रुम्बे? इगि?यु मि?यु वाडुबा?आ इक्पोड रियाक लिगे?पा?आ लेटे ॥
सेन्डाराजि मो योडा जहाज खि:क्खुबाजिडे? कानिडमि योडा जहाज

इक्को देसमि केक्पे? रुक्सि?पोरोवइटा लु:नुड मि?टुजि ॥ ²⁸ मोडोने?
माहाजिडे? योडामि होडडुम्बा इन्डोक टुउ लु:नुड सि:क्पोगुजि ॥
सि:क्माबे? रिक्पोड मिटरडोक होडडुम्बा टुबा?आ लेडोक्टुजि ॥ आडे?
मे?योड रुक्नुड फेरि सि:क्माबे? सुम्बोड गचडोक होडडुम्बा टुबा?आ

लेडोक्टुजि ॥ ²⁹ माहोडमामि केक्पे? एडे?वा योडा टुबा?आसे? योडा

जहाज रुडगु?वाबे? रुक्सिघेन्डे मि?नुड योडा जहाज खि:क्खुबाजि
कि?सिबोगामि ॥ मोडोगे? माहाजिडे? योडा जहाजमि एडगुवारामबाड
रिगोटा योडा जहाज हाण्टाम चैक्किमि बे?हा खे?वा हे?एण्णुड योडा
जहाज हाप्मे?टुजि ॥ मोबा हागो इन्डोक्पे? नाम टेये लु:नुड हुडबोगुजि ॥

³⁰ इडो? योडा जहाज खि:क्खुबाजिडे? पोम्लाम्प योडा जहाज हाण्टाम
चैक्किमि बे?हा खे?वा हेएम्मे निहुबे? एद्रिहा योडा जहाज हेएण्णुड मोबे?

साडनुड वि:मा योगामि ॥ ³¹ तर पावलडे? येरिडमि एप्पानुड येरिडजि

लु:सुजि, “इघा योडा जहाज खि:क्खुबाजि इगोबाड वि:पेमिहोड हेनिड

असासोड हिक्सानिडनि ॥” ³² इगो खा खेमनुड योडा जहाजबे? हि:क्खुड
युडबा?आ एद्रिहा योडा जहाज हि:क्काम पडाक येरिडजिडे? हेक्खुड मो
एद्रिहा योडा जहाज योडाबे? यि:हाक्खुजि ॥

³³ नाम टे:सि? पोरो?माबे? पावलडे? माहाजि ‘इमाड होडसो चामानो?

खेये’ लु:साड लु:सुजि, “हेनिडे? किरिसमावे? फुडक्खुमा इमाडसोड

मेन्चाबा?आ एकपोड रियाक लिघे:टे ॥ ³⁴ हागो के? हेनिड बिन्ति

ले:निम्मे, इमाड न इमाडगो चासानिडे इन्डो?होड हिडमामि लागि

चामानो? खेये ॥ ए?किरिससानिडे, निवाहाडडे? लु:डिडो?नो? असासो

इमाडसोड लिसानिडनि ॥” ³⁵ इडो? लु:नुड पावलडे? चरेपा कु:बु मोबा

चोपमि पोम्बे? निवाहाड ओहाड पि:नुड चोबोगु ॥ ³⁶ मोबा एकसाड

हाइखाजि चोबे? माडकि?सिरे? चाबोगुजि ॥ ³⁷ मो योडा जहाजबे?

कानिड नि सये छयात्तर जना या?मिजि टुसिडमा ॥ ³⁸ चोबे? उक्खारो

चामा चासे?नुड योडा जहाज सोप्याड टोडमामि लागि मोबे? टुबा?आ गहुसोड योडाबे? राण्णुजि ॥

³⁹ नाम टे?नुड माहोडमामि इक्केड खाडमुसा, तर योडा जहाज खि:क्खुबाजिडे? मो ठाउ मेलेसुजि ॥ केक्पे? नुरे? बालुवारे? टुबा?आ ठाउ खाडडोक्नुड योडा जहाज मोलाम्नो? लाग्गे?मा योगुजि ॥

⁴⁰ माहाजिडे? योडा जहाज हाण्ठाम हि:क्पा?आ पडक हेक्नुड योडा जहाज हाण्ठाम माहोडमाबे?नो? योडमे?टुजि ॥ योडा जहाज टो:क्ठाम हि:क्पा?आ पडकसोड हेम्बेसुजि मोबा पोम्लामिम पाल मिण्डु ठे?पोगुजि मोबा हि?वाबाडे? योडा जहाज येप्खे?माबे? केक्पे? योडा जहाज

खि:क्खे?टु ॥ ⁴¹ तर योडा जहाजमि पोम्लाम तु?खे?नुड माहोडमामि केक्पे? नो:क्पा?आ बलौटाबे? हुम्युसा मोबा एडगुवालाम चाहि योडामि फेडलेवाडे? मो:क्नुड पोक्खे?पोगा ॥

⁴² मोडोक्पे? कैदिजि वाफाक्साड चिखेम्मि मि?नुड से?नेमा योगुजि ॥

⁴³ तर येरिडमि एप्पाडे? पावल हिडमे?मा मि?टुए ॥ मोडोणे? खोसे? असासोड मेसे?मे?टुजि ॥ खोसे?नो? वाफाक्खेगुबाजि या?लोनो? रुडगो?वा खा?मिण्डुमा ठाउबे? वाफाक्खडानिडे लु:नुड आग्या पि:सुजि

॥ ⁴⁴ हाइखाजिडे? चाहि योडा जहाजमि फलेक अथवा इमाड इमाड फेक्खे?पा?आ टुक्ख रा:ण्णुड मेएरेड खडानिडे लु:नुड आग्या पि:सुजि ॥ इडो? कानिड चोप इमाड मालिरे? माहोडमामि केक्पे? रुक्खुडमा ॥

28

पावल योडे? यिजुम्बा?आ माल्टा लु:मे पोडबोडमाबे?

¹ इडो? कानिड मोबे? नुरे? लेडयेम्बाड मो पोडबोडमामि निड माल्टा

लुःनुड लेडोवटुडमा ॥ ² मोबे? पेडखुबा या?मिजि बे?लो टोडजानुम्मे लेः ॥
मोडोवपे? वारि लेन्बोवपा?आसे? बे?लो चुड लुःबोगा मोबा मोबे?हा

या?मिजिडे? मि टुप्नुड हुडसि? केडामि ॥ ³ पावलडे? इवको मुठा सिड
मिबे? एम्माबे? मिमि कुहाडडे? पुसे? सिडबाड पेआप्नुड पावलमि हुकपे?

खेडिखडा ॥ ⁴ इडो? पावलमि हुकपे? पुसे? खेडिघे?पा?आ खाडनुड

मोबे?हा या?मिजिडे? खोजि टाडबा इडो? काबोगामि, “इगो या?मिगो
चैबानो? या?मि से?खुबानो? लेः?मा खेये ॥ इगो माहोडमाबाड हिडआबा

तर न्याय निड लेः?खुबा देबिडे? मालेडु ॥” ⁵ तर पावलडे? खोम हुक
हि?माबे? मो पुसे? मिबे? हे?युसा ॥ मोसे? पावल इमाडसोड मालेः?हेसु

॥ ⁶ मोबे?हा या?मिजिडे? चाहि हागो ‘पावल पुसे?मि सिक्वाडे? होम्नुड
सिघेये’ मि?नुड खो खाडडु?घे?टुजि ॥ तर बे?लो हुक्सुजि खो इमाडसोड

मेलिसा ॥ इगो खाडनुड खोजिमि निडा फेन्नुड इडो? लुःसुजि, “इगो
या?मिगो चैबानो? चाप रे ले ॥”

⁷ मो योडाडे? यिजुम्बा?आ पोडबोडमाबि?ए डायोड पब्लियसमि खिम
जग्गा मो ठाडबाड केवपे?नो? टुसाहा ॥ पब्लियसडे? कानिड खोमि
खिमबे? वि?खे?नुड स्वागत लेः?साड सुम याकरो चाबाड सत्कार लेटा

॥ ⁸ मोडोवपे? पब्लियसमि पाबा एचे?पा?आनुड मासिडे? चु?पा?आ लेटे ॥
मोडोवे? पावल खो चुप्सि? खडा मोबा खो पारथना लेः?पे?नुड एक्साड

हुक युडनुड मो एप्पामि पाबा नुबोगु ॥ ⁹ इडो? नुबोवपा?आ लेडोवनुड मो
ठाडबे?हा चोप टुक्खुबा या?मिजि लेरसामि मोबा पावलडे? माहाजि चोप

नुबोगुजि ॥ ¹⁰ खोजिडे? कानिड बे?लो आदर लेः?नुड हुक्विचम्सोड
पिःसामि ॥ एक्साड कानिड रम्बोवमाबे? कानिड रमबे? पा?मिहा

थोकसोड पिःहाक्समि ॥

माल्टाबाड रोम खे?पा?आ

¹¹ मोबा सुम महिना एक्सड कानिड काप्साबा देबता निडमा योडा जहाजबे? साडखडिडमा ॥ मो योडा जहाज अलेक्जेन्ड्रिया सहरबाड

लेन्नुड चुड महिनारो इगो माल्टा ठाउबे?नो? टुसे ले ॥ ¹² मोबा कानिड सुराकुसाइ लुःमे सहरबे? रुवनुड सुम याकटो? मोबे? पेनिडमा ॥

¹³ मोबाड रम्बोवनुड कानिड रेगियाम लुःमे सहरबे? रुवटुडमा ॥ वागियाराम लाडगेतलामबाड हि?वाबा लेस्सानुड सिडआराम कानिडे?

पटिओलि लुःमे सहरबे? लेन्डिडमा ॥ ¹⁴ मोबे? कानिडे? परभु येसुबे? बिस्वास लेः?खुबा वावानिसाजि चुप्टुडमा ॥ माहाजिडे? इक साताडो? पेनानिडे लुःनुड कानिड बिन्ति लेटामि ॥ कानिड माहाजिनुड इक साता

पेन्नुड रोम सहरलाम रम्बोगिडमा ॥ ¹⁵ परभु येसुबे? बिस्वास लेः?खुबा रोम्बे? टुघुबा बिस्वासि वावानिसाजिडे? कानिड आफ्मे?निडसिबा?आ खा खेमनुड इन्डोक जना सुम पाटि लुःमे ठाउबे? मोबा इन्डोक जना चाहि अप्पियस लुःमे बजारबे? कानिड चुप्सि? अबामि ॥ पावलडे? माहाजि खाडडोकमासोरो? साप्थाडमानुड निवाहाड ओहाक पिःसु ॥

पावल रोम सहरबे?

¹⁶ रोमबे? लेन्नुड एक्सड पावल खोम टाडबामि कोठा लानुड पेन्डोगा मोबे? खो इक्को येरिडडे? हुक्सुए ॥

¹⁷ सुमयाक एक्सड पावलडे? रोमबे? पेडखुबा यहुदि अगुवाजि केडुजि ॥

माहाजि सुप्सामि मोबा पावलडे? इडो? लुःसुजि, “होउ वावानिसाजि, के? कानिडमि जातिनुड कानिडमि टुबाजिडे? पिःबा?आ रितिवाजमि बिरोधबे?

इमाडसोड मेलेः?माबे?सोड, यहुदि वावानिसाजिडे? का यरुसलेमबे?

राःप्नुड रोमिजिमि हुकपे? पिःसामि ॥ ¹⁸ रोमिजिडे? का बे?लो खा सिम्से?नुड ले?हाडमा योगामि इन्डो?होड का से?नेमारोमा माडे?मा

योम्बोक के? लेः?पा?आ खोजिडे? मेन्चुट्टुजि ॥ ¹⁹ तर कानिडमि यहुदि वावानिसाजिडे? ये?ये? लेः?नुड का माले?पा?आसे? के? रोमि बे?ए हाडबामि पोम्बे? बिन्ति लेः?मा सि?टा ॥ तरसोड केहा यहुदि

वावानिसाजि दोस टिमा इमाडसोड मा?आहा ॥ ²⁰ मोडोणे? इगो खा खेम्मे?सि?नुड हेनिडनुड चुप्सि? के? इगोबे? के?पा?आ ॥ कानिड इर्राएलिजिडे? लेडइये लुःनुड आस लेः?पा?आ मुक्ति पिःखुबा हाडबा लागिनो? का आयु इगो वेविचमि कोडबे? सिइटिडे ॥”

²¹ इगो खा खेम्नुड माहाजिडे? इडो? लुःसुजि, “हेनेए टुम्बे? कानिडे? यहुदिया देसबाड इमाडसोड पत्रा मेन्चुट्टि? मोबा हेनेए बिरोधबे? इमाडसोड माडे?मा खा वावानिसाजिडे? कानिड मेडखेम्मे?टि?मि ॥

²² तर कानिड हेनेहा निडा बे?हा खा खेम्मा मिडइडिडमे इन्डो?होड हेनेहा या?मिजिमि बिरोधबे? लिबा?आ खा हाम्बे?को हाम्बे? कानिडे? खेम्डुट्टुडमे ॥”

²³ मोडोणे? माहाजिडे? पावलमि खा खेम्मामि इवको याक निधो लेःटुजि ॥ मो याकपे? बे?लो यहुदिजि सुम्नुड पावलमि कोठाबे? लेन्डामि ॥ मो याक पावलडे? माविमएबाड युडाठोक निवाहाडमि राज्यमि टुम्बे? इःडुजि ॥ मोसाडे? साप्पा?आ धारमिक साप्चिरानुड अगमबवताजिडे? साप्पा?आ खाबाड खोसे? येसुमि टुम्बे?हा खा नुरो? इः?साड खोजि बिस्वासबे?

लाःप्मा योगु ॥ ²⁴ इन्डोणे? चाहि पावलडे? लुःबा?आ खा नुरो? लेनुड

बिस्वास लेःटुजि तर इन्डोणे? चाहि बिस्वास मालेःटुजि ॥ ²⁵ खोजिमि

रुम्बे?नो? खा मेन्टोडबा?आसे? खोजि मोबाड रम्बोक्स? पोरोगामि ॥

मोबा पावलडे? माहाजि इडो? लु:सुजि, “पबित्या होडनिवाडे? हेनिडमि
टुबालाबाजि लु:बा?आ खा चैबानो? लेये इन्डो?होड अगमबक्ता

यसैयाबाड निवाहाडडे? इडो? लु:सु,

²⁶ इघा या?मिजिबे? खे?नुड इडो? लु:साजे, ‘हेनिडे? खेम्माणो खेमइन्डानुमे, तर

लेसानुम्नि, खाडमाणो हेनिडे? खाडइन्डानुम् तर खाडडोवटानुम्नि!’

²⁷ इन्डो?होड इघा या?मिजिमि निडा रुडगो?वाडो?नो? लेहा ॥

इघाजिमि नेएक हिप्चुम्घेटा,

मोबा इघाजिडे? खोजिमि मिक टेक्चुम्प्टुजे!

आक्टो? माले:पा?आहोड इघाजिडे? खाडहेसुजे, खेम्हेसुजे होला मोबा निडाडे?
लेसुजे ॥’

²⁸ मोबा एक्साड पावलडे? लु:सु, “मोडोगे? हागो हेनिड लु:निम्ने निवाहाडमि मुवितमि
सुसमाचार हाइखा जातिहा या?मिजिबे? खोसे? एक्साड माहाजि

खोजिटाडबा लु:घुसे? चुसाड खडामि ॥]पाडइटुहा हागो माहाजिडे?

खेमइन्डुजे ॥” ²⁹ [पावलडे? इगो खा लु:से?नुड

³⁰ पावल टाडबे?नो? लाबा?आ कोठाबे? डि निडडो? पेना ॥ मोबे?नो?

खो चुप्सि? लेडखुबा चोप या?मिजि खोसे? स्वागत ले:टुजे ॥ ³¹ पावलडे?

मेडकि?सिरे? निवाहाडमि रज्यामि टुम्बे? या?मिजि खेम्मे?टुजेनुड परभु

येसु खिरिस्टमि टुम्बे?हा खा इ:डुजे ॥ मोडोवपे? असे?सोड खो मोडो?

ले:मा मासेगुजि ॥